

**NATIONAL ASSEMBLY OF
SEYCHELLES**

Wednesday 31st May, 2023

The Assembly met at 0904am

National Anthem

Moment of Reflection

Mr Deputy Speaker in the Chair

MR DEPUTY SPEAKER

Bonzour tou Manm Onorab. Tou travayer Sekretarya Lasanble Nasyonal. Tou piblik ki pe swiv nou travay pou sa Merkredi 31 Me. E mon ava dir en bonzour spesyal bann rezidan Zil Perseverance ki avek nou ozordi. *Welcome to the National Assembly e mon osi note, mon prezimen nouveau staff Lasanble ki pe asiz isi, is it?*

Uh i lo en internship. Ok. Welcome e all the best dan ou internship pou sa 3mwan ki devan ou.

Ozordi nou pou kontiny avek deliberasyon lo Mosyon table par Manm elekte pou distrik Au Cap, Onorab Kelly Samynadin. Mon ti dir yer avan nou fini i annan 6 Manm ki reste, 3 sak kote e nou pe reste lo 10 minit, akoz nou le fini avek sa *by 10er edmi pour ki*

11er nou pou pran Prozedlwa ki lo nou *Order Paper*.

Avan nou komanse, mon ava zis donn laparol Onorab Desheila Bastienne ki'n demann permisyon pou zis swet labyenveni son bann *constituent* ki in envite. Mersi.

HON DESHEILA BASTIENNE

Mersi Mr Speaker. Bonzour Mr Speaker. Bonzour tou Manm Onorab e en bonzour spesyal a tou bann zabitan ki sorti Ile Perseverance. Nou vzwazen zis a kote, distrik ki bord avek Lasanble.

Mon swet zot labyenveni lo lapar travayer ek Manm Lasanble Nasyonal. E mon espere ki zot ava pas en bon moman letan avek nou. E zot a sorti isi avek en bon souvenir. Mersi. Mersi, Mr Speaker.

MR DEPUTY SPEAKER

Mersi Onorab Bastienne pou sa de mo. E alor premye entervenan lo lalis pou bomaten. Me avan nou fer sa mon ava zis relir Mosyon ki devan nou pou benefis bann dimoun ki pe swiv travay Lasanble Nasyonal.

Mosyon table par Onorab Kelly Samynadin. I dir: -

Lasanble i lans en lapel avek tou paran pour angaz seryezman dan konversasyon

avek zot zanfan konsernan zot konportman, avek bi pour amelyor e anrisi konteks lansennyman ek laprantisaz dan bann lenstitisyon skoler e pou asire ki zot zanfan i benefisyé maksimonm pandan zot letan kot lekol.

Sa i Mosyon ki devan nou. Premye entervenan mon pou apele se Manm elekte pou distrik Port Glaud Onorab Aglae.

HON EGBERT AGLAE

Mersi Mr Chair, Mr Speaker. Bonzour tou zabitant Perseverance, bann zabitant Perseverance ki dan Galeri e tou Manm Onorab e tou dimoun a lekout.

Mr Speaker Mosyon ki devan nou, pe demann tou paran pou angaz zot seryezman dan bann konversasyon avek zot zanfan an se ki konsern zot devlopman laprantisaz e presizeman zot ledikasyon.

Pou mwan Mr Speaker, mon regard sa Mosyon dan de fason. En fason se parey proverb i dir, proverb Afriken se ki '*it takes a community to raise a child*'. Mon regard li dan fason kot lasosyete, rol ki lasosyete i zwe anver devlopman nou bann zanfan.

E dezyenmman, mon pou tous sa bout kot i konsern

gouvernans lo sistem ledikasyon.

Premyerman, nou bezwen demann nou lekor si kestyón se kwa ki sanz konportman zanfan? Akoz ler zanfan i ne parey nou tou nou dir 'en bon piti, *sweet baby*' nou tou tyonbo li nou bers li. Me an gran-disan nou vwar poudir latitud zanfan i sanze.

E latitud zanfan i sanze pa zis sanz lo li menm, i ganny enfliyanse atraver sa lanvironnman ki i pe grandi ladan.

Si sa lanvironnman ki i grandi ladan i en lanvironnman ki bon, ki pozitiv, byensir zanfan pou pran sa tandans pozitivite dan son lavi. Me si sa lanvironnman i en fason ki negativ, ki pa pe anmenn bon valer dann son lavi, byensir sa tandans pou sa zanfan al ver negativite i la.

E osi parfwa ou annan sa mix tou lede. Kot ou kapab annan sa de eleman negativ e pozitiv ansanm, kot zanfan i vwar li parfwa dan en milye. E taler mon pou eksplik en ptigin. Dan en milye kot parfwa i ganny repouse dan negativite, me selman i annan en lot kote osi ki pe sey pouz li dan pozitivite.

E se sa rezon ki mon dir nou bezwen demann kestyón akoz. E letan mon'n koz ek

serten bann *teachers*, i dir ou poudir bokou zanfan letan i dan primer zot bann bon zelev, me det ki zot sorti dan sa P6 zot komans dan S1. Akoz i annan sa fakter ki mon pe al dan gran lekol, zanfan latitud i komans sanze e la zanfan i vin problematik dan en fason ou en lot.

Me selman pa tou zanfan ki koumsa, mon bezwen admet. Pa tou zanfan ki tonm dan sa kategori.

E la Mr Speaker, letan ou vwar poudir sirtou zot in arriv dan sa segonder la, se par fwa osi kot i annan bokou sa ki nou apel sa bann apartenans *peer pressure* ki vini. Kot zanfan i sey rod li, li menm li kote i sitye li dan en lanvironnman skoler.

E la kot i annan bann group, e la parfwa osi i annan bann group ki pa neseserman pozitiv. So letan nou pe get sa konteks Mr Speaker, preznan ki rol ki nou kapab dir lasosyete, lakominote i bezwen zwe li dan sa lanvironnman?

Nou konnen poudir ozordi teknolozi, modernizasyon, pei kot in arive, devlopman ki'n arive dan pei i fer ki lespri nou bann zanfan i pli ouver ki 15an, 20an pase.

E lenformasyon i disponib atraver bann diferan form rezo sosyal e tousala i

annan en lenpak. Nou vwar bokou bann *trends* ki vini, ki zanfan i sey kopi, pou sey met zot a zour ouswa pou kre ser ten lapartenans.

E tousala i annan en lefe psikolozik lo sa zanfan an grandisan akoz i pe rod son lekor ki li i ete, i pe dekouver son lekor osi dan en fason.

So, lo kote kominote, si en paran li menm li i pe obzerv son zanfan. I pe obzerv son zanfan ki pe grandi letap par letap i pou konpran ki pe pase dan lavi son zanfan.

Me si en paran pa fer letan pou obzerv sa bann letap ki en zanfan i bezwen grandi, ki pe pas ladan pou grandi, byensir i pou *miss* ser ten *clue* ouswa ser ten *red flag* ouswa ser ten *flag* ki pou vwar poudir mon zanfan pe sanze la. Son konportman in sanz sitan pe sanze e ou pa pou vwar.

So, sa i bann fakter ki nou bezwen petet koman bann paran, mwan koman en paran mon menm mwan, mon annan zanfan ki pe grandi. Pran letan pou observe menm si parfwa nou koman bann MNAs nou annan en louvraz ki vreman *busy*. Nou antre kot nou tar aswar souvandfwa.

Eski nou pa mank ser ten oportinite osi pou nou petet parey bann lezot paran ki

travay *shift*, pou zot annan sa lobzervasyon lo zot zanfan pou gete ki zot zanfan pe fer?

E la Mr Speaker, problemm i komanse. Sa mankman sipervizyon, sa mankman latansyon, i fer ki zanfan i reste li, i vwar li dan en fason larg mon kapab dir, larg kot i kapab pe fer nenport kwa.

E si nou pa pran letan pou nou obzerv sa bann keksoz e osi donn sa latansyon, definitivman nou pou vwar nou dan serten sityasyon akoz lakominote ki nou viv ladan ozordi bokou dimoun pe viv dan en kominote ki vreman dan en fason.

Parey nou annan bann *housing estates*, i annan plizyer endividé, sirtou bann blok *flats*, kot zanfan i *join* dan bann group e la ki ou vwar poudir i annan bann negativite ki antre.

Dan en lot kote Mr Speaker, mon pou koz sa bout ledikasyon. Nou konnen poudir zanfan i pas li omwen 7 a 8erdtan dan en lanvironnman skoler e nou koman paran nou pa bezwen regard nou sistenm skoler koman en *daycare* ki nou zanfan i ale dan nou labsans.

I enportan pou nou annan sa distenksyon, konpran sa byen. Nou pa dir mon annan mon 3, 4 zanfan, mon pe anvoy li lekol sa i responsabilite sa

teacher, sa lekol pou get mon zanfan.

Me an menm tan letan nou pe koz sistenm skoler mon krwar i annan serten refleksyon ki nou bezwen fer ozordi, nou sistenm ledikasyon. I annan serten modernizasyon ki nou bezwen anmennen pou *accommodate* legzizans modernite ki sa zanfan pe pas atraver, pou nou konpran.

Premyerman i annan bann mankman, bann defayans ki menm si nou met devan parfwa nou lavwa pa pe ganny tande.

E la mon pe dir fran e onnet, nou, nou anvi donn siper en sistenm ledikasyon ki modern e ki reflekte bezwen zanfan e osi tou bann *staff* sirtou bann *teachers* ki bezwen ankadre sa bann zanfan dan en lazournen skoler parey en paran kot en lakour.

E si parfwa nou vwar zanfan i vin avek bann move konportman ki pa anliny avek kondwir lekol. Nou bezwen rod tou fason pou vwar kwa ki pe arive avek sa zanfan. Si i pa ti koumsa nou bezwen konpran ki pe arive.

I annan bokou lendikasyon. Letan ou koz ek bann *peer counselors* zot dir ou. Ou annan zis en *counselor* par lekol, en lekol ki annan li

anviron 400, 500 zelev. I pa fasil pou li kapab *oversee* tou bann zanfan swivi par swivi kwa ki pe passe, kwa ki pe sanz konportman ki pe fer sa zanfan swa vin anti-sosyal.

E enn bann eleman ki nou bezwen *tackle* e nou koz lo la souvan, i annan sa eleman *bullying* dan lekol ki sanz konportman zanfan. E *bullying* pe kontinyen arive. Menm si nou pe koz lo la, nou anmenn Mosyon, nou anmenn kestyon. *Bullying* i en faktor ki fer zanfan sanze.

I annan zanfan i deside reste li an izolasyon akoz sa, dan en pti kwen. E leta mantal, leta psikologik en zanfan si i pa byen i pa pou kapab aprann, i pa pou donn son 100poursan *the best*. So, sa nou bezwen osi en size ki nou bezwen pran li serye.

Lot osi mon krwar ki enportan se nou bezwen evolye en ptigin kot i konsern laparans zanfan. Ou konnen i annan - boner larantre la ti annan bann komanter ki ti pe ganny pase lo rezo sosyal kot bann group zanfan ti ganny kit deor, pa ti kapab antre dan baro lekol pou bann diferan rezon. Swa i dir seve pa byen, lenz ki swa i kourt, zip i tro kourt.

Mon krwar nou bezwen osi annan en konversasyon lo

sa size laparans. Kwa ki nou aksepte ki dan norm? Akoz pa tou zanfan ki fortinen pou li dan en fason ganny tou sa ki li i anvi dan son lavi.

E ler ou annan en paran ki annan li 3, 4 zanfan petet ozordi en barbye pe koz ou R100 *minimum* pou donn en *haircut*. E ler ou annan 3, 4 zanfan osi annan en lefe vreman, sa lefe finansyel pou sa zanfan.

So, nou bezwen kapab regard tousala. Si i vin dan savat petet i kapab *afford* en savat. Pa rezon pou ou kapab osi *bully* li akoz petet li i pa pe met bann *brand*. Tousala i bann keksoz ki pe arive dan lekol akoz mon koz ek etidyan mon osi. Mon annan en garson ki koz ek mwan lo la li osi.

So, pou mwan i en bann refleksyon ki Minister Ledikasyon i bezwen reflesir lo la. Annou pa get zis sa laspe akademik zanfan. Annou regard osi sa laspe byennet sosyal sa zanfan. Fodre pa ki nou sorti lo la.

E osi Minister Ledikasyon i bezwen pran son responsabilite pou fer sir ki i annan son *teachers* dan lekol ki pe *oversee* zanfan e son *teachers* pe travay byen.

Malgre zot pe met *performance based* i annan

serten keksoz, i annan defayans ki mon krwar ki nou pa pe adres. E Minister Ledikasyon i bezwen pran son rol, ki son Minis, ki son PS lo la.

MR DEPUTY SPEAKER

Ou ava *wrap up* Onorab. Mersi.

HON EGBERT AGLAE

Lot, avan mon *wrap up* Mr Speaker an terminan, mon krwar i annan enn lekout ki nou bezwen konpran direksyon ki nou sistenn skoler i bezwen ale fas a rol paran.

Paran i bezwen ganny angaze wi, me nou bezwen konpran ki sityasyon paran osi ki i fer fas avek san ki nou zis montre ledwa lo sa zanfan ki pe mal konport li.

E pou nou kapab al *in-depth*, akoz i annan en lasenn en bann mayon ki atase ansanm sa. *Ok.* Nou vwar poudir i annan bann defi ki paran i gannyen. Napa resours, mwayen pa permet, zot sey tap laport, laport i fermen. Nou konnen bann restriktirasyon ki sa Gouvernman in fer in fer ki bokou resours, landrwa kot zot ti ale pou gannyen. Pa pe gannyen ozordi. E sa i en problem pou zot.

Nou annan problem goute. Nou annan problem *lunch* e i annan problem ki i

dir ou i pa pe kapab *afford uniform*, *Dedicated Fund* nepli pe *provide* tousala.

So annou reflesir en pe lo la sa bann keksoz, mon pa pou montre zis ledwa lo paran. Akoz paran osi i annan son defi ki i bezwen fer koman li dan lasosyete. Me osi Minister Ledikasyon osi i annan en gran parti rol pou sey zwe pou amelyor lanvironnman e kondisyon ledikasyon nou bann zanfan dan lekol.

E paran si i santi li alez dan en fason avek sa lanvironnman, byensir paran pou partisipe. Akoz lontan nou ti fer sa. Paran ti kontribye ti vini.

So, avek sa Mr Speaker mon krwar ki nou bezwen reflesir en kantite. Akoz mon pa pou blanm zis zanfan akoz zanfan pa sanz lo li menm li, zanfan i sanz avek lanvironnman ki otour li.

E si nou *adjust* nou lanvironnman nou fer li pli *conducive*, definitivman zanfan i ava vin plis pozitivite e mon krwar i ava kapab anmenn pli bon rezulta. Mersi.

(APPLAUSE)

MR DEPUTY SPEAKER

Mersi Onorab. Nou premye entervenan *in go* 4 minit

overboard. Vreman mon le fini avek sa 10er edmi. So annou egzers disiplin dan nou letan. Annou servi nou letan prodkтив, *productively*. So, 10 minutes everybody. Next entervenan lo lalis Onorab Woodcock.

I annan en revey la anler, tou dimoun regarde pou mwan pa dir zot *wrap up*. Mersi.

HON WAVEL WOODCOCK

Mersi Mr Speaker. Mr Speaker sa Mosyon ki, annefe mon komanse par dir bonzour tou dimoun, sirtou bann zabitan Grand Anse Praslin.

Mr Speaker sa Mosyon ki devan Lasamble ozordi i en Mosyon ki vreman enportan. Annefe i vin a en bon moman sirtou ki demen i, nou pe selebre lafet zanfan. E annefe mon profit sa lokasyon pou mon swet tou zanfan Sesel en bonn fet demen, ki zot anmiz byen.

E annefe osi fer en pe refleksyon osi lo enn de sa bann bon keksoz, ki pe sorti dan bann entrevansyon sa de zour.

Mr Speaker, mon pou komanse par adres en size ki mwan mon santi i ase pertinan. Sirtou kot i konsern laprantisaz nou zanfan. E sa se dan mon lopinyon pli gran *threat* laprantisaz nou zanfan se drog.

I malere ki i annan bokou zenn ozordi ki'n tonm anba lenfliyans bann sibstans danzere, sirtou bann *hard drug*. E nou tou nou konnen kan ki bann *hard drugs* ti ganny entrodwir dan nou pei.

I mean si nou'n lir rapor TRNUC nou rapel ki bann solda ti eksprimen zot menm, ki mannyer sa bann pilil ki ti ganny fer vini pou donn bann solda, bann *hard drugs* ki apre zot al fer bann aksyon, menm pran lavi dimoun.

I ti komans dan letan parti inik apre in devlope, ozordi nou vvar plis bann drog pli danzere ankor pe kontinyelman antre dan nou pei ki ozordi nou pe sey dil avek sa bann sityasyon.

E i enportan pou paran koz ek zot zanfan lo sa fleo. I enportan ki paran i edik zot zanfan. E paran nou, nou annan en responsabilite. Mwan mon menm mon annan 2 *teenagers*, enn ozordi 17an, enn 15an.

E i enportan ki en keksoz ki nou fer se ki nou'n etabli en *network* avek bann lezot paran, sirtou bann paran ki annan zanfan ki frekant nou zanfan. Parey nou tou nou zanfan i annan zanmi. E i enportan ki bann paran i etabli sa *network*.

I enportan pou nou konnen avek ki, lekel ki nou zanfan pe frekante. E mwan parey mon dir, mon bann zanfan zot bann zanmi ki zot frekante nou konn zot paran, nou annan limero telefonn kanmarad. Nou swiv, nou koze, nou konnen kot nou zanfan i ete, kot zot pe ale e nou annan sa komunikasyon ek kanmarad.

Parey i annan en Manm in dir, Onorab Aglae osi in dir sa boner. '*It takes a village to raise a child*'. E nou tou nou bezwen annan sa regar e veye ki nou zanfan pe fer. Kot nou zanfan pe ale. Sa i bann keksoz ki enportan pou anpeste ki nou zanfan i tonm dan bann move frekantasyon, dan bann lenfliyans. Sa i ede.

E ozordi Mr Speaker i malere ki i annan bokou bann *dealers* pe target zanfan dan lekol. Nou'n vwar bann lensidan dan lepase kot menm bann *dealers* in donn zanfan drog pou antre avek dan lekol.

I enportan ki nou tou nou ede dan sa lalit. Nou ede pou nou rod en fason pou nou anpes e aret sa bann keksoz. E ozordi parey ou'n vwar, si nou pe swiv dan nouvel nou vwar ki mannyer nou Gouvernman pe met bokou lanfaz e nou vwar bokou bann *dealers* ki dan

lepase ti *untouchable* pe ganny arete.

Me nou'n vwar dan lepase annefe pa tou dimoun ki annan sa menm volonte, par lefe ki a plizyer repriz dan lepase nou'n vwar bann ka kot menm i annan Manm ki'n vin defann bann *dealers* dan Lasanble.

Mr Speaker, nou Gouvernman in erit plizyer problem e drog i enn sa bann *issue* ki nou'n erite. E i malere ki yer dan bann entervansyon ki'n ganny fer, i annan Manm ki zwe zot bann rikord reye parey labitid, sa sitar en lakord, de lakord. Koz lo bann sanson parey 'Pil lo li'.

Me selman Mr Speaker, si nou pe koz lo sanson annan sa lenfliyans lo zanfan nou konnen dan lepase ki'n arive bann sanson parey ki US, dan Gouvernman dan lepase ti annan bann sanson parey 'Flit karya' bann *statement* e pe malere ki'n ganny fer dan *rally*. parey apel zot oponan 'Zika'.

I annan zisteman fek annan en *rally* Praslin kot *Leader Lopozisyon* in fer bann *statement* ki pa egzanpler Mr Speaker. 'Si zot mor dousman pa nou lafot' 'si zot mor vit pa nou lafot osi' Mr Speaker. La zot vin rod 'pil lo li'.

E annefe Mr Speaker, *Leader Lopozisyon* dan *rally*

Praslin, resaman i ti debout e i ti i dir koumsa; ‘nou ki pou pil lo zot 2025!’. Selman la yer dan son entrevansyon i pe koz lo pil lo li pa egzanpler. Be ou osi montre legzanz, Mr Speaker!

Mr Speaker, ou konnen legzanz i enportan pou donnen, me selman mwan mon en pti pe sagren poudir ozordi i dan piblik e rapport *TRNUC* pou sorti byento, nou pou vvar ki mannyer sa pep in ganny pil lo la.

E parey mon'n dir legzanz i sorti kot nou. Nou bezwen montre respe. Nou bezwen donn legzanz nou bann zanfan. Parey nou bezwen respe bann lenstitisyon e respe bann dimoun ki osi par lao nou.

Sirtou sa dimoun ki Lepep Seselwa in met la. Parey en konparezon *I mean* Prezidan Ramkalawan i ganny elekte par Lepep Seselwa. E ler i fer *meeting* piblik pou zabitant vin eksprim zot konsern avek *MNA*, avek Prezidan e osi *MNA*.

Ou vvar poudir zot pa donn sa legzanz, zot mank respe, zot pa vin *meeting* piblik Mr Speaker. Selman ler louvertir bann proze, zot la pou zot koup riban. Premye devan se zot ki la pou koup riban. Selman *meeting* piblik pe ekout i annan en - i pa zis mank respe Prezidan sa, i en mank respe

pou zabitant zot distrik e i pa egzanpler pou nou bann zanfan lekol Mr Speaker. I pa egzanpler.

Mr Speaker, e i annan bokou defi dan nou sosyete ki nou Gouvernman in erite. E parey mon'n dir, i pa bann defi ki fek aparet dan nou pei la dan sa dernyen 2an edmi. Me in la pou en pe letan.

Me i annan en kantite keksoz ki nou kapab fer sirtou kot i konsern laprantisaz devlopman nou zanfan. E dayer en bon pe nou bann *MNAs* nou pe pran sa bann linisyativ. Parey mwan mon *believe* poudir ozordi nou merit moderniz nou sistenm ledikasyon ki deza pe komanse.

Annefe mwan mon *believe* poudir nou bezwen met lanfaz lo bann sistenm modern. Parey nou vvar si zot pe swiv, bann ki get nouvel. Zisteman avek sa linisyativ ki Minister Gouvernman Lokal ansanm avek *Foreign Affairs* in fer pou nou angaz bann Konsil Onorer.

E nou'n vvar poudir Grand Anse Praslin i linisyativ *DA*, mon menm avek diskisyon avek lekol, nou'n organize pou 2 lekol Grand Anse Praslin Primer lo kote Grand Anse e primer. Grans Anse Praslin Primer e osi segonder ganny

bann *interactive screen* ki ozordi tou zenn i avanse.

Zot kontan bann keksoz parey *tablet*, bann *gadget* modern. E sa nou ede, nou etabli dan 2 lekol dan Grand Anse Praslin, primer avek segonder ki ankouraz laprantisaz.

Nou pe ede pou anmenn laprantisaz lo en lot nivo. Akoz nou koman paran nou konnen ozordi poudir nou zanfan i vreman *believe* dan teknolozi.

I annan en keksoz ki'n ganny dir yer regardan rezulta skoler ozordi. *I mean* annefe in annan en dekalaz, en defayans en pti pe dan laprantisaz. E sa i kler.

Onorab Herminie in tous lo pa yer ler in mansyon zafer rezulta in desann en pe. In dir poudir vre ti annan pandan letan *COVID*, ti annan en pe sa dekalaz laprantisaz.

Nou tou nou konnen ki ti arive, marmay pa ti pe al lekol. Marmay ti kot lakour. Bokou marmay pa ti pe ganny akse avek *internet*. E mon apresye bann lekol ki'n pran bann linisyativ parey Beau Vallon ti etabli, ti *set up* en *app* pou ed bann marmay dan laprantisaz.

Me selman i pa fasil, paran pe travay, zanfan i kot lakaz tousel. Zot pa pe ganny sa *supervision*, zot pa pe al

lekol. E pou apepre lan in koumsa.

So, definitivman bann *teachers*, bann paran ti pe espekte ki pou annan en dekalaz, ki ti pou annan en pe dekalaz dan rezulta ki bann marmay i gannyen. Ti pou annan en desant lo bann *grades*.

E sa i normal akoz nou tou nou konnen poudir *how it was during the time* letan *COVID* kot marmay pa ti pe ganny sa swivi, sa *follow up* parey zot ti dan lakour. E pa parey ler zanfan i dan lakour ki ler zanfan i dan laklas pe *supervise* li. E sa i en keksoz ki'n osi ede.

Me selman sa ti lepase, la nou la ozordi. E mwan mon pe espekte e mon konnen poudir plis linisyativ pou ganny pran *going forward*, sirtou avek moderniz sistèm skoler, parey mon dir anmenn bann *interactive screen* dan lekol, met plis lanfaz lo teknolozi dan lekol pou ankouraz marmay.

E osi i enportan osi ki paran osi i aprann servi en pe sa bann teknolozi, pou servi sa bann servi *tablet*, telefòn as a *mean* pou ed marmay dan zot laprantisaz, ki olye ki zot zis lo *game* tou lazournen. *X-box*, bann *game online*. Ki osi i annan bann *apps* ki ou kapab *download* lo ou *tablet*, lo ou

telefonn ki ede dan laprantisaz zanfan.

Sa i en keksoz ki bann paran i kapab konsidere. E mon ankouraz mon zanfan osi pou fer sir ki lo zot telefonn, lo zot *tablet* i annan i annan *google classroom* ozordi.

I annan plizyer bann pti *app* kot bann marmay i kapab ganny, konmela tou bann liniversite, tou bann lenstitisyon skoler ou kapab konekte avek atraver *internet*. E ou ganny akse avek plizyer bann materyo edikatif, ki kapab ed zanfan dan zot laprantisaz.

Mr Speaker, mon konnen mon napa bokou letan me pou fini mon pran, profit sa lokazyon osi pou remersye bann paran ek bann *teacher*, sirtou pandan sa bann letan *COVID* kot ti ase difisil pou zot. Bokou fwa bann *teachers* osi ti en pe *tough*, zot pa ti dan laklas.

Zanfan pa ti lekol. Me zot ti fer zot, i annan ki'n fer zot mye pou al o dela pou gard sa kontak ek zot zanfan ki dan zot laklas. Swiv zot, fer sir zot pe fer zot leson, *call* paran si marmay pa *online* si marmay pa pe enterakte avek zot.

I annan en kantite ki bann *teachers* in fer dan lepase e bann paran osi dan laprantisaz zot zanfan. Menm nou'n fer fas avek bann letan difisil, keksoz

pe aranze, nou pe bouz devan, nou met lanfaz, koriz bann fot lepase, moderniz nou sistenm ledikasyon.

E mon pou osi profit sa lokazyon pou mon remersye osi Lekol Grand Anse Praslin Primer akoz lenformasyon ki mon'n gannyen se ki Grand Anse Praslin Primer i trwazyenm pli meyer lekol Sesel. E mon bezwen apresye bann *teachers*, *headteacher* pou sa bon travay ki zot pe fer avek nou zanfan.

E pou terminen Mr Speaker, ankor enn fwa mon profit sa lokazyon pou mwan swet tou zanfan en bonn fet lafet zanfan demen, anmiz byen. E parey mon'n dir pran konsiltasyon en pe, *advice* e bann Konsey ki paran i donnen e osi ki pe sorti dan sa deba dan sa 2 zour.

Avek sa de mon Mr Speaker mon dir ou mersi bokou.

(APPLAUSE)

MR DEPUTY SPEAKER

Mersi Onorab, ou'n zis lo letan. Prosen entervenan Manm elekte distrik Roche Caiman. Onorab Vidot.

HON AUDREY VIDOT

Mersi Mr Speaker. Bonzour Mr Speaker. Bonzour Manm Sekretarya, tou Manm Onorab, bann dimoun dan Galeri e tou dimoun ki a lekout. En bonzour spesyal pou zabitant Roche Caiman e byensir bann paran e bann lekol ki tonm dan distrik Roche Caiman.

Mr Speaker, avan mon komans mon lantervansyon mon le met lo rikord ki mon apresye ki lo mon kote latab nou napa okenn Manm ki'n deza debout Ankour, pou defann okenn droger, okenn trafiker drog, sa mon kapab felisit mon bann Manm lo sa kote.

E mon apresye lefe ki dan kanpanny eleksyon nou kandida prezidansyel osi, pa'n zanmen vini pou dir ki in annan konversasyon pou regard avek bann *dealers* ki annan pou fer avek drog. Akoz nou konnen sa i en size ki afekte bokou, bokou pa zis nou bann zenn me nou popilasyon an antye.

Mr Speaker, nou Lasanble pe lans en lapel avek tou paran pou angaz seryezman dan konversasyon avek zanfan konsernan zot konportman.

I kler devan pep Seselwa ki Lasanble Nasyonal apre sa deba yer e kontinyasyon ozordi, nou agree ki paran i bezwen pran zot responsabilite e

ranforsi zot langazman dan lavi sosyal e ledikasyon zot zanfan.

Nou Lasanble pe rekomande ki serten paran i resevwar sipor neseser pou ki zot kapab ranforsi zot responsabilite rol e langazman anver zot zanfan. Petet atraver bann programm *parenting* par sisyete civil e osi par bann Komite Paran dan lekol, par partaz bann bon pratik e aport sipor kanmarad pou zot donn legzanp zanfan pou annan plis sa linite, bon relasyon e konportman dan lekol.

Lasanble pe met lanfaz lo lenportans nou bann valer ki merit komans depi dan lakour, de-koul dan kominote e kontinyen dan lakour lekol pou nou bann etidyan lekol pratik sa bann bon valer moral partou kot zot ale e kre sa sisyete pli responsab ki nou tou nou ti pou swete vvar sa novo zenerasyon ki ava kontinyen swiv.

Me nou travay koman Manm Lasanble pa fini la Mr Speaker. Wi mon pou dakor ki nou bezwen osi donn legzanp e pa zis koze koman Manm Parlman e politisyen. Nou bezwen pe *walk the talk*.

E atraver ou Mr Speaker, mon ava dir avek mon koleg Onorab Woodcock ki i ava kapab konpran, ki ler mon dir

ki nou bezwen donn legzanp par montre respe pou nou paran e pa zour zot. Nou bezwen donn respe nou bann zanfan par sonny zot e donn zot sipor.

Nou bezwen osi montre sa legzanp koman bann Manm Parlman.

(Off-Mic)

MR DEPUTY SPEAKER

Bann Manm Lopozisyon ava reste trankil silvouple. Mersi.

HON AUDREY VIDOT

Pou nou kapab donn bann bon legzanp nou kominote. Pou zot kapab swiv nou byen. Nou osi bezwen pe regard nou stil lavi, asire ki nou pe donn bon legzanp nou zanfan e lezot ki pe pran nou koman bann *role model*.

Yer mon'n siport 2 kestyon lo papye lord Lasanble kot 2 Manm *Caucus LDS* Madanm, akoz zot in eksprim zot konsern ki reel ozordi kot i konsern krim dan nou pei. E ozordi i pa en leksepsyon pou mwan siport Mosyon en lot madanm *Caucus LDS*, Onorab Samynadin atraver son Mosyon.

Akoz parey bann Manm in fer resorti yer ki son Mosyon i annan son merit e i en

sityasyon reel ki bezwen ganny dil avek ozordi.

Alors ler nou tonm dakor lo en size ki pe tous dimoun, ki nou pe siport, nou pe demann pou siport lopinyon, lo laspe spirityel, pe enport ki zot lopinyon spirityel, ki zot lopinyon politik, ki zot kouler lapo, ki fanmir ki zot sorti. Nou le ki tou dimoun i konnen, i donn en koudmen e nou onnet e senser ler nou dir ki nou bezwen donn en koudmen pou kapab edik nou bann zanfan.

Sa i aplik anler depi dan tou sa 3 brans nou gouvernans. ki swa Zidisyer, ki swa Egzekitiv osi byen ki nou Lasanble Nasyonal. Akoz apre ekout serten Manm ki'n koze yer spesyalman dan kote *LDS*, mon bezwen demann mon lekor ki mannyer zot kapab anmenn serten Mosyon kot zot felisit Gouvernman pou fer tou byen, selman problem in an ta e in akimile. Dimoun pe ganny entimide pou anpes zot koze spesyalman paran.

An plis ler Minis i vin asize dan Lasanble, olye demann kestyon pou pres li pou li kapab delivre lo son *manifesto LDS*, langazman ki Prezidan i fer anonse ki swa dan nou Lasanble e an piblik e son bann Minis pou fer pli byen.

Non, zot *sugarcoat* Minis e riye ler nou lo sa kote latab nou dir e zot entimid nou, anpes nou, rod tou fason pou sey anpes nou rod lenformasyon pou ki Minis pa vin koz mansonz.

Zis parey yer Minis Fonseka ler ti donn lenpresyon ki napa pratik koripsyon dan son Gouvernman e selman i bliy net laplikasyon enn son Minis lo size *Travisory*.

Mr Speaker, dan *United Seychelles*, nou pou kontinyen travay pou pep Seselwa ki'n elekte nou e koz pou zot. E siport bann bon koz ki dan lentere parey sa Mosyon lafason ti ganny prezante ek son merit.

Parkont parey mon'n toultan dir dan sa Lasanble, *LDS* in ganny en manda pou fer pli byen. Si nou anvi amelyor e anrisir konteks laprantisaz e lantrennman dan nou skoler, mon a zwenn Onorab Sathya Naidu kot yer i ti fer resorti ki Minister Ledikasyon i merit regard dan bann benefis, ki nou bann ansenyan i gannyen.

Wi, e sa i merit komans atraver *long service allowance* ki nou lo sa kote latab nou'n komans dir depi ler Gouvernman in anonse, ki pa pou kontinyen donn *long service allowance*.

Minister Ledikasyon an plis i annan plis konsiltasyon. Bezwen annan plis konsiltasyon avek lekol. Pa zis enpoz zot, lo zot serten keksoz me valoriz zot pwennvi e zot kontribisyon.

Mon'n deza dir e mon pou dir ankor. *Personal and #social civil citizenship and career education (PSCCE)* i bezwen ganny trete avek son lenportans prey langaz, matematik, lasyans e listwar dan lekol.

Minister Ledikasyon i annan en dokiman ki date depi Zen 2017, ki gid zot pou zot kapab fer marse sa size dan lekol. Petet i en loportinite la pou zot kapab travay ansanm avek sa bann ansenyan ki pe pratik sa size osi zot bann partner kle; e revwar ki mannyer zot kapab ranforsi pou ki *PSCCE* dan lekol i sipoze kapab pe konplimant travay ki paran i bezwen komans fer depi kot lakour osi.

E la mon pe fer referans avek bann size tel koman valer moral, ledikasyon drwa responsabilite zanfan e paran, lasante reprodiktiv kot zanfan i kapab konpran e konn bann risk ki asosye avek lansentman anba laz, zot parti lekor pou anpeste ki i annan okenn form labi fizik e osi okenn form labi

verbal ki pase dan zot lanvironnman kot zot frekante.

E sa bann rekomandasyon ki Manm in fer resorti dan deba lo sa Mosyon, pou sirman asire ki nou bann etidyan i benefisyé maksimonm posib dan zot letid dan lekol avek sipor byensir priyrite langazman e komitman paran.

E pou konklir Mr Speaker, mon bezwen met lanfaz lo sa trwa pwen lo de size. Premye, kot nou pe dir nou ankouraz paran pou servi bann striktir ki egziste pou zot kapab reste konekte avek lekol.

Paran i merit pe kontinyelman angaz zot avek PTA ki zwe en gran rol, ki asiz lo Konsey Lekol vwar ki mannyer zot kapab apros zot *Chairman*, zot PTA dan zot lekol e osi organiz bann programm aktivite ki anmenn zot pli pre avek lekol. E byensir avek zot zanfan pou zot kapab avanse dan zot letid.

E dezyenm e dernyen pwen Mr Speaker, se byensir pou nou kapab dir mersi, mersi tou nou bann lekol. E la mon pou felisit tou bann lekol dan mon distrik Roche Caiman, Plaisance Primer avek Segonder, ki enkli son 2 lakres, Lakres Les Mamelles e byensir Lakres Plaisance e osi byen ki

lekol pou bann zanfan avek en abilite spesyal.

Akoz zot osi zot pa ganny eparnye dan bann sityasyon lo zot nivo ledikasyon. So, i enportan ki zot ganny sipor e resours ki bezwen atraver Minister Ledikasyon pou zot kapab konplet zot travay dan laprantisaz bann etidyan.

Nou bezwen osi reckonnet ki bann ansenyan i bezwen ganny tou sipor posib, pa zis atraver lenfastriktir, me osi sipor pou ki zot osi zot pa pas parey zanfan e ganny *bully* dan lekol.

Mr Speaker, mon terminen par dir lebra pa tonbe. Nou bezwen kontinyelman met lanfaz pou sipor nou bann paran, nou bann etidyan e osi nou bann ansenyan kot lekol; pour ki nou bann zanfan i ganny zot en ledikasyon ki pou permet zot vin bann pli bon sitwayen demen. Mersi Mr Speaker.

(APPLAUSE)

MR DEPUTY SPEAKER

Mersi Onorab. Mon le zis port atansyon bann Manm lo *Order 59* ki donn nou lalis en group dimoun e dir nou si nou le kestyonn zot kondwit nou bezwen fer li atraver en Mosyon.

E fodre nou evite servi Mosyon koman en laport deryer, pou atak serten dimoun ki mansyonnen dan sa *Order 59 (5)*. Nou fer li atraver en Mosyon, akoz i kapab annan sa tandans si nou pa kosyonn nou lekor lo ki sa *Order* i dir.

Onorab Woodcock ou annan en *point of order*.

HON WAVEL WOODCOCK

Zisteman Mr Speaker mon anvi *raise* en *point of order* anba *Order 59 (7) (d)* kot i konsern *imputing improper motives*. Mr Speaker i kler poudir Onorab Vidot pe sey *impute improper motive*, akoz i annan en *statement* ki Onorab Vidot in fer i dir “Onorab Woodcock i a konpran poudir nou pa zour nou paran”.

Mwan Mr Speaker, mwan mon en dimoun ki annan respe pou mon paran. Annefe toulstan mon an kontak avek mon paran e pou li vin dir, *insinuate* e fer sa bann kalite alegasyon koumsa mon pe demann li pou *retract* sa parol Mr Speaker. Akoz mwan mon pa'n ganny fer lo bal zonnyon Mr Speaker. Mersi bokou.

MR DEPUTY SPEAKER

Mersi Onorab. Wi in annan en lensidan kot Onorab Vidot in mansyonn non Onorab

Woodcock dan son prezantasyon.

Onorab *Leader Lopozisyon* ou napa naryen pou fer dan sa enn *point of order* ki'n leve, akoz sa i konsern Onorab Woodcock avek Onorab Vidot. So, mon pe donn Onorab Vidot laparol pou klersi son *statement*.

HON AUDREY VIDOT

Mr Speaker mersi pou donn mwan laparol. Mon pou adres ou Mr Speaker. Parey mon'n - mon pou resit parey mon'n dir pou konpran egzakteman poudir mon pa'n atak Onorab Woodcock personnelman.

Mon'n dir poudir atraver ou Mr Speaker, mon le dir avek Onorab Woodcock ki i pou dakor e i pou konpran, mon'n serv'i ‘konpran’, ler mon dir ki nou bezwen donn legzanp’.

Ler mon dir nou, e mon'n fer referans avek Manm Lasanble, nou. Mon pa'n mansyonn Onorab Woodcock, Onorab Henrie, Onorab Lemiel mon pa'n, mon'n dir ‘nou bezwen donn legzanp’. E mon'n kontinyen mon'n dir nou'n dir respe paran, e kot mon'n dir nou pa zoure. Mon'n mete nou kapab rod lo verbatim.

E mon repet ankor mon'n dir nou zanfan nou bezwen donn zot sipor, nou bezwen montre poudir nou pe sonny

zot, nou bezwen donn legzanp. 'Nou', sa i aplik pou nou tou Mr Speaker, i napa zis Onorab Woodcock ki mon'n mansyonn direkteman lo li, non. Mersi.

MR DEPUTY SPEAKER

Ou'n fer li pwen. Me konmsi granmoun i dir sitan keksoz dan zis de mo. So lekel ki pe ekoute, lekel ki pe enterpret, i regard e i tann keksoz dan serten fason. So, yer nou'n byen komanse annou kontiny lo menm lapant.

I reste nou ankor 3 Manm pou koze. Ou kapab sit lekel *point of order* ki ou pe *raise* Onorab Pillay.

HON SEBASTIEN PILLAY

Mon annan en *point of order* anba *Order 59* ki ou fek site.

MR DEPUTY SPEAKER

Wi.

HON SEBASTIEN PILLAY

Ok, mon vreman apresye ki ou'n sit sa *Order* pou bann Manm, pou ki tou Manm i konpran kot keksoz pe ale.

Me petet mon ti a kontan zis klarifye avek mwan. Ler Onorab Woodcock in dir ki i annan Manm dan sa Lasamble lo lot kote ki'n menm defann droger, sa ti *ok* sa? Sa ti *ok*. Konmsi koman Speaker, ler

Onorab Vidot in fer *statement* ki in fer, ou'n fek fer en *ruling* la, me li in fer son *statement* e i pe riy'e i konnen ki in dir, i konnen ki in dir.

Nou pa'n *challenge* li akoz yer ou'n dir poudir sa deba pe byen ale, e lamazorite Manm in koz byen lo la, so nou'n dir annou *stick* avek rezondet deryer Mosyon ki Onorab Samynadin in anmennen akoz nou pe koz pou zanfan, demen i *Children's Day*.

So, i annan en lenteré pou nou sey vin pozitiv lo sa size. Me selman mon ava enplor ou, *next time* ki Onorab Woodcock i fer sa kalite *statement* pou aret li, akoz i pa ti neseser pou li fer sa *statement* pou li dir Manm lo kote lopozisyón in defann droger dan sa Lasamble. Mersi.

MR DEPUTY SPEAKER

Mersi pou ou komanter Onorab. E mon ava dir ou poudir ou lenterpretasyon sa ki ou fek dir i konpletman mal, akoz mon ti pe koz pou tou lede kote latab. E mon'n dir get *Order 59 (5)* ki mansyonn en lalis. E sa i aplik pou tou dimoun ki ou *LDS*, ki ou *US* ki'n fer sa komanter pou ou get sa *Order*. Mersi.

Prosen entervenan lo lalis Onorab Monthy. Mersi.

HON PHILIP MONTHY

Mersi Mr Speaker. Bonzour Mr Speaker e bonzour tou Manm Onorab. Bonzour tou bann zabitan Perseverance ki dan Galeri e tou dimoun a lekout.

Mr Speaker, enn bann langazman *Commonwealth of Learning* ki en lorganizasyon enter gouvernmantal bann pei *Commonwealth* ki baze an *Vancouver Canada* ki baze *Canada*, i pou ogmant akse a en ledikasyon de kalite dan tou son bann pei Manm respektif.

E baze lo sa langazman, en demann ti ganny fer par Minis Ledikasyon Dr Justin Valentin avek sa lorganizasyon pou antreprann en letid pou revwar, e propoz en novo model lansennyman pou Sesel.

E sa rapor ki annan pou tit “*Towards a new model of schooling in Seychelles*” ti ganny pibliye an Novanm 2021 apre ki plizer o zofisyé dan Minister Ledikasyon e osi sorti dan lezot Minister e plizer akter kle dan ledikasyon ti'n ganny konsilte.

Parmi bann pwen for sistèm skoler Sesel - e la mon pe koz lo lekol piblik Mr Speaker - ki ti ganny souleve sete tre bon langazman Gouvernman e finansman adekwa par Leta dan ledikasyon piblik.

E parey nou konnen ozordi, napa okenn zanfan ki pe asiz dan en laklas avek en vant vid. E mon pou profite pou koriz en misapreansyon ki Onorab Aglae in vin fer dan Lasanble la bomaten, Mr Speaker atraver ou.

In dir ki zanfan nepli ganny asiste atraver *Dedicated Fund* pou *uniform* e pou okenn lasistans ki zot bezwen. Sa i fo e i pe *mislead* Lasanble, i pe *mislead* Lepep Seselwa.

(APPLAUSE)

HON PHILIP MONTHY

Akoz mwan mon fek sorti lo en *call* telefonn avek *headteacher* mon lekol Cascade, akoz mon konn byen, plizer fwa nou refer bann paran avek lekol. E in konfirmen ki sa i fo, etidyan i ankor pe ganny asiste si paran i vin rod sa lasistans avek lekol.

Si ou pa vin rode, evidaman i vedir ki ou pa bezwen sa lasistans. Me sa i ankor egziste.

Akse egal a ledikasyon pou bann fir e garson ti osi ganny fer resorti ki i le ka isi Sesel. E enn bann defayans dan sistèm skoler ki ti ganny mansyonnen, se move performans bann zelev dan serten size akademik par rapor a target ki Gouvernman in

etablir. Kot nou'n vwar resaman nivo rezilta ledikasyon i pa'n vreman sa enn ki nou ti pe espekte.

E en lot defayans sete lakantite etidyan ki pe kit lekol lo nivo segonder. E osi enn ki annan en lyen direk avek Mosyon ki nou pe debat lo la ozordi ki ti ganny idantifye koman en defayans sete, mank langazman paran dan ledikasyon zot zanfan.

Mr Speaker, in en lobligasyon pou mwan entervenir lo Mosyon Onorab Samynadin ozordi, pou le senp rezon ki koman en ansenyan par profesyon, e ki'n dan lansennyman e ledikasyon pou plizyer lannen. Mon annan leksperyans primer, segonder, pos- segonder e parey koze in dir ledikasyon tersyer osi. So mon'n dan tou nivo.

E parey koze i dir, enn fwa en *teacher* ou reste touzour en *teacher*. I donk neseser pou servi mon pozisyon koman en *leader* dan kominote, pou fer tou sa ki mon kapab pou ankouraz tou bann parti konsernen pou ankouraz zot.

E ede pou elev standar ledikasyon dan pei e fer ki nou ava vwar en amelyorasyon lo nivo produktivite, e fer ki nou a ptitapti kapab met plis Seselwa

dan lanplwa e ede redwir depandans lo travayer etranze.

Kot nou ava vwar en amelyorasyon lo nivo moral, akoz mon asire ki nou tou nou pou dakor ki si naryen pa ganny fer, sa tandans ki nou vwar pe arive depi plizyer lannen, Sesel pou tonm dan en dekadans moral e sa i pou en menas pou lavenir nou pep e nou zoli pei.

Leksperyans ki mon'n annan dan sa profesyon, i montre mwan ki menm si dan tou sityasyon in touzour annan serten leksepsyon, tel parey kot ou kapab annan serten zanfan ki sorti dan bann fanmir ki ou konsidere koman solid e stab, me ki kantmenm sa zanfan i annan problem latitud e montre en mank langazman anver zot letid.

Me Mr Speaker, mazorite bann ka disipliner anrezistre kot bann lekol, e mazorite bann ka kot zanfan pa pe montre okenn lentere anver zot letid, ou pou vwar ki sa bann zanfan i sorti dan bann fanmir kot i annan serten defayans sosyal.

E kot paran pa'n zanmen vwar sa nesesite pou met zot lipye kot lekol pou kapab swiv progre zot zanfan. Kot zot ti ava kapab ganny lenformasyon neseser lo konportman sa zanfan, kot zot sipor e

langazman ti a kapab fer en gran diferans e ed sa ansenyan pou mye delivre son leson.

Kot langazman paran ti ava kapab ede pou kre en pli bon lanvironnman laprantisaz dan laklas pou lezot zanfan ki anvi aprann, akoz problemm disiplin ti pou redwir konsiderableman.

Akoz apre tou Mr Speaker, pou ede disiplin en zanfan i pa zis responsabilite ansenyan, me paran osi i bezwen annan son responsabilite akoz finalman se son zanfan.

Ler paran i prezan dan ledikasyon son zanfan, i osi ede redres sa zanfan ki pe komans al dan en move direksyon e met li lo semen drwat avan ki sityasyon i deteryore; kot apre i vin pli difisil pou arive sanz sa sityasyon e se kominote e lasosyete ki soufer apre.

Mr Speaker, prezans paran dan laprantisaz zanfan i enn ki primordyal. E Onorab Samynadin koman en *teacher* par profesyon, i rekonnet sa, e se sa ki'n fer li anmenn en tel Mosyon dan sa Lasamble ozordi.

Ler nou pe get bann defi ki pei pe fer fas avek, labi sibstans, labi seksyel, vyolans, mank respe e lakourtwazi, i bann defayans ki malerezman in la dan nou sosyete pandan plizyer lannen. E ki si tousala

pa ganny adrese dan son totalite, sa pou zis kontinyen, me pou vin pli pir e sa pou detri nou sosyete.

Sa Mosyon i enportan akoz i pe demande ki nou atak tou sa bann defi kot son sour, avan ki i devlope e vin lo en lanpler ki pou fer li difisil pou trouv en solisyon. E lakle pou tou sa bann defayans sosyal e moral se ledikasyon.

Mr Speaker, pa tou zanfan ki pou annan en nivo akademik ki pou ekselan. Pa dan tou lakour ki pou annan en *university graduate*. Pa dan tou lakour ki pou annan avoka, enzenyer, pilot, dokter.

Me par kont i posib pou annan dan sak lakour bann zouvriye kalifye e bann sitwayen ki annan en lanvi pou lefe bomaten e travay dir, pou kapab depan lo zot prop lekor e pran ka avek zot fanmir; olye kit lekol avan ler e vin depan lo Gouvernman e lo sistem *welfare*.

I posib osi pou annan en pep ki annan bann valer moral e kot konportman nou bann sitwayen a enn ki egzanpler, e kre sa lanvironnman sen kot lazwa de viv a rennyen.

Sa i pa zis bann rev; ki petet annan a dir si nou vwar keksoz dan en fason realis sa pou enposib pou realize. Mwan

mon pou dir otreman e mon asire ki Onorab Samynadin atraver son Mosyon pou dir parey.

E sa i pou posib selman si tou paran, pe enport ou klas sosyal e ou nivo akademik, i santi li konsernen e angaze avek ledikasyon son zanfan e lavenir son zanfan.

Parey Onorab Cosgrow in fer resorti atraver ou Mr Speaker, ledikasyon i komans dan lakour. E mon pou antyerman dakor avek le li.

E mon pou dakor avek li osi kot politisyen i annan en rol enportan pou zwe. Politik sa Gouvernman ozordi i enn kot bann latitud vyolans, lensilt, viktimizasyon dan travay anver sa ki pa partaz menm lopinyon avek sa Gouvernman dizour pa egziste, e pa pou zanmen arive ankor.

Ozordi tou paran i annan son drwa pou viv libreman dan son pei, e vwar grandi son zanfan san okenn lafreyer.

Mr Speaker, nou tou nou konn plizyer ka kot paran pa'n forseman annan en nivo ledikasyon eleve e kot zot sityasyon finansyel pa'n osi enn ki eleve, me ki in touzour enkilke dan zot zanfan bann bon valer e kot ledikasyon zot zanfan in en priyorite pou zot.

Menm avek tre pe ki zot in annan.

Kot sak fwa ti annan en *open day* kot lekol, sa paran ti la. Kot sak fwa ti pou donn *report*, sa paran ti la. Ki nou'n vwar? Sa zanfan i grandi e vin en sitwayen egzanpler e i reisi dan son letid e sa i ede elev stati sosyal sa paran.

Kot an dot mo mon kapab dir se sa zanfan li menm ki'n ede tir son fanmir dan la mizer. En zanfan pa forseman bezwen sorti dan en fanmir ki ris pou li reisi dan son letid. E pou li devlope bann valer ki sosyete i espekte de li. I nesesit tou senpleman latansyon, langazman e gidans paran dan son devlopman.

E Mr Speaker an dizan sa, mon pou lans en lapel avek tou paran ki pe ekout nou ozordi pou silvouple annou annan en refleksyon profon lo lafason ki nou pe elve nou zanfan, e lo nou responsabilite anver zot ledikasyon.

E si nou vwar ki nou devret fer en sanzman, annou pa esper ler in tro tar pou nou fer li. E bann ki pe fer zot mye mon pou felisit zot pou sa.

Avan mon terminen, Mr Speaker, mon pou profite pou remersye Konsey Lafanmir distrik Cascade ki pe fer en travay remarkab atraver sa

programm *mentorship* ki zot in lanse. Kot serten zanfan pe ganny swiv e ganny bann gidans neseser pou ed zot dan zot letid e zot lavi an zeneral par bann *role models*.

E si atraver sa programm bann manm sa Konsey i arive fer en diferans dan lavi omwen en zanfan, i pou deza en gran sikse.

Avek sa detrwa mo Mr Speaker, mon pou aport tou mon sipor pou sa Mosyon, akoz nou tou nou devret santi nou konsernen pou lavenir nou zanfan e lavenir sa pei ki apel Sesel. Mersi Mr Speaker.

(APPLAUSE)

MR DEPUTY SPEAKER

Mersi Onorab Monthy. Mon pas laparol aprezan avek Onorab Pillay.

HON SEBASTIEN PILLAY

Mersi Mr Speaker. Bonzour tou dimoun ki a lekout. Bonzour tou koleg Onorab e byensir bonzour tou dimoun ki dan Galeri, ki pe vizit Lasanble Nasyonal ozordi.

Mr Speaker, depi yer mon'n ekout deba lo sa Mosyon. In en deba enteresan, in en deba ki'n anmenn bokou refleksyon lo lapar Manm lo tou lede kote latab.

Me kot nou kapab vwar en konsansis se ki tou dimoun i dakor ki langazman paran i en eleman kle dan developman e dan lepanouisman en zanfan akademikman, psikolozikman. Si ou le dan tou fason, tou faset son developman en zanfan, langazman paran i neseser.

E sa i baze lo letid, i baze lo leksperyans, i baze lo sa ki nou'n vwar, i baze lo sa ki pase dan lavi toulezour. E mon apresye ki loter Mosyon in anmenn sa Mosyon e lafason ki in prezant son Mosyon lo komansman.

Me selman i enportan osi ki nou onnet avek sa ki nou oule fer pou nou kapab ariv a en solisyon ki pou anmenn nou ver anmenn en sanzman vreman dan sa konteks ki nou pe koz ladan.

Mr Speaker, mon'n note avek bokou - mon'n soke si ou le ler mon ekout bokou bann entervansyon sirtou lo lot kote latab ki'n koz lo bann diferan faktor ki pe pase ki zot santi poudir pa annakor avek sa ki konplemant travay ki nou bezwen fer dan en sosyete.

Par egzanp mon'n not atraver ou Mr Speaker, Onorab William ki in dir i mekontan avek lafason ki serten keksoz pe ganny fer. Mon'n not an pasan Onorab Monthy ki'n koz lo si

paran pa vin rod sa led, zot pa pou gannyen.

Me selman Mr Speaker, sa ki mon fasinen avek, se ki ler nou anmenn Minis dan Lasanble pou kestyonn Minis, pou *challenge* Minis lo bann lapros ki i pe pran, zot prefere bat lanmen e siport tou sa ki Minis i dir san leksepsyon menm ler i pe dir en keksoz ki pa fer sans.

Par egzanp, en Minis i aksepte poudir en mankman *teachers* dan lekol i en keksoz normal. Ki mannyer ou kapab aksepte sa? Kot zanfan i reste *unattended* dan lekol e apre nou pou dir fer paran anmenn plis langazman. E nou defann sa ...

En Minis i aksepte poudir move rezulta zanfan, kan i ti ganny dir par Lasanble Nasyonal pandan deba lo son Bidze ki performans i riske pli ba akoz *COVID*. E i bezwen fer en fason pou li amenaz sa performans. I vwar sa koman en keksoz normal e ki la i pou al met nouveau plan lo plan, nouveau plan lo plan!

Mr Speaker, nou bezwen *être* realis e koz pou tou lede size. E mon pou sey anmenn en balans dan lafason ki mon prezant sa size.

Mon dakor antyerman avek loter Mosyon ki'n osi en

ansenyan. E ki pandan mon karyer mon'n ganny loportinite pou osi travay avek li koman enn son *lecturer*. E mon tre apresye ki in nobou akonplir sa ki'n akonplir dan son lavi ozordi, parey bokou mon bann etidyan in akonpli bokou keksoz.

I annan ozordi ki dokter, i annan ozordi ki solda. I annan ozordi pe fer plizyer karyer dan Sesel. Be i annan osi pa'n *make it*. I annan osi ki ler mon pase mon vwar zot lo *ghetto* e mon dezapwente ler mon vwar sa.

Akoz mon kalkil zefor ki mwan mon ti mete pou fer zot kapab ariv lo sa nivo ki zot sipoze arrive, e mon pa'n kapab fer li, mon pa'n kapab akonpli sa ki mon ti *set out* pou akonpli.

E rezon mon pa'n kapab fer sa se akoz sanmenm sa bann - e la mon pou dir sa fran. Sanmenm sa bann ki dan bokou ka ler mon ti bezwen langazman paran, mon pa ti gannyen.

E koman en ansenyan e bann ki la anndan i konn tre byen poudir souvandfwa koman en ansenyan, sa enn ki ou le zwenn ek son paran ou pa ganny sans vwar li. Zour ou pou vwar son paran se ler i pou ariv en *issue* kot en *teacher* i disiplin son zanfan oubyen in ariv en problem, la pou vwar son

paran kot i vini, i pare pou li zoure e fer bann alterkasyon kot lekol. Sa i en premye fason keksoz i marse.

Dezyenm fason keksoz, i annan pran ki fer tou, ki sey tou, i donn son zanfan tou. I donn li sa pli zoli mont, i donn li sa pli zoli soulye. I donn li sa pli zoli keksoz e i fer sa zanfan vin *entitled*. Sa zanfan i gate. E i vin dan lakour lekol avek e lekspektasyon ki demen i pou fini lekol, son paran pou siport li *no matter what*.

Alors i pa asize pou li etidye dan laklas, i pa swiv sa. E souvandfwa ou vwar se li ki en *ringleader* parmi bann ki pe fer dezord akoz li i pa santi lenportans pou li aprann. Sa osi i en realite.

Ou annan en trwazyenm realite Mr Speaker, bann paran ki anvi met sa zefor, ki pa kapab akoz zot napa sa mwayen. E zot prefere pou pa vin lekol *out of lakanmizri*. Akoz li i pa kapab donn son zanfan en *calculator*, i pa kapab donn son zanfan sa *pencil case*, i pa kapab don son zanfan sa bolpenn, sa sak.

So, i annan diferan fason ki nou regard sa problem e ki mannyer lasosyete i bezwen adres sa problem. E ler ou get sa eleman ki la, enn bann faktor kle ki nou bezwen regarde se ki an deor lekol kwa ki pe pase?

E la Mr Speaker mon bezwen dir avek Onorab Woodcock, ou ti annan en loportinite, akoz Grand Anse Praslin i enn bann lekol kot mwan mon'n travay e mon konnen kot i enn bann lekol ki'n eksperyans sa bann difikilte. Ou ti annan en loportinite.

Dan plas vin koz lo pilil ki bann solda ti gannyen, atraver ou Mr Speaker, ou ti'n kapab demann Minis Ferrari lekel ki ti donn pilil bann solda zour koudeta. Ou ti ava fer li senp.

Nou bezwen dir keksoz fran parey i bezwen ganny dir dan sa Lasamble. Akoz fodre nou arete fer bann keksoz ki nou zis koze *for the sake of koze*.

Dezyenmman, Mr Speaker mon bezwen *remind* Onorab Monthy poudir i annan en rezon akoz paran pe le vin kot lekol pou *Dedicated Fund*. Zot pa vin kot lekol akoz lafason ki ou bann Minis i koze, lafason ki son bann *leaders* i koze.

I dir ek zot koumsa poudir lasistans pa vin rode oubyen pa, i kre en kondisyon ki si ou al rod en lasistans i en lakanmizri. E ki nou pe vwar dan bann *meeting* ki pe ganny fer tou le swar?

E zour an zour sak *meeting* ki monte problem

welfare, problemm lasistans, problemm led problemm isi, problemm laba. Me selman, problemm ledikasyon. Me selman ler bann Minis i vin dan Lasanble lekel premye pou defann? Onorab Georges premye pou defann, atraver ou Mr Speaker. Onorab Arissol pare pou defann, Onorab Naidu ki mon'n apresye sa pasyon ki in koz avek yer, premye pou defann.

Be annou aret fer parey bann Lasanble lepase. Nou annan en problemm wi avek ledikasyon. I vre nou annan en problemm. Be si nou Minis i fer parey bann Minis lepase e nou, nou defann li parey ti ganny fer dan lepase, napa naryen ki pou sanze. Nou pou retourn menm parey.

Si nou pou anmenn Mosyon pou dir tou keksoz i byen dan Gouvernman, me selman nou admet poudir lekol in pli mal fer. Be i bezwen annan en rezon lekol in pli mal fer. Ki Minister ledikasyon pe fer pou sa?

Mr Speaker, mwan mon admet, mon admet ki poudir nou'n devlop sistèm ledikasyon, be nou pa'n arive anmenn li pli lwen. Me ozordi i annan en novo Gouvernman e i son rol, son travay, son

responsabilite pou anmenn li pli devan.

Nou pa kapab *dwell* lo lepase ti koumsa, ti koumsa. I pa pou ed nou akoz sa bann zanfan ki dan lekol ozordi pou al sit legzanmen demen e si zot *fail* sa pou lo nou konfyans.

E mon konpran ler Onorab Naidu i dir nou son konsyans, i konsernen avek lafason, atraver ou Mr Speaker ki i pou anmenn en zanfan pou li grandi. I *part of planning* en fanmir. E i byen ki ou pe mazin koumsa.

Me ozordi nou annan bokou koup ki pa mazinen pou li *plan* en fanmir. Ou vwar en manman pase enn dan lebra, enn i pe anmennen, enn en pti pe pli gran parey bann peron. *Sorry* pou koz koumsa. Me *that's the reality*.

Me si realite i koumsa e nou bezwen adres li, annou pa adres li dan *denial*, annou pa adres li par vin *defensive* ler nou dir i annan en problemm nou taye pou nou defann.

Annou dir poudir be *ok* ou Minis pou Ledikasyon, ki ou pe fer pou *improve* langazman paran? Aret dir nou ou pe fer plan. I fer 2an edmi ki sa Minis pe fer plan. So, kan ki i pou aret fer plan?

Dezyenmman, nou le adres problemm avek paran.

Eski Departman Servis Sosyal ki ti vin la anndan pe angaze li pou dil avek bann sityasyon kot zanfan pe rankontre difikilte.

Mr Speaker mwan mon annan en legzanz tipik e personnelman mwan mon'n pas atraver sa. Mon manman ti mor mon annan laz 12an. E li ki ti *main* dimoun ki ti met disiplin e kontrol dan lafanmir. Be mon'n pas atraver sistem lekol, mon'n ganny problemm dan lekol wi, be mon'n nobou sorti dan lekol.

Akoz ti depan lo mwan osi *as well*. E sa i lot laspe sa problemm. Si sa zanfan li menm li i pa oule angaz li pou li devlope, malgre i kapab annan son talan, i pa pou avanse pli devan.

Mon asire souvandfwa nou vini nou pe *drive* la, nou demann nou lekor ki sa bann zanfan lekol pe fer dan niform kan lekol in fini komanse. Be si mon pou anmenn Minis dan Lasanble pou demann li kestyon lo ki i pe fer, zot pou defann Minis ler mon pou *challenge* li pou dir be ou pa pe fer ase.

Kestyon i pa *about* politik, kestyon i *about* si sa Gouvernman i kapab delivre. E lessansyel ozordi se ki si sa *delivery* i anmenn en sanzman

dan lespri sa bann dimoun ki pa pe korpere avek sistenm?

E wi i en realite, i en realite poudir politik lepase in anmenn nou la ozordi. Ti annan en lepok ou pa pou kapab pas anba en nouveau *bus shelter* ki pa'n ekrir SNP lo la. Be i en realite, i en fe.

I en fe ki sak *meeting* politik, *leader* politik sa letan Prezidan Larepublik ti debout dan son *pick-up* deryer, ti menm koz lo Mrs Touni ki ti Mrs Twomey. I en fe. Konpran? Zot komans mangonnen laba, be i en fe.

Mwan mon pa mangonnen ler zot nonm mon lepase, mon pa sot anler, mon pa konplent mon pa plennyen dan Lasanble. Akoz mwan mon pran sa ki pou mwan, mon met lo mon ledo e mon mars avek.

MR DEPUTY SPEAKER

Be mindful of time Onorab. Mersi.

HON SEBASTIEN PILLAY

Mr Speaker, mwan mon anvi donn sipor sa Mosyon ki Onorab Samynadin i anmennen. Pa zis donn li sipor an labous dan Lasanble Nasyonal, me an aksyon ki mon pou pran dorenavan avek serten size ki konsern Minister Ledikasyon dan sa Lasanble.

E mon ti ava envit li pou zwenn avek mwan pou nou kapab anmenn sa vre sanzman ki nou le vwar, dan lafason ki konteks ledikasyon i evolye pou reponn a en Sesel ki pe vin pli modern.

E nou bezwen osi *être* realis pou konpran ki mannyer nou, nou annan en loportinite ozordi dan konteks kot nou pei i trouv son lekor pou anmenn en vre lepanouisman dan devlopman lazenes.

Me si nou kontinyen fer parey in ganny fer dan lepase, nou pou bezwen esper lot Gouvernman ankor pou vin fer li.

E mwan mon konvenki Mr Speaker, mon konvenki, mon konvenki ki Onorab Loizeau pa pou la byensir, akoz bann dimoun Bel Air pou met li deor, atraver ou Mr Speaker.

Me selman mon konvenki poudir si nou le fer ki paran i vin pli angaze avek sa ki zot zanfan pe fer, avek lafason ki nou le *improve* konteks ledikasyon, fodre nou koz en langaz en pe pli fran e fodre nou pare pou pran bann desizyon ki pli *bold*. E se sa ki enportan pou nou dan sa konteks kot nou pe ale.

An konklizyon Mr Speaker. Nou lo sa kote latab i kler ki lafason ki nou'n koze

nou pe siport Mosyon. Me parey tou dimoun, nou annan nou lopinyon lo lafason ki serten keksoz i ganny fer. Nou santi ki poudir i pa responsab ozordi dan nou pei pou sanz prosedir *part rental* e fer en paran monte desann kan i ti kapab pe pas sa letan avek son zanfan.

Nou santi poudir i pa responsab ler ou sanz prosedir welfare pou fer paran monte desann kan i ti kapab pe pas sa letan pou ed sa zanfan.

Se pour sa rezon ki nou e dir bann konteks sosyal i annan en fakter enportan pou zwe lo lafason ki paran i *engage*, *involve* zot lekor dan laprantisaz e dan lekol zot zanfan.

Dezyenmman, nou santi poudir i pa responsab ler *Public Service Bureau* i dir ek bann *teachers* poudir i pa pe aksepte nouveau *scheme of service*, e i dir sa lo rikord dan sa Lasamble. Mon annan *verbatim*. E Minis i koz dan en *meeting*, i dir zot pou koz lo *improvement of scheme of service* pou *teachers*. I pa responsab. I pa responsab ler bann lekol napa ase *teachers* pou Minis fer en *statement* poudir sa i normal. Zot a travay pou rod en lot fason.

Ou bezwen, dan landrwa, dan en konteks kot ou le fer

lentervansyon edikasyonnel ou bezwen annan *teachers contact time* pou kapab ed zanfan *improve*.

Alors Mr Speaker, lefe i reste ki *mover* pou prezant sa Mosyon e sa Mosyon pou al kot Legzekitiv. En Mosyon i pa *binding*. Me mon ti ava swete ki sa i enn bann Mosyon ki Lasanble Nasyonal i kontinyen fer en swivi lo la, pou vvar ki mannyer nou kapab *gage* e *assess* sa *level of parental engagement*.

E pou kapab *actually* anmenn en vre sanzman dan lafason ki nou vvar konteks ledikasyon pe bouze, akoz pou bokou nou, nou pa vvar li pe sanz pour le meyer. Mersi Mr Speaker.

(APPLAUSE)

MR DEPUTY SPEAKER

Mersi Onorab. Nou ava envit dernyen entervenan ki lo lalis Onorab Arissol.

HON SANDY ARISSOL

Mersi Mr Speaker. Bonzour Mr Speaker. Bonzour tou Manm Lasanble Nasyonal. Bonzour tou bann dimoun Perseverance, espesyalman Anette Cecile Mr Speaker. Mr Speaker mon ti a kontan fini lo sa pwen ki Onorab Pillay in mansyonnen

an relasyon avek Minis Ledikasyon, anvi ki Mosyon i baze lo ledikasyon.

Mwan sa ki mon konpran Minis ti dir se ki, dan ledikasyon ansennyan i vini, ansennyan i ale; dan ledikasyon lannen vini, lannen ale i annan en mankman ansennyan. E i pou toulstan koumsa, nou pa pou zanmen kapab annan en ansennyan pour sak etidyan, sa ki mon ti konpran.

Ler mwan mon ti pe lekol dan bann lannen '80, Lekol *Saint John Bosco* avek *Sister Jude Burke* koman *headteacher*, ti annan en mankman ansenyan. Ti annan moman letan kot mwan mon ti asize dan laklas ek mon bann koleg, ti napa ansennyan. Sa pa ti fer mwan al fer koudeta. Non!

Mon ti asize, mon ti *study* mon lesson. E ler mon'n travay dan ledikasyon koman en *staff* Minister Ledikasyon, ti napa ansennyan. Sa pa ti fer bann zanfan sove, pou al met bonm dan sak vakwa Radyo Sesel. Non!

Zot ti asize zot ti fer zot lesson. E mon a plizyer repriz mon'n al *supervise* plizyer laklas ki ti annan en mankman ansennyan. Anba vye ladministrasyon.

La i annan en ladministrasyon ki'n vini i annan en mankman ansennyan, zour sa ladministrasyon i sorti pour annan en lot ladministrasyon, i pou annan en mankman ansennyan ankor Mr Speaker. Ansennyan dan lemonn antye i annan en mankman.

Se pour sa rezon mon kontinyen dir, US pa kapab vin donn nou leson zot. Zot napa leson pour donn *LDS* zot, nou, nou annan en manda 5an pour nou travay.

(APPLAUSE)

HON SANDY ARISSOL

Nou ava delivre nou manda 5an, e Lepep Seselwa pour re-elekte nou ankor 5an, pou nou kontiny sa travay ki nou pe fer.

(APPLAUSE)

HON SANDY ARISSOL

Se pour sa rezon ozordi dan tou bann *meeting* piblik, dimoun pe desann an gran nonm pe eksplik zot ka, pe dir zot problemm, zot pe asiste *meeting* menm! Si US zot refize partisipe. Sa ki enteresan, dan zot distrik zot refize partisipe, dimoun i vini avek kapatya fri, i donn nou Prezidan.

(APPLAUSE)

HON SANDY ARISSOL

Akoz? Zot *happy* avek lafason ladministrasyon pe travay Mr Speaker.

Letan US i vini i dir ek nou poudir nou bann sanson "pil lo li" in fer zanfan vin en pe fou, donn zanfan move legzanp, zanfan pa kapab *study*. Be US i blyie ti annan en koudeta ki ti ganny fer par zot Gouvernman?

Ler koudeta ti fer, pa'n fer bann zanfan fou sa? Pa'n ed bann zanfan pour zot pa konsantre dan laklas? Letan zot ti met bonm en pe partou, partou la ki mannyer in fer bann zanfan efreye? In fer zot pa kapab konsantre fer zot leson.

Letan zot fanmir, zot papa, zot frer, zot ser ti disparet perdi, al reste an egzil. Manman ti separe ek son zanfan, eski sa pa'n ede dan sa ki zot pe dir ek nou la? Zis sanson "pil lo li" ki'n ede ozordi pour fer bann zanfan, swadizan pa aprann?

Mr Speaker, letan dan enn zot bann *rally* dan zot bann kongre, zot sef i monte i dir sa ki bar zot, sa ki pa kontan, pou ganny vwar anba en rigol anba en pon!

Be ki kalite mesaz zot pe anvoy ek lazernes Seselwa? Poudir si ou pa kontan en

system, ou fanmir pour vwar ou anba en pon, dan en rigol? Sa ki zot pe enkilke dan lespri nou zanfan. Apre zot vin donn nou leson?

Letan enn zot santer i monte i dir avek Mr Speaker poudir toulstan i pez bouton Onorab Pillay, i tenny son mikro. Akoz i pa pran sa ledwa ki i tenny sa mikro la i met laba? I dir tou kot pou mete Mr Speaker. Eski sa leson ki zot donn nou zenn, apre zot vin donn nou leson dan nou Lasanble Nasyonal, sa parti minoriter la?

Mr Speaker mon redir ankor, zot napa okenn leson pou donn personn. Letan zot vini zot dir ek nou poudir *Dedicated Fund* in aret donnen. Non, pa pe aret donnen *Dedicated Fund*, i ankor egziste li.

Letan en Manm Onorab i dir poudir paran pe rod sipor, kalite sipor paran pe rode ozordi dan ledikasyon. Lekol i pour nanryen Sesel, goute i pour nanryen, dezennen i pour nanryen, bis ale, retour pou pran nou zanfan i pour nanryen menm.

Manrmay i ganny *internet* kot lekol pour nanryen menm, si ou dan *Dedicated Fund* ou ganny en liniform, ou ganny en sak, i donnen pour nanryen si

ou vin devan ou fer konnen ou dan problem.

Zot i annan paran ki bezwen lasistans ankor? Mon fer en lapel ankor ozordi, Minis Ledikasyon ti dir ek nou, okenn paran ki santi i bezwen enn pti lasistans silvouple pa al kot bann MNAs, pa al kot DA, pa al kot vwazen, vin devan fer lekol konnen ou ava ganny a..sis..te! La mon redir ankor pour bann dimoun konnen.

Mr Speaker mon'n tann koz lo manifesto, ki Onorab Kelly in fer son lentrodiksyon avek. Wi! dan nou manifesto. Be dan nou manifesto Onorab Kelly in osi fer mansyon en verse dan Labib. Onorab Uranie pa'n koz lo la sa li.

Me in kontan pour koz lo manifesto. Be ledikasyon an zeneral, Mr Speaker, parey mon'n ganny dir ledikasyon i komans dan lakour! Dan Lakour! Se nou paran ki montre nou sawwarfer, nou paran ki montre nou sawwar viv, aprann dir bonzour, mersi, silvouple, pardon. Sa bann sawwariv.

Parey Onorab Sathya ti dir ek nou, Zapon letan zot zanfan i rantre lekol zot swazir 2an, oubyen 3an pour montre zot zanfan bann pti sawwarfer. Zis parey letan nou bann etidyan i sorti al liniversite dan en lot pei. Zot aprann kiltir sa

pei avan, zot aprann koz son langaz, zot aprann konnen ki mannyer bann dimoun i viv laba.

Be kekfwa sa osi i en fason ki nou devret fer. Parske Sesel ou a krwar poudir nou paran en lepok i ti krwar poudir se responsabilite ansennyan pour elve nou zanfan. Non! Be i komans dan lakour. Si nou enkilke sa dan nou zanfan dan lakour, sa pou fer ki nou akonpanny li prezan kot lekol. Nou akonpanny li.

Parey Onorab Monthy in dir, nou al vizit, get son *report*, konnen lekel son miss ki lekol avek. Ki ou'n sorti dan dezyenm, ou'n mont dan trwazyenm. Lekel ou mis? Se Mis Tania Isaac dadi. Li ki fer mwan kalkil. Se Mis Alexandria Faure dadi, li ki fer mwan Kreol. Sa i montre poudir, ou konnen lekel sa mis ki pe edik ou zanfan.

Lekel bann zanfan ki ou lekol avek? Konbyen zanfan ou annan dan laklas? Ou zanfan i manz *school meal* kot lekol, ki ti kwi ozordi? Ki'n anmennen ozordi? Ou ti manze ozordi? Ti bon manze? At least ou zanfan i annan sa enteraksyon.

Parey Onorab Lemiel ti donn nou en bon legzanp. Pa rod 1erdtan ou, pa rod 30minit, 5 minit ou donn ou zanfan.

Gete ki in fer, ki mannyer in pas son lazournen.

Sa ti en bon *speech* ki Onorab Lemiel ti fer, ki mon ti apresye. Parske in donn nou bann legzanp konkret an relasyon avek ki mannyer nou kapab pas en pe letan avek nou zanfan.

Be Mr - wi nou kapab demann nou zanfan osi si goute US ti pli bon avek sa enn ki nou pe gannyen ozordi? E pa blyie US ti donn en pe, e i ti refize donn sa lot pe. E tou son bann goute li ti mark US lo la. Ok ti annan en *sticker* lo la.

Me tousala i bann komunikasyon ki nou kapab fer avek nou zanfan, pou nou asire ki ledikasyon pe fer. Sa ki Mosyon pe demande. Pe demann bann paran, pour nou vin devan, ed nou zanfan, donn li sipor, ed sa mis pour ki son laprantisaz i bouz de lavan.

Nou osi nou ava kontan ler nou zanfan in fer sitan byen dan lasosyete, zis parey Onorab Pillay in dir ozordi i *happy*, ler vvar plizyer son bann etidyan parey nou, zot in *flourish* dan lasosyete, zot in vin bann dimoun dan lasosyete, ki pe kontribye dan sa pei.

Be selman i enportan, pour nou kontinyen letan nou vvar zot pe - nou bann etidyan pe fer byen, pour nou ankouraz

zot pour zot travay pli byen, travay pli dir. Se parski la kot ou kapab ganny en *long service award*, ganny bann rekompans, ganny trezyenm mwan saler.

Parske nou pe ankouraz en kiltir travay dir. Pa en kiltir kale, zis vini asize e ekspekte ganny tou benefis ki vin avek, non! Se bann kiltir travay dir. Mon kontan letan Onorab Audrey Vidot in vini in dir avek nou poudir in donn nou lesion an relasyon avek, i pa'n al defann personn Ankour.

Mon dakor avek sa mwan, mon pour siport li mwan Mr Speaker. Parske ler mon get lo zot kote laba napa enn zot ki avoka lot kote. *Unless* Onorab Audrey li ti anvi nou pret li en rob, i ava al defann en son dimoun. Napa personn lot kote ki avoka. Mon krwar in fer en bon *statement* an relasyon avek sa.

I enportan pou nou kontinyen ankouraz nou bann zanfan. E la mon anvi ozordi, avan ki demen i le 1 Zen. E mwan mon annan zanfan, e tou bann zanfan Bel Ombre, tou bann zanfan Sesel, mon anvi swet zot bonn fet demen. Anmiz byen e profite aprann byen osi.

Mr Speaker, letan nou lo ledikasyon, i annan osi bann ansennyan ki fer travay avek nou zanfan, ki nou'n tann koz

lo la plizyer fwa. Mon anvi felisit osi bann ansennyan ki pas letan ek nou zanfan, ki donn zot lankourazman.

(APPLAUSE)

HON SANDY ARISSOL

Ki vin en paran pour nou zanfan letan nou, nou pe fer en lot bout travay. Apard bann ansennyan nou annan osi bann *non-teaching staff*, bann teknisyen, bann *librarian*, bann *staff* kot lekol, ki pa neseserman bann ansenyan, be ki osi zet en koudey lo nou zanfan, *supervise*, organiz zot ed zot pour zot kopi zot lesion, letan napa en mis. Mon krwar sa i enportan.

Me letan nou pe koz lo paran ankouraz zanfan, nou bezwen osi aksepte Mr Speaker, nou annan plizyer paran ki responsab, ki pe ankouraz son zanfan dan sa travay, nou bezwen osi felisit li. Annou pa *single* zis bann ptigin ki pa pe fer sa pour nou blanm tou.

Letan Onorab Pillay in dir ek nou poudir ozordi i annan bann manman ki per fer zanfan parey peron. Nou bezwen mazinen, si ozordi Onorab Pillay pe koz koumsa bann manman pe fer zanfan parey peron, se Gouvernman US ki ti ankouraz bann manman pour

fer zanfan parey peron. Parske kriter pour ganny lakaz Sesel fodre ou annan 4 zanfan, 3 zanfan.

Ler ou ti pe travay dir, kantmenm ou en *single*, ou en zomt tousel, en fanm tousel oubyen 2 ou, pa ti gannyen lakaz Sesel. Fodre ou annan 4 zanfan, konbyen zanfan ou annan? Konbyen ou annan? Non, fodre ou fer ankor, oubyen kontribye ankor pour ou gannyen. Se sa ki'n arrive.

Nou, nou pe kree en kiltir, leve travay, parey Onorab Sathya in dir, planifye ou lakour, planifye ou zanfan, pour ki ou kapab annan en bon lavenir. Ou pa vin depa lo *welfare*, ou pa vin depa lo personn, ou kapab batir pour ou pei. Pour ki ou zanfan, atraver Mosyon ki'n ganny prezante par Onorab Kelly, i a gannyen sa sipor neseser pour li kapab delivre kot lekol pour li vin sa bon sitwayen ki Onorab Pillay in koz lo la, ki nou byen bezwen ozordi.

Zisteman pour nou ganny plis ansennyan ki nou'n tann konplent lo la, pour nou kapab osi *improve* nou nivo ledikasyon, anmenn li lo nivo teknolozi. Be selman pa blyie, letan Onorab Uranie in koz lo teknolozi, bann etidyan etranze sa pa fer nou zanfan vin move.

Sa pa anpes nou *study* sa. Ler mwan mon ti lekol ti annan bann *teacher*, ansennyan etranze Mr Kouï, Mr Bah, madanm Dona. Tousala ti la koman bann *teacher* etranze, me sa pa ti fer mwan vin fou, pa ti fer mwan al fer koudeta, non!

Mon ti ekout zot kantmenm zot ti bann etidyan etranze. Mon ti avans devan pour mwan paran fyer kot mon'n arive ozordi. Teknolozi osi i mars parey. Ler mwan mon ti lekol ti napa teknolozi, me nou ti annan nou tablo, avek nou lakre blan, enkli bann kaye ek bann liv.

Sa osi ti ed nou avans de lavan. Sa ki ou annan ozordi, se sa ki ou servi. Me le bi se, ou bezwen annan en vizyon, kwa ki ou anvi fer dan ou lavi. Se sa ki nou anvi pour nou bann zanfan Sesel Mr Speaker, e se sa lo kote latab ki nou, nou krwar ladan.

E mon ti a kontan felisit Onorab Kelly pour en Mosyon ekselan a sa moman apropriye. E demen lafet zanfan mon krwar in tonm egzakteman byen, pour nou kapab donn ou *full* sipor, pour nou sipor tou paran, tou zanfan ek tou ansennyan, ki pe fer en travay ekselan pour nou pei.

Mon ava termin la Mr Speaker. Mersi bokou.

(APPLAUSE)

MR DEPUTY SPEAKER

Mersi Onorab Arissol. Donk sa in anmenn nou lafen tou bann entervenan avan ki nou donn *right of reply*. I annan Manm ki'n demande pour entervenir si ti annan letan. Me depi yer avan nou'n, nou ale mon ti dir poudir nou pa pou azout lo lalis, zot ti'n merit fer ler pwen *then*.

So mon pour stick avek sa desizyon. Alor mon pou envit Onorab Kelly Samynadin pou fer ou *right of reply*. Silvouple. Mersi.

HON KELLY SAMYNADIN

Mersi Mr Speaker. Mon a dir bonzour tou dimoun ki a lekout. Tou mon bann koleg Onorab e tou dimoun ki, zabitan Perseverance ki dan Galeri.

Mr Speaker, avan mon fer mon konklizyon mon oule salye zefor ki Minister Ledikasyon pe fer, avek bi pour amelyor konteks lansennyman laprantisaz dan nou bann lenstitisyon skoler.

Wi i annan bokou defi, me nou bezwen rekonnet ki bokou pe ganny fer. Programm *breakfast* e goute pe byen progrese, Polisi lo ledikasyon

enklisiv in ganny revwar e i pe ganny met anmars.

Bann ansennyan pe ganny plis lankadreman an term lansennyman *special needs* e zot lavwa pe pli byen ganny ekoute atraver bann platform ki'n ganny kree pou anrisir komunikasyon ant lekol ek legzekitiv Minister Ledikasyon. Lalis i long, me mon pou aret la.

Mr Speaker mon ti a kontan remersi tou mon bann koleg Onorab lo tou lede kote latab, ki'n partisip dan sa deba lo sa Mosyon. E tou bann paran e partner ledikasyon ki'n fer li zot devwar, pour ekoute ki nou koman bann reprezantan Lepep nou annan pour kontribye e ki osi ganny met an pratik.

Defen Prezidan Nelson Mandela ti dir, "*Education is the most powerful weapon which you can use to change the world*". Be ki mannyer nou pou kapab arive etablir sa? Mon'n not bann rekomandasyon tre konstriktiv ki mon bann koleg Onorab in anmenn devan; e ki mon asire tou bann partner dan ledikasyon ki enkli bann zanfan, paran, bann lenstitisyon skoler e lasosyete an zeneral i kapab pran sa ki aplik pour li e met an pratik.

Premyerman pour Gouvernman, sosyete civil,

bann antite enfluyansyel e bann politisyen, angaz zot dan provizyon plis sipor pour bann paran ki dan difikilte. Pour sa 3 brans Gouvernman, Legzekitiv, Zidisyer e Parlman, donn pli bon legzanp pour bann kominote ki nou reprezante.

Pour Minister Ledikasyon revwar plas e rezondet programm sispansyon dan konteks ledikasyon aktyel, fer plis provizyon bann profesyonnel pour kapab ankadre pli byen bann ansenyen, e etidyan dan konteks pastoral.

Ki plis resers dan konteks ledikasyon e sosyal i ganny fer pour kapab etablir bann novo mezir lansennyman laprantisaz, ensi ki bann faktor ki afekte konportman zanfan.

Organiz plis aktivite pour ankouraz e amelyor lantant ant paran, zanfan e lekol.

Adres sityasyon *bullying*, mankman resours e mendev dan lenstitisyon skoler, donn plis sipor bann *school wardens* e bann drayver bis an sa ki konsern move konportman bann etidyan dan bis.

Fer provizyon dan *curriculum PSCCE* pour enkli ledikasyon lo preparasyon lavi familyal, lasante reproduktiv, ensi ki konsekans lansentman anba laz.

Revwar *Scheme of Service* bann ansennyan avek bi pour ogmant zot motivasyon vizavi lansennyman e sityasyon disipliner dan lekol.

Pour bann zanfan demonstre plis respe e konprenezon anver zot bann ansennyan ek zot paran ki pe ede anver zot lepanouisman edikatif.

Pour lekol angaz bann zanfan dan bann aktivite ekstraskoler avek bi pour ed bann zanfan vin bann pli bon sitwayen dan lasosyete.

Re-angaz zot lekor anver kalite stratezi lansennyman ki zot pe ofer, avek bi pour amplifye e amelyor motivasyon bann etidyan.

Donn plis sipor pastoral bann etidyan avek bi pou konpran konportman anti-sosyal ki i pe demonstre.

Pour bann paran pas plis letan pour komunikasyon e lwazir avek zot zanfan, avek bi pour etabli e amelyor lyen familyal.

Pour partisip dan lavi letid e komunik plis avek bann ansennyan pour ki zot zanfan i kapab devlop dan tou zot potansyel.

Demonstre plis lentere dan performans akademik zot zanfan, e ankouraz li avek bi

pour anmenn plis sipor ver lekol.

Koz avek zot zanfan lo danze labi sibstans ensi ki labi lalkol, e son konsekans lo laprantisaz.

Angaz plis dan travay ki PTA e Konsey Lekol i fer dan zot lenstitisyon skoler.

Reflesir pli profondeman lo lafason ki nou pe edik e elve nou zanfan.

Avan mon terminen Mr Speaker mon ti ganny sans annan en konversasyon avek Madam Desire Hermite *Chief Counsellor of Student Support Services* kot Minister Ledikasyon. E enn bann partener avek ki bokou paran i ganny sans enterakte, pour ganny sipor kot konportman zot zanfan i konsernen.

E i ti annan sa mesaz swivan ki mon site, "Nou tou nou a agree ki pozisyon paran i enn ki difisil, e enn bann travay ki pli dir dan lemonn. Sa i enkli pran bann responsabilite ki depase san en mannyel ki donn gidans. Annefe napa personn ki'n *master* sa louvraz parantalite.

Bokou paran in pran legzangp fer grandi zot zanfan par imit sa enn ki'n fer zot grandi, ou atraver lenfliyans ki lezot dimoun in annan lo zot. Kantmenm sa, parantalite i en

travay ki donn bokou benefis e lazwa. Ler ou vwar ou zanfan grandi e vin sa ki ou ti pe ekspekte li vini, en bon zanfan, en zanfan ki onor son paran e annan lafreyer Bondye dan li, alor i demann bokou envestisman pour fer en zanfan grandi dan en bon fason.

Parmi bann konponan vreman esansyel, pour fer grandi en zanfan, i disiplin personnel. Se sa konponan dan parantalite ki katalis pour enfliyans en zanfan, pour fer sikse par reste angaze, servi byen bann loportinite, resours e devlop son personnaz oubyen son karakter.

Sa alor i anmenn mwan pour fer lanfaz lo disiplin, mon pe fer en lapel avek tou paran, gardyen e granparan dan nou pei. Asire ki sa zanfan, ou bann zanfan ki anba ou sarz, e ou gard i aprann obeir e respekte tou dimoun. I zot responsabilite pou fer grandi sa zanfan, pour ki i konsyan lo bann limit dan lavi e pour ki i kapab fer desizyon ki ed li devlop an bonn sante. Sa pa vedir servi lakoler ou laraz (Pardon Mr Speaker), atraver ou Mr Speaker. E enflikte soufran lo li.

O kontrer avek pasyans e lespwar pour persiste, pour kontan e gid sa zanfan e

persevere pour vin en model pour li.

Dan sa fason, ler en zanfan i vin lekol, in deza annan en baz solid kot disiplin i konsernen. I pou'n fini ganny andoktrinen avek *self-control*, travay dir, e lakseptans pour ganny gide. Parey nou dir i *teachable*.

Par kont si ou zanfan i fer fot, i *challenge* lotorite lekol e *management* lekol e aplik mezir disipliner, ou pa pour byen pour anvoy koze mirak pour *staff* lekol, ouswa vin kot lekol pour ganny en lodyans letan ou pe zoure e ensilte *staff* lekol e ankouraz ou zanfan pour fer parey.

Si sa i arive, ou pou pe senpleman demonstre lenkonpetans parantalite e dan ou personnaz. Alor ki konklizyon paran, gardyen, granparan e lezot adilt ki annan responsabilite pour fer grandi en zanfan, konsider ou enportan e dan en pozisyon stratezik, pour fer sa travay nob, pour donn en koudmen form bon manm fanmir e sitwayen pour nou pei.

Si ou enn sa paran ki pe deza fer sa kontribisyon, nou dir ou mersi e felisitasyon. Pa les tonbe, kontinyen avek sa bon travay. Me si ou santi, ou

pa pe fer li, i pa tar pou komanse.

Si ou bezwen led pou bouz de novo an avan, kontakte bann Lazans relevan dan ou kominote. Menm kot lekol, ou zanfan pou ganny dirize.

Pour bann zanfan, parfwa letan ou pe ganny disiplinen i fermal e pa gou. Me apre ou vwar rezulta ki ankourazan. Alor les zot ganny gide pour ki zot grandi avek konesans e lasazes. Se dan sa klima ki laprantisaz i arive ganny fer". Fen sitasyon.

Pou terminen Mr Speaker, mon oule ki tou paran e tou bann ansennyen i konnen ki nou koman zot reprezantan nou la pour siport zot, apiy zot dan tou fason ki nou kapab. Nou konnen ki lavi pa fasil. Kontinyen debout for pour nou bann zanfan, pour kapab ede garanti en bon lavenir pour zot. Mon oule swet tou zanfan dan Sesel en bonn fet zanfan ki sa Zedi le 1 Zen.

Mon priye ki sa lazournen i enn ki ranpli avek bokou lazwa e ki ava osi en loportinite pour reflesir lo zot konportman vizavi zot letid. Se atraver sa mesaz ki mon oule soumet sa Mosyon avek sa Lasanble pour laprouvasyon e mon pe demann avek tou mon bann koleg a inimanite pour vot an son faver. Mersi Mr Speaker.

(APPLAUSE)**MR DEPUTY SPEAKER**

Mersi Onorab Samynadin e sa in anmenn nou konklizyon deba lo Mosyon prezante par Onorab Samynadin. Avan ki nou pran vot nou ava zis repas lo ki Mosyon pe demande.

Lasanble i lans en lapel avek tou paran pour angaz seryezman dan konversasyon avek zot zanfan konsernan zot konportman, avek bi pour amelyor e anrisi konteks lansennyman ek laprantisaz dan bann lenstitisyon skoler e pou asire ki zot zanfan i benefisyе maksimonm pandan zot letan kot lekol.

Alor mon ava demann tou Manm ki an faver sa Mosyon pour endike silvouple? Mersi. E kot mon asize, mon pa ni bezwen demande si annan okenn Manm ki kont akoz mon vwar poudir vot in inanim.

(APPLAUSE)**MR DEPUTY SPEAKER**

Donk Mosyon prezante par o Onorab Kelly Samynadin ki mon'n fek lir avan ki nou pran vot. Rezulta i koumsa, i annan 28 Manm setadir tou bann Manm ki prezant se moman dan Lasanble Nasyonal in vot

an faver, okenn Manm pa'n kont e okenn Manm pa'n *abstain*. Donk sa Mosyon in pase.

Nou ava alor remersi zot pour zot partisipasyon la bomaten. Nou pour pran *break* aprezan nou pour retournen 11er, pour kontinyasyon lezot travay Lasanble Nasyonal.

(BREAK)

(Mr Speaker in the Chair)

MR SPEAKER

Bonzour tou Manm Onorab, nou zofisyе Lasanble e nou lodyans an deor Lasanble. Mon rezwenn zot pou nou kontinyen nou travay avek konsiderasyon *Bill*, e mon a demann Madanm rapporter apel Vis-Prezidan e son delegasyon silvouple.

Bonzour e byenveni Vis Prezidan Ahmed Afif, e egalman a kote li Dr Bernard Valentin Sekreter Prensipal dan Minister Lasante, Dr Jude Gedeon Komisyoner *Public Health Authority*, e Mrs Vania Marimba Assistant *Legal Draftsperson* dan biro *Attorney General*. E mersi pou zwenn nou pou konsiderasyon *National Aids Council of Seychelles (Repeal) Bill, 2023*.

Bon pou konmans travay nou a pran Mosyon pour

Second Reading sa Bill. Onorab Arissol?

HON SANDY ARRISOL

Mersi Mr Speaker. Bonzour VP avek ou lekip. Mr Speaker, anba *Order 99...69 (2)*, mon move ki *Bill National Aids Council of Seychelles (Repeal) Bill, 2023*, i ganny lir en Dezyenm Fwa, mersi.

MR SPEAKER

Mersi, mon a ganny segonnman pou sa *Bill silvouple*. Onorab Henrie?

HON GERVAIS HENRIE

Mersi Mr Speaker. *Motion seconded. Thank you.*

MR SPEAKER

Mersi, avek sa nou annord pou ekout prezantasyon *Bill* par Vis-Prezidan. Vis-Prezidan, silvouple pran laparol.

VICE-PRESIDENT AHMED AFIF

Mersi bokou Mr Speaker. Bonzour Mr Speaker, bonzour *Leader Lopozisyon e tou bann Manm Lasanble Nasyonal e tou pep Seselwa*, e tou dimoun a lekout.

Desizyon pou aboli Lalwa Konsey Nasyonal pour *SIDA* i anliny avek Polisi nou ladministrasyon pou redwir

lakantite lorganizasyon semi otonom ki annan dan pei, e ki ganny gouvernen par en *Board*.

Bann tel desizyon i vin apre ki Konsey Minis avek rekomandasyon Minister Lasante in evalye sityasyon e konstate ki sa menm travay i kapab ganny fer otreman.

Polisi Gouvernman lo sa size i baze lo nesesite pou mye itiliz resours imen, e osi resours materyel nou pei, e alors anmenn plis efikasite dan travay Gouvernman e dan servis kliyantel.

Anliny avek sa Polisi, Gouvernman in deside fini entegre fonksyon plizyer lorganizasyon ki ti egziste avan, Dan zot Minister konsernen e keksoz pe mars osi byen si pa menm pli byen ki avan. Dan sa prosesis nou'n osi koup bokou depans ki pa ti absoliman neseser.

An sa ki konsern maladi *SIDA* ek lenfeksyon par virus *VIH*, fodre dir ki Gouvernman i okouran ki zot reste en defi lasante piblik enportan. Nou ankor annan dimoun ki pe enfekte ek virus *HIV*, ti annan 72 nouvo lenfeksyon lannen pase an 2022. Nou ankor annan dimoun ki pa konn zot stati. Nou ankor annan dimoun ki konn zot stati me ki pa pe pran zot tretman e alors pe

kontinyen enfekte lezot dimoun.

Nou ankor annan dimoun ki pe mor avek *SIDA*. Ti annan 27 lanmor an 2022. Nou osi annan mal konprenezon e diskriminasyon an relasyon ek sa maladi. Nou bezwen alors kontinyen entansifye tou nou zefor pou redwi lakantite novo lenfeksyon ek sa viris; kontinyen tret bann dimoun ki teste pozitiv e kontinyen konvenk zot pou konmanse e mentenir zot tretman.

Nou bezwen osi kontinyen fer promosyon ek ledikasyon lasante, pou ki tou dimoun i konn tou sa ki fodre zot konnen lo *VIH* ek *SIDA*, e ki zot osi konnen si zot pozitiv oubyen negativ pou sa viris, e rod tretman neseser. Bann programm dan sa laliny i fer par Minister Lasante, Lotorite Lasante Piblik, Lazans Swen Lasante e plizyer akter dan lasosyete tel ki serten bann *NGO*.

Konsey Nasyonal pour *SIDA* li, pa ti kree pou fer sa bann programm. Li i ti ganny kree pou propaz Lalwa, Polisi, stratezi, plan, eksétera ek Gouvernman atraver Minister pour Lasante. Pou kordin travay ban diferan akter dan domenn *VIH* ek *SIDA*, pou fer swivi evalyasyon ek rapor

lenplimantasyon bann diferan Polisi, stratezi ek programm.

Pou mobiliz resours pou diminyen sa maladi, e bann lezot maladi ki asosye avek sa bann menm konportman ki favoriz transmisyon *HIV* e osi bann lezot maladi, setadir *Hepatitis viral*, maladi ki transmet par sex eksétera.

Ler nou analiz sa bann sityasyon, sa 4 fonksyon i travay naturel Minister Lasante dan son lasanm, e Minister Lasante dan son lasanm i deza pe fer sa menm kalite travay pou tou lezot maladi. I pe fer sa pou Kanser ki annan de lannen, i annan plis ki 200 novo ka par an, e ki pe kout en gro porsyon nou Bidze lasante.

I pe fer sa pou Dyabet ki afekte anviron 12mil Seselwa e ki en problemm lasante piblik mazer. I pe fer sa pou adiksyon ek drog, lalkol ek sigaret ki tousala ansam i afekte plis ki 10mil dimoun e ki osi en problemm lasante piblik mazer. In fer sa pou *COVID-19*, ki'n afekte plis ki 40mil dimoun. Se Minister ki pe fer sa, osi pou *SIDA* ki annan anviron mil dimoun ki'n anrezistre ek sa maladi Sesel ozordi.

Dan tou sa ki mon'n mansyonnen, ozordi i annan plizyer o zofisyè Minister Lasante ek serten teknisyen kle

dan sa Minister zot menm, zot, zot lo *Board Konsey Nasyonal pour SIDA*. Mais de toute façon, menm si zot pa ti lo *Board*, manda ek lobligasyon Minister Lasante se pou fer sa kalite travay lo tou maladi, enkli *SIDA*.

Napa rezon alors akoz ki i bezwen kontinyen annan en lot lorganizasyon ek menm dimoun pe fer sa menm travay. Sityasyon *HIV* ek *SIDA* ozordi i nepli sa ki i ti ete 30an pase ler sa pandemi ti kommanse e ler bann striktir spesyal ekstraordiner parey Konsey Nasyonal ti neseser dan konteks stratezi enternasyonal.

Gouvernman in zize alors ki pou Sesel, malgre ki *SIDA* i en defi lasante piblik enportan, *SIDA* i en maladi parey tou lezot maladi, e alors pa neseser annan en striktir spesyal zis pou li ler nou napa menm kalite striktir pou lezot defi lasante piblik ki osi enportan.

Revokasyon sa Lalwa Konsey Nasyonal pour *SIDA* i a osi donn Minister Lasante plis posibilite pou mye itiliz resours imen ek materyel dan son Minister pou restriktir e amelyor tou bann servis ek programm ki fer prevansyon ek tretman *SIDA*, ek bann lezot lenfeksyon ki transmet dan menm fason.

Tousala dan le bi pou redwir sa bann lenfeksyon atraver bann programm ek servis pli performant. Me sirtou, sirtou pou ed Sesel pli byen reisir lo son bann lobligasyon nasyonal ek enternasyonal lo sa size, klerman i annan bokou travay adisyonnal ki nou pou bezwen fer koman en pei.

Sa Prozedlwa kot nou pe aboli sa Lalwa Konsey Nasyonal pour *SIDA*, i fer provizyon ki pou napa okenn *staff* ki pou perdi zot louvraz zis akoz sa lamannman. Tou le 5 *staff* Konsey Nasyonal *SIDA* pou kontinyen travay ek Minister Lasante ek bann antite ki tonm anba sa Minister, sof si en *staff* li personnelman i desid otreman.

Tou bann byen Konsey Nasyonal pour *SIDA* pou reste koman bann byen Gouvernman. Tou kontra valid ki Konsey Nasyonal pour *SIDA* in sinyen, pou ganny onore par Gouvernman. Mandan tou le 15 manm *Board Konsey Nasyonal pour SIDA* pou terminen otomatikman ler sa Lalwa i vin anfors. Ni bann *staff*, ni manm *Board* pa pou kapab reklam okenn konpansasyon avek Gouvernman, zis akoz sa sanzman.

Mon profite ozordi pou remersye tou bann

profesyonnel ki'n form parti sa Konsey administratif, e osi sa Konsey formel ki'n egziste depi 2013, pou zot travay formidab ki zot n fer pou anmenn sa lalit kont *SIDA*, e fer si ki i pa'n zanmen desot en staz ki ti kapab ensit en sityasyon kriz an term son propagasyon dan Sesel. Mersi zot tou, e ki zot kontinyen donn sa menm zefor dan zot pozisyon atraver Minister Lasante.

Avek sa Mr Speaker, mon demann bann Manm Lasanble pou siport aboli sa Lalwa Konsey Nasyonal pour *SIDA*, dan le bi pou mye itiliz resours imen ek materyel ki nou pei i annan, e pou ouver laport pou Minis Lasante fer amelyorasyon neseser pou anmenn plis lefikasite dan servis pou pasyan e dan travay Gouvernman. Mersi bokou Mr Speaker.

MR SPEAKER

Mersi Vis-Prezidan pou lentrodiksyon. Nou a pran deba lo sa *Bill*. Nou a komans avek lentervansyon Onorab Rosie Bistoquet. Onorab, ou annan laparol.

HON ROSIE BISTOQUET

Mersi Mr Speaker. Bonzour Mr Speaker, bonzour Minis avek *Vice-President*, avek ou delegasyon. Bonzour tou

Onorab. Mr Speaker, mon pe pran laparol pou 2 rezon. Mon premye rezon se ki mon ti en travayer lasante, e mon'n fer 6an dan *HIV/SIDA* dan Minister Lasante e laplipar bann stratezi ki'n ganny devlope ki'n ganny met ater. Mon ti form parti sa tim e mon pa kapab reste mon labous fermen.

Dezyenm, mon *Chairperson HIV/AIDS* avek *Communicable Disease, Sexual Reproductive Health* dan lasante, e alor mon krwar i mon devwar osi pou mwan anmenn en pe kontribisyon ki mon santi koman en *Chairperson* mon pe anmennen. Mersi.

Mr Speaker, lobzektif sa *Bill* i pou *repeal* Lalwa Nasyonal AIDS Council 2013, an prensip se pou dizourd sa Lalwa ek tou son fonksyon pou ganny distribye e desarze par Minister Lasante. Sa Minister i annan manda anba lasante.

E sa *Bill* i asire ki tou travayer sa Konsey pou osi vin anplwayer Gouvernman ouswa anplwayer Minister Lasante.

Premye ka *HIV* ti ganny detekte dan lemonn an 1959 avek en zonm ki ti mor an *Kinshasa, Congo*. Sa i 60an pase. Isi Sesel, premye ka *HIV* ti ganny detekte an 1982, e premye ka *SIDA* ti ganny raporte an 1993. La nou'n ariv

2023, 41an pase apre premye ka ki ti ganny detekte isi Sesel.

Avek evolisyon dan repons *HIV/ SIDA*, sirtou tretman, prevansyon, ledikasyon e osi mobilizasyon, nou konnen ki plis dimoun in konnen ki mannyer *HIV* i ganny transmet, e osi ki aksyon nou devret pran pou nou pa met nou lekor an risk pou ganny *HIV*.

Me malgre tou, i annan lezot fakter *de risque* ki nou popilasyon pe fer fas avek pou ogmant *HIV* e lezot maladi relye avek transmision *HIV*, parey an se moman nou konnen i annan bann dimoun pe enzekte drog dan lavenn, ki zot kapab ganny *HIV* e osi zot kapab ganny *Hepatitis B* avek *C*.

Nou tou nou konnen, i pa zis *HIV* ki lemonn i fer fas avek pandan sa dernyen lannen. *COVID-19* in osi montre tou dirizan ki meyer fason pou fer fas avek en lepidemi, e ki mezir, ou kontrol sanniter i devret met an plas pou konbat kont sa bann fleo. Malerezman ziska prezan syantis pa ankor kapab envant en vaksen kont *HIV*, me vaksen kont *COVID* in ganny devlope tre vit.

Mr Speaker, aktyelman Konsey Nasyonal pour *SIDA* Sesel, ti ganny etabli le 24 May 2002, e son *secretariat* ti dan Minister Lasante ansanm avek

programm kontrol *HIV/ SIDA*, ziska an Desanm 2013 apre ki sa *Act* ti ganny met anfors kot sa Konsey ti ganny separe avek programm *HIV/ SIDA*, me sa Konsey in toulstan en antite Minister Lasante.

Rol Konsey Nasyonal pour *SIDA* anba sa kad legal, se pou kordin repons nasyonal pou *SIDA* dan Sesel atraver en larepons miltisektoryal e kontrol pou konbat *HIV/ SIDA* dan Sesel.

Sa i ti ganny fer atraver 15 manm *Board*, en *CEO* ki ti ganny nominen par Prezidan Larepublik. Prezidan Larepublik i osi Patron sa Konsey.

Sa gro Konsey Nasyonal pour *SIDA*, i annan 2 *staff* ki teknisyen, 1 sekreter, e 1 drayver, e an tou sa Konsey i annan li 5 *staff*. Sa Konsey i ganny etabli pou vin en lazans otonom, pou donn plis vizibilite larepons nasyonal pour *SIDA*, me an partikilyerman pou mobiliz resours, sirtou resours finansyel atraver diferan lazans, sirtou lazans Rezyonal.

Nou apel sa. I annan en Lazans ki apel *AIRIS-COI* ki baze dan rezyon Losean Endyen, nou annan *SADC* enternasyonalman avek Labank Mondyal e lezot lazans ankor ki par egzamp si Sesel,

avan i ti kapab fer laplikasyon pou ou kapab ganny resours.

Mr Speaker, nou tou nou konnen ki an Zilyet 2015, Sesel ti ganny deklare par Labank Mondyal koman en *high income country* akoz Sesel i en pei ki'n devlope, baze lo progre ek devlopman ki Sesel in fer.

Alors, sa ti met serten restriksyon lo manda Konsey *SIDA* kot i konsern mobilizasyon resours finansyel, parey lezot antite dan Sesel, sirtou bann antite Gouvernman.

HIV/SIDA i nepli en lepidemi ou en pandemi global, sa se akoz akse avek servis i tre efektiv, sirtou prevansyon, deteksyon, dyagnoz kot i ganny fer boner. Konmela i annan meyer tretman e swen, enkli pou lenfeksyon loportinis, parey nou dir *opportunistic infection*, ki vreman ede pou asir bon zerans *HIV/SIDA*.

Sel defi se ki ziska prezan *HIV* napa en gerizon. Alors *HIV* i en maladi kronik kot levidans i montre nou ki laplipar dimoun zot sarz viral i ganny byen siprese, e nou konnen en kantite dimoun ki pe viv avek *HIV*, zot pe viv en lavi normal parey mwan ek ou.

Laplipar dimoun nepli mor avek *SIDA* ozordi, avek sa viris. Zot in menm marye,

annan zanfan e fer grandi zot prop fanmir kot zot kapab. Isi Sesel, nou annan laprev kot en kantite dimoun ki pe viv avek *HIV*, zot viv lontan e zot annan zot lavi, zot pe viv zot lavi normal, e menm zot annan zanfan tou.

Mr Speaker, sa *Bill* in vin a en bon moman, akoz dapre rapor global ki ti fer sorti par *UNAIDS* ouswa sa Lazans Nasyon-z-Ini ki responsab pour *SIDA*, le 27 Zilyet 2022, apele *the Global AIDS report*, malgre tou sa defi, *UNAIDS*, sa Lazans Nasyon-z Ini pour *SIDA*, in fer resorti dan son rapor ki laplipar pei respons pou konbat pandemi *SIDA* in montre rezilyans remarkab dan sityasyon, ou letan advers sirtou ler lemonn ti pe fer fas avek lepidemi *COVID*.

Kot in dir ankor kot laplipar pei in kapab anpes sityasyon vin pli pir. Sa in ganny demontre par sif ki *UNAIDS* ti kolekte globalman, kot lenfeksyon *HIV* ti diminyen par 3.6poursan ant 2020 a 2021, e sa i aplik pou Sesel osi, akoz Sesel osi i kontribye rapor.

Mr Speaker, i annan enn de kestyon kekfwa mon oule demann nou lekor prezan. Eski sa, sa desann ki desann sa 3poursan, eski sa i akoz mwens dimoun pa'n vin fer zot debistaz? Eski akoz restriksyon

COVID in anpes dimoun akse avek servis? Eski ti annan plis ledikasyon lo prevansyon e dimoun pa'n met zot lekor a risk pou ganny *HIV*?

Eski kou ouswa pri pou pey servis in ogmante, e alors mwens dimoun pa'n rod servis neseser? Eski diminisyon resours imen dan servis *HIV/SIDA* in koz sa lakoz, akoz nou konnen ti annan mobilizasyon en kantite dimoun ki ti al dan *COVID*?

Mr Speaker, sa kestyion zis mon poz li la akoz mon napa larepons pou li. Mr Speaker, sa i bann kestyion parey mon dir ki nou pe demande, sirtou kot lemonn ti pe osi fer fas avek en lot lepidemi *COVID* ki'n fer sa pti rediksyon dan statistik *HIV* globalman.

Mr Speaker, avan mon kontinyen, mon ti a kontan fer resorti ki isi Sesel nou pli gro problemm lasante i relye avek maladi non-kominikab, parey maladi leker, Dyabet, tansyon, maladi ronnyon ki relye avek lobesite. Lemoni, Kanser, aksidan ki nou konnen lo semen i annan, e enn sa bann fakter ki fer nou bann to mortalite monte.

Dapre rapor Minister Lasante, 76poursan kantite lanmor isi Sesel lannen pase ti vin atraver maladi non-

transmisib parey mon'n fek nonmen anler. Me pa akoz nou pli gro problemm i maladi transmisib, nou pa pou bezwen kontinyen sa lalit kont *HIV/SIDA*, e nou pou kontinyen donn li son lenportans lasante, akoz nou annan ankor dimoun ki pe fer fas avek sa sityasyon, i annan ankor ki pe ganny enfekte, ouswa i annan ki ankor pe mor avek sa viris.

Parey in ganny fer resorti, Konsey Nasyonal pour *SIDA* in egziste depi 2002 anba ziridiksyon Minister Lasante. Menm ler Lalwa ti ganny aprouve an 2013, in toulstan reste anba Minister Lasante. I pa en ensite ki'n debout li tousel.

Sa Konsey in toulstan depan lo lezot *unit HIV* dan Minister Lasante pou siport son travay, pou asir bon kontrol lo repons ki *HIV/SIDA* i donnen dan pei, e sa ti ganny resorti dan sa *workshop* ki Lasanble ti fer, Lasanble Nasyonal ti fer Lendi avek diferan Lazans Lasante e sosyete civil.

Mr Speaker, zis pou donn en apersi, lekel sa bann *unit* dan Minister Lasante ki travay tre pros avek sa Konsey? Premyerman i annan programm prevansyon e kontrol *HIV/SIDA* ki apel *AIDS Control Program* anba *Public Health Authority*

ouswa Lotorite Servis Piblik ki zere par Dokter Gedeon.

Manda sa programm se pou promot prevansyon sirtou debistaz, devlop stratezi pou prevansyon e kontrol *HIV* protokol par egzanz pou tes, tretman stratezi pou anpes transmisyon *HIV* ant manman ek baba. Vwar bezwen e develop programm *training* pou *staff* Minister Lasante e lezot Minister, e osi Lazans Nasyonal ki pe fer prevansyon kontrol, ou tretman *HIV/Sida*.

I osi inisyé bann aktivite miltisektoryal nasyonal kont *HIV/SIDA*. Sa *unit* i osi responsab pou travay avek Sekter Bilateral sirtou *WHO*, pou rod teknisyen ou konsultan pou get spesifikman progre repons nasyonal pou *SIDA*. Sa *unit* i osi responsab pou bann *HIV/AIDS workplace policy*, bann Polisi dan landrwa travay anba Konvansyon *ILO* 2000, pou anpes transmisyon *HIV* dan landrwa travay isi Sessel.

Dezyenm *unit* ki egziste se *CDCU*. Nou apel li *Communicable Control Unit* ki responsab pou tretman e swen e i osi i anba servis Lotorite *Public Health*, anba Dokter Gedeon. *Unit CDCU* li i lakle pou asire ki faktor *de risque* pou ganny *HIV*, sirtou i annan

proteksyon pou bann pasyan ki teste pozitiv.

CDCU i zer tou tretman *HIV* dan Sesel ki enkli dyagnoze tret tou maladi transmisib enkli *Syphilis* ki nou'n trouve dapre statistik in ogmante sa detrwa dernyen lannen.

Zot osi zer tou tretman pou lenfeksyon oportinis pou *HIV*. Zot osi zer tou protokol pou *TB* e osi pou *Malaria*. Zot osi fer swivi pou tou lenfeksyon Epatit *B* ek *C*, e menm zot in entrodwir lesanz sereng pou dimoun ki servi drog dan lavenn depi 2016.

I annan 2 konponan ki apel *PEP* avek *PrEP*, *pre and post-exposure prophylaxis* ki sa osi, sa tretman i anpes dimoun atrap *HIV* si in ganny ekspoze, legzanp, par egzanz si i pa'n servi kapot ler in fer *sex*.

The PEP li menm ouswa *post-exposure prophylaxis*, li i tretman i ganny ofer ek pasyan atraver lasante. Sirtou travayer lasante, (*sorry*), lezot travayer ki'n ganny ekspoze avek sa virus e osi petet bann ka ki annan *rape*.

Trwazyenm seksyon i dir Disease Surveillance and Response Unit (DSRU) ki i osi anba Lotorite *Public Health*, gérer par Dokter Gedeon, e sa in tre konpreansiv akoz stratezi

debaz levidans pou ranforsi sirveyans lasante.

E se sa *unit* ki pe fer depi en bon pe letan pase. I en sistenm repons dan kominote pou tou facilite lasante dan distrik, e osi lo nivo nasyonal enkli *HIV/AIDS SIDA*.

Sa *unit* i sirvey tou lepidemi enkli *HIV* anba Minister Lasante, pran bann mezir neseser pou redwi tou lepidemi relye avek lasante atraver bann protokol ki ganny defini par lezot seksyon dan sa Minister.

Sa *unit* i ti ganny *lead*, mon krwar i ankor pe ganny *lead* par Dokter Justin Bibi, e in fer, i osi in fer en bon travay konpreansiv, sirtou kot i konsern *HIV*. E mon konnen poudir zot in fer en bon travay sirtou dan konsern *contact tracing* e lezot sirveyans letan nou ti annan *COVID*.

Katriyenn se swen lasante li menm kot *Health Care Agency*, Sant Lasante kot i annan Mahe, Praslin ek La Digue ki nou apel Klinik. Zot tre aktiv dan prevansyon, tretman, swivi *HIV/AIDS* avek bann profesyonnel byen kalifye e zot in byen debourye osi.

Tou pasyan in admet lopital, zot in ganny bon swen e swen tre avanse. Apre ki an plis ki sa ki Minister Lasante, nou

annan lezot sekter par egzanp bann sosyete civil ki'n travay avek sa *unit* pou zot kapab siport bann pasyan ki swa enfekte, ou afekte avek *HIV*.

Mr Speaker, i ti a bon mon fer resorti ki dan sa *workshop* ki ti fer Lendi sa semenn par Lasamble Nasyonal, en Lazans Non-Gouvernmantal ki donn sipor kliyan *HIV* ek *SIDA* e osi, i osi en manm lo Konsey Nasyonal pou *SIDA*, i ti fer resorti ki kordinasyon nasyonal *HIV/SIDA* i pa toultan bon.

Alors Mr Speaker, petet sa *Bill* in vin a en moman apropriye kot sa desizyon in form parti restriktirasyon dan Minister Lasante, e mon santi ki sa i a ede pou ogmant lefikasite pou adres problem *HIV/SIDA* dan en fason pli konsistan. Parey sa *Bill* in dir, tou *staff* ki zot deza anplwaye Minister Lasante, e zot pou reste anplwaye Minister Lasante.

Mon profite Mr Speaker, pou mon osi remersi tou bann *staff* ki'n travay dan *HIV* e ankor pe travay dan *HIV*, zot in donn tou zot zefor, tou zot kouraz. Dokter Gedeon pou *lead* dan tou sa bann limite ki mon'n dir, e mon krwar anba ou sipervizyon, ozordi nou kapab dir poudir zot in fer en bon travay.

Malgre ki nou konnen poudir i annan serten problem ki nou pe pas atraver kot nou larepons kot i konsern *dropouts* i en problem, ki mon krwar petet avek sa reaniman avek sa ranforsisman, Minister Lasante i a kapab travay pou fer plis bann pasyan retourn, repran zot tretman.

Avek sa Mr Speaker, mon remersi ou, e mon pou siport merit sa *Bill*. Mersi.

(APPLAUSE)

MR SPEAKER

Mersi Onorab. Mon annan en lalis ase konsiderab entervenan, alor mon a met en *limit* 15minit par entervenan ki egzakteman kantite letan ki premye entervenan in pran, alor zot a pe swiv dan sa laliny. Prosen entervenan, Onorab Michel Roucou.

HON MICHEL ROUCOU

Mersi Mr Speaker. Mon a dir bonzour à tous. Bonzour VP avek ou delegasyon. Bonzour zabitant Mont Fleuri. Mr Speaker, Onorab Bistoquet in tous lo bokou pwen, mon pa pou tro long lo la, e mon pou koz lo sa Mosyon mon osi. Ahr sa *Bill*, sorry.

Annefe Mr Speaker, sa *Bill* li menm li ler ou pe get li se ki

Gouvernman in deside ki i annan sa Konsey pour *HIV/AIDS* ki aprezan zot in santi ki sa bann lobligasyon ki sa Konsey ti pe fer i kapab aprezan ganny transfer anba sa Minister li menm li avek modernizasyon, e teknolozi ozordi ki nou vvar ki'n evolye dan lemonn li menm li.

E ozordi Mr Speaker, en dimoun ki anvi fer en test pou li get son *status* i kapab ale fer li, dan lespas 15minit, in kapab in ganny li son rezulta, e si i anvi en tes en pti pe pli aprofondi dan lespas en semenn osi tou, sa osi i kapab ale i ganny son rezulta.

E osi, Mr Speaker, ler ou pe get lo sa Konsey li menm li, i ti annan aepre li 16 manm, e lo la ti annan son *CEO* osi tou, son 15 manm ek son *CEO* i fer 16. E sa Konsey ti ganny etabli le 24 May 2022 par ansyen Minis Lasante, Dokter Minis Patrick Pillay sa letan, kot la sa Konsey li i ti pou ede pou edik pep li menm li dan sa travay, e ede ki Gouvernman sa letan pou kapab ed nou pep pou konn en pti pe plis lo sa lepidemi, sa letan sa maladi ki ti pe ganny propaze.

E sa Konsey Mr Speaker, i ti pe ganny li en Bidze avek Gouvernman ki 4milyon pou li kapab deservi pou fer son bann

aktivite, son bann mouvman. Be selman ler Vis- Prezidan i pase pli tar, petet si i ti kapab dir nou aprezan la ki sa Konsey ki li i pou *move* anba Minister Lasante, si kapab dir nou en pti pe, nou konnen poudir sa larzan i ganny *disperse* atraver Minis Finans.

Apre sa *trust fund* osi tou, si zot kapab dir nou en pti pe ki kantite ki'n ganny depanse ladan, kantite ki reste, e ki bann aktivite osi ki'n ganny fer? E dan sa larzan ki zot ti gannyen, sa ti ede pou zot pey zot *office rent* en pti pe, e mon mazinen lo kote bann *allowance* pou bann *Board members*.

E, Mr Speaker, mon'n ganny sans pou mon koz en pti pe osi avek en, ou kapab dir en dimoun ki pe viv avek sa maladi, e in met detrwa pti konsern devan mwan. I dir mwan ler sa Konsey ti ganny etabli zot ti annan en manm ki ti e osi tanzantan ti *attend* bann *meeting*, e zot santi poudir apre ek letan sa in, ou kapab dir, perdi en pti pe sa koneksyon.

Zot pa ganny ditou bann lenformasyon en pti pe plis, e osi zot vwar zot, zot pa ganny met partisipasyon lo bann desizyon, e in donn mwan detrwa bann pwen, konsern ki zis mon ava met devan.

Mon mazinen poudir ki ler sa i ava ganny transfer anba Minister Lasante, petet zot osi zot kapab vwar zot en pti pe pli angaze. E sa i ava ede ki plis ankor bann dimoun ki enfekte zot a kapab vin devan. Enn de bann pwen se ki, i annan lo kote komunikasyon, konfidansyalite, e li menm li ki sa i ava ede parey mon'n dir.

E osi lo kote kondisyon kot *CDCU*, sa en pti ki in met dan mon latansyon, *training* avek konsiltasyon. Sa en pti pe bann pwen ki ler mwan mon'n koz avek enn bann dimoun ki pe viv avek sa maladi, ki'n kapab met dan mon latansyon.

Parey mon'n dir Mr Speaker, mon pa pou tro long lo la, sa i en pti pe enn de bann pwen ki mon, mon anvi tous lo la e mon pou donn mon sipor sa. Mersi.

MR SPEAKER

Mersi. Mersi Onorab. Onorab Egbert Aglae, ou a pran laparol.

HON EGBERT AGLAE

Mersi Mr Speaker. Bonzour Vis-Prezidan, le 2 dokter e reprezantan legal AG's. Mr Speaker, sa *Bill* pou *repeal National Aids Council* ozordi sa lannen, sirtou, sa lannen i fer omwen 10an depi ki ler sa Lalwa ti ganny *enactment*.

E mon krwar nou tou nou konn en pti pe parkour kreasyon sa Konsey, ki son bi sa letan, letan sa maladi ti ganny dekouver Sesel, presizeman 1982. E ti annan serten, parey tou nouvo keksoz ki, malad ki ganny dekouver e ki byensir i vin dan ou pei. Nou tou nou lev en serten konsern dan nou lo ki pou arive, i annan ki per, i annan ki- I annan diferan bann reaksyon mon kapab dir.

E ozordi pou mwan, e mon osi mon atas mwan akoz mon'n travay dan Minister Lasante koman en profesyonnel lasante, pou mwan i pa en keksoz ki mon ti a swete vvar, e mon pou eksplike taler akoz mon pe dir sa.

Me selman mon konpran Gouvernman i anvi fer son bann restriktirasyon, e si i bann rezon ki i pe donnen se rezon bidzeter. Me selman koman en profesyonnel lasante e lezot ban profesyonnel lasante mon krwar se, letan bann keksoz koumsa pe arive pou zot i poz serten konsern.

Mr Speaker premyerman, VP dan son ladres in zis dir pou dir i pou ganny abzorbe anba Minister Lasante, anba *Public Health Authority* ki mon vvar Dokter Gedeon la ozordi,

dokter, e mon felisit ou pou ou bann bon travay ki ou'n fer.

Me selman nou pa konn detay, *ok*. Nou pa konn detay, si i pou eparpiye en pti pe partou parey in nonmen, ki i fer ki si i eparpiye partou, partou dan Minister Lasante, ou pou napa en bon kordinasyon.

E rol NAC li menm li son manda se pou kordin loperasyon *response* kot i konsern *HIV/AIDS* dan pei. Mwan mon ti a kontan i eksplik mwan letan i dir pou ganny abzorbe, kote ki pou ganny abzorbe, lekel ki pou responsab anba Minister Lasante?

E osi, nou annan en plan nasyonal kot i konsern *HIV/AIDS*, en *strategic plan*, ki bezwen kontinyen ganny enplimante. E Sesel ki form par plizer Lorganizasyon Enternasyonal, WHO, UNAIDS, kot dayer nou resevwar en kantite sipor teknik, finansyel, avek sa bann lorganizasyon.

Nou koman en pei nou pou bezwen kontinyen dan sa bann lobligasyon e sa bann *set target* in ganny *set*, *ok*? E i annan kantite *target* ki'n ganny *set* ki nou pe swiv, e mwan koman en reprezantan lo Komite *HIV/AIDS*, nou zwenn avek bann *partner* parey NAC, e osi bann lezot *stakeholders* ki travay avek bi kordinasyon,

response, tretman, deteksyon HIV/AIDS. So la.

E la mwan mon pe koz pirman lo kote resours imen ki pou al ver *Public Health Authority*, akoz sa bann dimoun laba i deza annan en *loads of work*. I deza annan en ta *issue* ki zot pe dil avek, e Minister Lasante parey nou pe vwar dan bann *meeting piblik*, i annan en kantite konsern ki pe sorti lo Minister Lasante.

La prezan ou pe al met en lot adisyonnel responsabilite lo zot, pou kordin sa ki *NAC* ti pe fer. Mwan, mon ti a kontan konnen ki mannyer sa pou ganny abzorbe?

E osi ou'n koz lo bann *staff* ki ti deza la avek *NAC*, e *VP* ou a ekliersi mwan. Ou'n dir personn pa pou kapab vin *claim* konpansasyon. Ki kalite konpansasyon ou pe koze la? Akoz si mon'n travay 10an dan sa lorganizasyon, kwa ki zot pe al sorti avek? Mon ti a kontan konnen. Ouswa ou pe koz en lot form konpansasyon, eksplik nou sa?

En lot pwen ki mon pou fer resorti lo... Akoz *National Aids Council* pa ti travay son tousel li, ok. I ti'n ganny en Bidze, wi, avek Gouvernman, i pa'n travayer an izolasyon son tousel. I annan osi bann *NGOs* ki ti pe depan lo *National AIDS*

Council, pou fer ser ten son travay, sirtou atraver ser ten bann resours ki zot resevwar.

Parey *the like of HASO* ki ti pe travay avek zot, kot dabor *HASO* i fer en kantite travay e li in *boots on the ground* li *HASO*, in al partou li, in al lo *ghettos*, in al partou dan kominate e i ankor pe fer li. E enn bann sipor ki i ti pe gannyen se atraver *NAC*.

So, la avek *sa repeal*, eski prezan sa departman... Mon pa konnen lekel, sanmenm mon pa kler lo la. Lekel ki pou *extend* sa lebra avek *HASO* pou li kontinyen? Ozordi parey ti ete, i fasil pou *HASO* zis apros sa Konsey, me letan i pou al dan en Departman Minister, nou konnen ki sa kantite birokiasi ki annan dan en departman en Minister pou akse resours.

Mon pran bann senp legzangp parey lo kote distrik pou ou akse ser ten resours, pou ou fer ser ten aktivite avek *Local Government*, i pran en kantite letan. Eski la prezan nou pa pou al kree en *layers of bureaucracy* ki pou fer ki *HASO* pou vwar li dan ser ten difikilte letan i pa pou *on time* avek son bann programm.

Akoz zot annan en kalandriye aktivite, bann *set target* ki'n ganny *set*, eski pou napa bann gran retar? Sa i

bann konsern ki mon pe met devan. Osi, ler nou koz lo nou bann langazman ki nou annan, *ok, akoz National Aids Council* li osi i afilye kantite avek nou bann lorganizasyon e i annan bann kontra ki zot in sinyen. Ou'n dir poudir bann kontra i ava ganny abzorbe par Minister Lasante.

Ankor enn fwa, lekel ki pou *oversee* pou fer sir ki sa bann relasyon kontra ki nou'n sinyen, bann *MOUs* i ganny enplimante? Mon ti a kontan konnen tousala.

E nou konpran poudir osi nou annan bann rapor ki *NAC* i bezwen prodwi pou donn sa bann lorganizasyon lo sityasyon konteks *HIV/AIDS* dan Sesel lo en baz regilye ki bezwen ganny fer sa. So, *who will assume the responsibility* dan Departman Minister *Public Health Authority?* Eski ou Dr Gedeon ki ou pou bezwen al fer sa la? Mon anvi konnen.

Akoz i kler ki letan sa lanons ti ganny fer, *NAC* pa ti okouran sa, li osi in tandem li, in tann apre. So, mwan mon krwar i ti pou meyer osi annan en konversasyon avek zot pou vwar desizyon ki *Cabinet* in pran pou kapab ferm sa Konsey.

So, avek serten lonnekete ek travay ki sa bann

departman, sa Lazans ti fer, ti devret annan en konversasyon ek zot, pa zis tandem. So, lo la Mr Speaker, osi i annan bann travay ki *NAC* in deza komanse.

Eski i pou bezwen zis aret dan semen, eski i pou *pass on* sa travay preznan? Ankor mon pa kler avek ki.

So, mon vwar poudir i annan en nesesite pou eksplik, pa zis Manm Lasanble. Eksplik piblik Seselwa, eksplik sa bann ki pe viv ek sa maladi ozordi, ki striktir ki zot pou al tonm anba la, anba Minister Lasante pou kapab, pou zot en pti pe pli alez ouswa santi zot confortab avek desizyon ki pe ganny pran ozordi? Sa i enn. Sa i en lot bann konsern.

E en lot keksoz ankor mon krwar ki mon krwar nou pou bezwen koz lo la, si nou pe koz lo size larzan, byensir ou pou bezwen pe met resours ankor pou kapab kontinyen. Akoz pou en pei, parey in ganny set dan bann, nou'n siny bann Konvansyon an relasyon avek *HIV and AIDS*. Nou napa swa, nou pou bezwen swiv bann lobligasyon, e bann lobligasyon pou nou kapab kontinyen enplimant li i vin ek resours.

Mon pou mwan pou dir nou pe restriktire pou byen *manage* resours, petet i en largiman ki VP li i krwar ladan.

Me lo en pwennvi syantifik, pou mwan sa lorganizasyon i enn ki bokou pei i annan, bokou pei i annan en *body* ki kordin sa dan en fason pli *in-depth*, san ki i bezwen met fardo lo en sistem administratif en Minister Lasante.

So, mon ankor dan en fason, mon dir mon dan *limbo* dan en desizyon ki zot in...Akoz mon pa vwar kler kote zot anvi ale avek sa sityasyon. E *mind you* poudir menm si i annan en pti rediksyon dan to lenfeksyon, petet parey Onorab, atraver ou Mr Speaker, Bistoquet in dir, petet dimoun pa pe vin devan.

Akoz ozordi ou tann serten dimoun i dir ou plito mon ganny *HIV/SIDA* ki mon ganny Kanser. Savedir dan son *psyche*, in fini normaliz li poudir be si mon gannyen konmsi plito mon pa ganny Kanser.

So, in vin serten lakseptans petet, se sa ki dimoun pa vin devan pou fer sa bann tes, e nou, nou konn byen nou. Nou en pti pei nou, nou en pti pei; nou fason viv, nou bann aktivite ki nou fer parfwa i poz nou a risk.

So, mon *believe* ki sa statistik li menm li i pa en statistik ki reel, i bezwen annan petet ankor plis. Akoz tou kou zot dir ou *times* li *by 10* e bann

expert medikal i konn sa tre byen sa statistik.

So, Mr Speaker an terminan, mon salye travay ki *National AIDS Council* in fer, in fer en kantite parkour, en kantite *outreach*, konferans, e zot in menm *train* en kantite bann *nurse* ki pou travay avek. Mon swete ki sa bann *staff* ki laba i kapab ganny *absorb* dan en *unit* Minister Lasante, ouswa eski zot pou fer sa.

Sa dir nou VP taler dan ou larepons, akoz nou pa anvi perdi bann leksperyans lenvestisman ki'n ganny fer dan sa bann dimoun, in kout larzan pou *train*.

E mon swete ki nou sityasyon *HIV/AIDS* i pa deteryore avek sa desizyon, e mon swete ki latansyon ki NAC ti donnen anver sa maladi, sa pandemi, i reste lo en nivo. Akoz nou pou zize nou menm nou, avek letan, petet ankor dan 1an nou pou bezwen vin kestyionnen si sa desizyon ti en pli meyer desizyon ki zot in kapab pran dan sa restriktirasyon ki zot ti anvi fer.

So, avek sa Mr Speaker, koman en dimoun ki'n travay lasante e ki'n osi siport mon bann koleg Minister Lasante, mon pa dan en pozisyon pou mwan lev lanmen pou mon kapab siport sa ki pe arive.

Akoz mon ankor annan dout, mon pa kler lo ki striktir menm si zot dir pou ganny *absorbed* dan Minister Lasante, ki pou pran sa responsabilite. Mersi.

(APPLAUSE)

MR SPEAKER

Mersi Onorab. Mon a donn laparol Onorab Andy Labonte.

HON ANDY LABONTE

Mersi Mr Speaker. Bonzour Mr Speaker. Bonzour *VP* avek ou *panel*. Tou Manm koleg Onorab, bann zabitan Perseverans ki anler dan Galeri.

Mr Speaker, mon osi mon pa pou long lo sa *Bill*, me selman mon santi ki mon oblize fer en pti lantervansyon koman en Manm ki lo Komite *HIV/AIDS (SRHR)*. E mon osi avan, si oule depi ler ki mon ti'n vwar *repeal NAC*, mon ti en pe an dout.

Apre yer ler nou'n annan en dyalog avek, nou'n *attend Bills Committee*, e nou'n ganny en pe plis lenformasyon, leksplikasyon. So, ler nou'n ganny sa bann leksplikasyon in kler. Petet mon ti a swete ki petet ler *VP* i fer son *summing up* i plizoumwen reasir piblik la deor, sirtou bann zabitan.

I mean bann dimoun ki pe viv avek viris *HIV*, ki napa naryen ki sanze akoz zot tretman i kontinyen parey. I zis ki i en Konsey, sa i ti en Konsey. Annefe anba sa Konsey, selman 5 dimoun ki ti ganny anploye parey nou'n ganny dir, e 5 dimoun.

E apard sa 5 dimoun, wi, i ti annan en *Board* me sa *Board* li menm li i ti annan 15 sepa mwan 16 dimoun. Ki montre ou son *Board* i pli gro ki kantite dimoun ki ganny anploye.

So, ou vwar nesesite akoz ki Gouvernman in pran en tel desizyon. E mon asire ki bann *staff*. Sa 5 *staff* si oule ki anploye direkteman i okouran e *VP* in konfirmen ki zot pe ganny abzorbe anba Minister Lasante, ki vedir direkteman i montre ou ki sa bann *staff* pa'n ganny met dekote.

E la mon osi mon pou zwenn ansanm avek mon koleg Onorab, Onorab Rosie Bistoquet, pou remersi sa bann *staff* an zeneral pou zot sipor, tou sa ki zot in donnen anver sa Konsey.

Ki ozordi nou kapab dir ki *HIV and AIDS* i nepli vreman en keksoz ki, wi nou merit konsyan poudir i la, nou bezwen kontinyen rod en fason pou elimin *HIV*, me si oule, ou kapab viv avek sa maladi.

Annou pa fer dimoun per ki ler sa Konsey i fermen si oule, tretman pou nepli egziste. Me non, tretman i pou *still* la, tretman pou la, zot pou ganny menm servis e napa naryen vreman.

Akoz ler parey *VP* in donn son, in fer son prezantasyon, in dir ki nou annan nou 1200 dimoun apepre ki pe viv avek dyabet, apepre 10mil dimoun ki pe servi, ki anrezistre avek *DSAPTR*. *COVID* apepre 40mil dimoun e *HIV* nou annan forse apepre en dizon 1000 a 1500 dimoun selman ki pe viv avek.

So, i montre poudir petet nou pa vreman bezwen en Konsey, me plizoumwen nou bezwen fer sir ki lasistans lasante ki sa bann dimoun ki pe viv avek *HIV and AIDS* i la e zot pe gannyen.

Pou mwan mon pli gro konsern se, mon ti pe vin plizoumwen konsernan sa bann *staff* e *VP* in reasir nou ki *staff* pe ganny abzorbe. Apre programm li menm li, bann programm ki la pou siport bann dimoun ki pe viv avek *HIV and AIDS*, ki mannyer sa bann programm pou kontinyen ganny distribye dan kominate avek piblik an zeneral?

Apard sa pou mwan, Mr Speaker, mon vwar ki in annan en gran amelyorasyon depi ler

ki *HIV* in ganny dekouver li menm li lo later Sesel, e nou'n pli byen konpran sa maladi e nou pli byen kapab zer li.

E ankor enn fwa an fermtir sa Konsey, napa naryen ki pou manke de lapar, akoz ler nou pe gete, sa Konsey ti plizoumwen pou kordin travay konsernan *HIV and AIDS*, mobilize. E en Bidze 4milyon ki ti ganny donnen pou 2023, ki byensir tou son fonksyon ki pou ganny abzorbe anba Minister Lasante.

Mon ti a swete ki *VP* ankor enn fwa dan son *summing up* i fer konpran byen. Reasir dimoun poudir be tousala i pe ganny transfer anba Minister Lasante, me napa naryen ki pe vini la e ki nou pe zis fermen, nou pe kit sa bann dimoun dan, a lezer ditan ki nou pa pe pran ka avek zot konsern lasante.

Akoz i primordyal ki lasante tou endividé, nenport ki maladi, i ganny sa servis ki i merite. So, avek de pti mo parey mon'n dir, sa de pti mo ki mon'n fer sorti, akoz Onorab Bistoquet in tous laplipar kek pwen neseser, alor mon pou dir wi, se pou se la rezon ki mwan mon pou donn mon sipor sa *Bill*, si oule.

Akoz mon'n pli byen konpran akoz ki nou pe aboli en tel Konsey, e ki son bann

fonksyon i pe ganny bouze, i pou kontinyen. Me i enportan ki nou byen zer finansman ki larzan piblik byensir, nou pa kapab zis kit keksoz parey ti pe ale, me plito restriktir li dan en fason kot nou annan pli byen fason pou nou zer sa finansman. So, avek sa de mo Mr Speaker, mon pou dir ki mon pou donn mon sipor sa *Bill*. Mersi.

MR SPEAKER

Mersi Onorab. Mon a pas laparol Onorab Conrad Gabriel.

HON CONRAD GABRIEL

Mersi Mr Speaker. *Welcome VP* avek ou delegasyon. Mon a dir bonzour tou dimoun a lekout. Mon'n ekout *VP* dan son prezantasyon. Mon panse lannen 2023 i fer apepre 42an ki nou pe viv avek en pandemi, *HIV/AIDS*. Dan bann premye lannen, ti annan bokou lafreyer, dezespwar, e nou ti perdi bokou lavi, me gradyelman sa in sanze.

Pli ale dimoun i ganny en konpran e sa se gras a zefor ki'n ganny mete par plizyer profesyonnel sorti dan Minister Lasante, e osi bann lezot endividé sorti dan bann *NGOs* ki'n vin devan pou ede elimin sa stigma ki ti egziste.

E la mon mazin en dimoun kle sorti dan mon distrik Point Larue, Dokter Anne Gedeon. In travay bokou e in met bokou lenerzi ansanm ek son tim pou fer en group dimoun pa santi zot tousel fas a en maladi ki ziska preznan napa okenn gerizon. Mon felisit osi Mr *HASO*. Sorry mon pa tro konn son non *anyway*.

(Interruption)

HON CONRAD GABRIEL

In ede pou fer bokou dimoun.

Justin Freminot, yes, excuse me. In ede pou fer bokou dimoun reganny sa zwa de viv. Nou'n menm vvar li mont lo bann *ghetto* pou sey distribye *condoms*.

Ozordi dan nou pei i annan tretman e bon swen. Nou pei in egalman *endorse UN21 Political Declaration on HIV/AIDS*, e ladan i annan apepre 10 komitman tre ferm e fondamantal. Mon mazinen ki parey *VP* in dir, sa bann kontra ek *commitment* ki Sesel in fer pou bezwen otomatikman ganny mentenir pou evite ki nou regrese oubyen retourn an aryer.

Mr Speaker, atraver ou, sa *Bill* pe ganny *repeal*, *National Aids Council*. Mon krwar ki Gouvernman i bezwen

neseserman ranplas li avek lezot *high level mechanism*, savedir bann *mechanism* o nivo pou kontinyen lo sa laliny progre ki Sesel in fer.

Si zot in arive pran sa desizyon, i bezwen ki zot in asize fer bokou analiz e refleksyon. Nou swete ki nivo standar ki'n egziste pandan tou sa lannen i ganny mentenir. Nou bezwen asire ki sa bann manm ki ti lo sa *Council* pa ganny met en konte zis akoz nou krwar ki nou pei i *safe, its business as usual*. In pran en ta letan, lenerzi pou nou ariv la kot nou ete ozordi.

Sa *issue HIV/AIDS* i pa en zafer *cut cost*, Mr Speaker. Mon krwar VP i konnen ki mon pe sey dir. Petet dan son *summing up*, i a ed nou pli ganny en konpran ki pou arive avek sa bann *staff* ki'n travay dir pandan plizer lannen? Mon swete ki Gouvernman i reste tre vizilan, akoz parey sanson i dir, "*take care because AIDS don't care*"; Mersi Mr Speaker.

(APPLAUSE)

MR SPEAKER

Mersi Onorab. Laparol i aprezan pou Onorab Wallace Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Vis-Prezidan. Bonzour tou profesyonnel lasante, profesyonnel legal, tou Manm Lasanble, tou manm piblik ki pe ekoute.

Mr Speaker mon pran laparol zis midi apre midi pou mwan fer mon kontribisyon lo sa *Bill* ki devan Lasanble ozordi. Mon krwar i en, koman en Manm *Bills Committee* mon krwar i osi mon devwar pou mwan koz en pti pe lo sa *Bill* ki devan Lasanble, sa *Repeal Bill* ki devan Lasanble.

Pou komanse Mr Speaker, mon krwar i bon etablir lo komansman rezondet ki sa Konsey ti ganny formen. Annefe sa Konsey mon pe get li la ti ganny formen le 24 May 2002 pa sa *then Minister Lasante*, Minis Lasante pardon. Mr Patrick Pillay avek bi pou kordin bann zefor an se ki konsern *HIV/AIDS* dan nou pei.

E mon krwar sa letan ti en letan kot ti annan bokou konsern. Ti en letan ki si mon pe get bann statistik byen ti en letan kot in annan bokou konsern an term bann logmantasyon dan bann to *HIV/AIDS* dan Sesel. E ti annan en nesesite pou kapab *better* kordin bann diferan zefor partou dan tou bann Minister, departman, lasosyete an

zeneral pou dil avek sa sityasyon.

En sityasyon, a mon pwennvi en sityasyon *emergency*. En sityasyon kot ti bezwen ganny *arrest* parey ou dir an Angle.

E an 2013 sa Konsey li menm ti vin en *legal entity, body corporate*. En *legal entity* e i ti ganny son stati legal e la mon krwar i fer aepre preski 10an depi ki sa Konsey in vin en *body legal*.

E i annan en kantite travay *over the years* ki'n ganny fer si ozordi nou pe koz lo sa bann statistik, nou pe koz lo bann afilyasyon ki nou annan. Nou pe koz lo bann diferan lentervansyon, bann diferan keksoz ki'n ganny fer pou dil avek sa sityasyon *HIV/AIDS* dan nou pei.

I annan en kantite travay ki'n ganny fer, byensir par Minister Lasante *proper* li menm, par *Public Health Authority*. Me osi byensir par kordinasyon ki'n ganny fer par NAC. E nou pa pou kapab bliy sa bout, akoz *HIV/AIDS* li menm i pa en keksoz ki zis dan Minister Lasante.

I pa en keksoz ki zis parmi profesyonnel lasante. Me i en keksoz ki dan lakominote dan lasosyete. E ler mon pe get konpozisyon sa Konsey mon

konpran akoz prezan sa Konsey i sitan larz.

E ler mon pe ekout Onorab. *Board* sa Konsey sirtou, i sitan larz e ler mon pe ekout lentervansyon Onorab Labonte mon vvar poudir i pa tro ganny en konpran nesesite pou annan sa groser *Board*.

E ler mon pe gete i annan reprezantan bann diferan sekter, i annan bann reprezantan. Mon pe get en dimoun la ki mon pe vvar son portre, i travay kot lanplwa. Dimoun ki travay dan sosyete sivil, dimoun ki travay dan domenn legal, dan domenn relizye.

So, i bann diferan sekter, bann diferan domenn ki ozordi i annan en lenfliyans lo lasosyete, en lenfliyans lo ki mannyer nou dil kote *HIV/SIDA* i ete, kote i propaze e ki mannyer nou dil avek sa bann zafer.

So, pou mwan kordinasyon i en keksoz ki ti merite bon kordinasyon, ti en keksoz ki ti merite e mon ankor *still* krwar poudir kordinasyon i en keksoz ki merite e ki devret ganny kontinyen ankouraze.

E prezan ler mon, mon ekout prezantasyon Vis Prezidan lo rezon prensipal. In koz detrwa keksoz, me rezon prensipal ki Vis Prezidan in dir

nou an relasyon avek klotir *National AIDS Council*, se akoz i en Polisi Gouvernman pou revwar travay serten bann antite Gouvernman e pou fer serten bann fonksyon ki zot fer entegre zot ansanm, ansanm dan sa ki mwan mon apel Gouvernman *proper*, Gouvernman santral.

E mon krwar zot konn mon pwennvi lo la. I annan bann Lalwa ki'n vin devan Lasamble, kot in annan bann *repeal of* bann antite Gouvernman, mon krwar zot konn mon pwennvi lo la. Mon pa neseserman en dimoun ki 100 poursan an faver sa bann zafer. E sirtou ler nou tann koz lo redwir, *streamline* bann lorganizasyon, *streamline* sa bann landrwa, *streamline* Gouvernman, fer serten *savings* sirtou.

Akoz pou mwan lo kote *National AIDS Council*, sa *savings* ki ou fer avek *Board* petet pou mwan louvraz ki zot ti pe fer, i pa konparab avek sa *savings* ki ou pe fer avek *Board*. E nou konnen. Nou konn lefikasite Mr Speaker bokou sa bann landrwa kot ou vwar i annan serten lintegrasyon, serten *streamlining* e i pa neseserman ki servis pe neseserman delivre alaoter ki

Gouvernman ti ava swete, e sa nou pe vwar partou.

Ozordi nou annan nou en seri bit *meeting* piblik ki'n pase e nou pe vwar bokou bann konplent, bokou bann konsern sorti kot manm piblik an term *delivery*, an term *delivery* bokou sa bann antite servis piblik e detrwa ladan bann ki'n ganny *streamline*.

Sa Mr Speaker, i en pti pe lentrodiksyon lo kote rezondet e en pti pe lo sa ki *VP* in pas lo la. Me selman mon krwar i enportan akoz sa i en size osi ase teknik ki mon krwar nou bezwen abord son bann bout teknik si oule.

E la mon pou tous premyerman lo *SDG*. Lo *Sustainable Development Goals* e prensipalman *SDG* 3 ki koz lo mankman *universal health coverage* e sa i osi enkli Mr Speaker *sexual and reproductive health services*. E sa *SDG* i met lanfaz lo promes pou *achieve end of AIDS by the year 2030*, e spesifikman si mon'n ganny li byen target 3.3.

E si nou anmenn li pli pre avek nou Mr Speaker, Linyon Afriken dan son 36enm Kongre. Dan son 36enm sesyon, pardon, an Fevriye sa lannen ti fer *new pledge*. Le 20 Fevriye ti fer *new pledge* pou komit to a set of actions. Detrwa aksyon

pou *boost* bann progre pou al ver eliminasyon AIDS; *ending of AIDS*. E sa deklarasyon in ganny adopte. I demann Gouvernman, i demann bann Gouvernman pou pran responsabilite personnel, bann dirizan pou pran responsabilite personnel pour donn *active leadership* ver AIDS response dan zot pei respektif.

So, sa i bann komitman, i bann komitman ki nou koman en pei ki form par bann Lorganizasyon Enternasyonal. Sa bann komitman ki nou'n fer i bann komitman ki nou bezwen garde, pa zis ver lakominote enternasyonal me en komitman ki letan nou'n fer, nou'n pran, nou angaz nou pou nou protez nou popilasyon, protez nou pep, fas a sa bann diferan menas ki pe menas nou pep e la nou pe koz spesifikman HIV/AIDS.

E si nou vin pli pre ankor Sesel Mr Speaker, nou pou vwar ki statistik ki mon annan dernyen la ki mon pe gete from National AIDS Council 2020, nou annan nou aepre 934 dimoun environ ki pep viv avek HIV/AIDS ozordi Sesel.

E ler mon kontinyen get bann statistik mon vwar ki i annan serten lenkyetid. I annan serten lenkyetid an sa ki konsern HIV Infections from 2016 a 2020, in ogmante par

53pourstan. Logmantasyon dan lakantite lanmor in ogmante *statistic-wise*.

Petet koman en pei nou pou dir en logmantasyon 2, 3 i pa bokou, me selman statistik i montre en logmantasyon. I montre en rediksyon dan lakantite tes ki nou'n fer pandan sa bann letan, *from 21 ekek mil, from 27 ekek mil pou desann 21 ekek mil*.

Me selman i annan bout ankourazan; par egzanp ler nou pe koz akse avek tretman, sa i bann bout ankourazan ki nou vvar. Me selman i still annan challenges parey bann diferan lezot Manm in koz lo la, kot i annan dimoun ki pran tretman e apre i annan dimoun ki aret pran tretman.

E sa i koz en problem pou sa ki pe kordinen, akoz nou konnen poudir ler ou pe pran tretman, ou ariv serten staz kot ou *viral load* i desann e i anpes ou - i anpes ou transmet sa viris.

Nou konnen osi ki nou annan challenge an sa ki konsern sa bann target 90,90,90. 90pourstan dimoun ki konn zot stati, 90 pourstan dimoun ki konn zot stati ki'n ganny tretman e 90 pourstan dimoun ki ganny tretman ki *achieve suppression*, si mon'n byen ganny sa bann target

byen. E nou konnen nou annan *challenge* dan sa domenn.

So, le pwen i reste Mr Speaker, eski ozordi an 2023 fas a sa bann *challenge* ki devan nou, eski ozordi i le moman pou nou ferm sa eleman kordinasyon ki pou mwan i enportan, i primordyal pou asire ki nou *achieve* sa bann target.

Mon konpran *CDCU* i annan son louvraz ki i fer, *Public Health* i annan son louvraz ki i fer, Minister Lasante li menm i annan son bann Polisi. Me letan nou pe get *HIV/AIDS* an zeneral dan lasosyete, i annan en nesesite pou kontinyen annan serten kordinasyon, kordin bann zefor, kordin bann Polisi ki swa *workplace policy*, ki swa Polisi dan sosyete civil.

Whatever Polisi ki annan, me selman i annan nesesite pou fer sa kordinasyon e pou mwan ozordi mon vwar i annan nesesite pou serten, malgre serten defi, serten *challenge* ki sa Konsey i *face*, mon krwar i annan en nesesite, pou nou kapab kontinyen annan *better* kordinasyon pou nou kapab zisteman *achieve* sa bann target ki mon'n koz lo la.

Bann target *SDGs*, bann target Linyon Afriken e osi bann

target personnel ki nou, nou mete Sesel koman en pei.

So, i neseser pou nou kapab kontinyen travay ver *achieve* sa bann target. E la mon annan en pti pe lenkyetid. Pa ki mon pa *trust* Minister Lasante, me mon santi ki Minister Lasante ozordi i *overburden* par bokou, bokou lezot keksoz e dayer Manm in koze lo la.

Par egzanp bann maladi non-communicable diseases, bann maladi parey Kanser, malad leker e lezot. Minister Lasante i *overburden* avek sa bann issues. Minister Lasante i annan issues an sa ki konsern travayer, Minister Lasante i annan issues an se ki konsern lozistik, i annan en pake issues dan Minister Lasante. E pou mwan tir en *burden* ankor anvoy lo zot, mwan mon vwar li i en lepa dan en move direksyon.

Eskize, me selman mwan mon vwar li en lepa dan en move direksyon. Petet si ti annan nesesite, akoz nou pa pe fer gran *savings*, nou pa pe fer gran, gran zafer avek ferm sa Konsey. Si i annan en nesesite revwar son manda, revwar ki mannyer i fonksyonnen, fer li vin en pe pli efektiv. Fer li tous bokou plis lezot keksoz ki nou devret pe fer ozordi, me annou

asir kordinasyon - kordinasyon programm kont *HIV/AIDS*.

I enportan a sa moman Mr Speaker, sirtou la ki nou pe vwar bann logmantasyon, par egzanp bann maladi *syphilis*, nou pe vwar bokou logmantasyon. Par egzanp dan dimoun ki servi drog, dimoun ki servi sereng. Tousala i bann keksoz ki *link*, bann faktor ki *link* avek *HIV/AIDS* osi.

So, eski, le kestyion i reste eski *is this the right moment* pou ferm NAC? E mwan mon pwennvi, okenn dimoun pou demann mwan mon pou dir zot non, mwan mon krwar nou bezwen entansifye kordinasyon, nou annan 90/90 pou nou *reach*.

Nou annan to lenfeksyon pou nou kontinyen fer desann. Nou annan *death rate* malgre kantmenm nou dir statistik i montre ki in ogmante, nou bezwen si nou kapab ariv zero, e nou bezwen dimoun pou fer sa. Nou bezwen *proper* kordinasyon pou nou kapab fer sa.

So, Mr Speaker pou mwan mon war li difisil a sa moman. E mon konpran lide bann si mon kapab apel sa bann *founding fathers* sa letan of NAC. Mon konpran lide par deryer e mon vwar ozordi an 2023, mon vwar nesesite pou

nou kontiny dan sa laliny, e nesesite pou nou lager kont *HIV/AIDS* dan nou pti pei Sesel, pour ki tou nou pep i ava viv an bonn sante. Mersi Mr Speaker.

(APPLAUSE)

MR SPEAKER

Mersi Onorab. Laparol i aprezan pou Onorab Francois Adelaide.

HON FRANCOIS ADELAIDE

Mersi Mr Speaker. Bonn apre midi Mr Speaker, Vis-Prezidan, Dokter Gedeon avek Dokter Valentin e bann zabitan Perseverance ki zot ankor enterese pou ekout nou. Mersi bokou, savedir zot montre nou en gran lentere zot annan dan Lasanble Nasyonal.

Mr Speaker mwan mon pou pran laparol ozordi pou mon koz lo sa *Repeal Bill* akoz mon en Mamm lo sa Komite Lasante dan Lasanble Nasyonal e mon krwar i enportan pou mwan pas 2 pti pwen, petet pou kapab eksplik en ptigin mon pwennvi.

Wi, Mr Speaker nou ti ganny sans Lendi pase zwenn avek bann diferan *stakeholders* e enkli NAC e zot ti koz ek nou, zot ti sey eksplik nou akoz ki zot panse ki sa *repeal Bill* pa devret pase la pou le moman.

E mon oule dir avek tou bann dimoun ki ti dan sa *workshop* ki nou'n ekout zot pwen e zot konsern, e nou fer sir ki nou pou fer en keksoz ase konpreansiv, pou nou tou kapab lanmwatye, lanmwatye pou nou kapab zwenn kanmarad.

Mr Speaker parey nou'n tann mon koleg Onorab Cosgrow in dir, i pou normal ki sak fwa sa Gouvernman ozordi pou pran en desizyon ki parey zot abitye dir, mefyans *whatsoever*, i normal pou zot annan sa bann pwennvi.

Me solman mon konnen poudir an 2020 Seselwa ti elekte *LDS* koman Gouvernman e zot pa'n fer zot, zot annan tou konfyans ki *LDS* i pou delivre.

E si ou vwar i annan bann sanzman ki vini, mon panse i pa bann sanzman pou le mal, me selman i bann sanzman pou le meyer. I normal ki en Gouvernman i fer en keksoz en fason e en lot i vwar keksoz dan son lot fason. Me selman tou kou mon krwar byennet sa pep i devret pas avan.

E Mr Speaker, sa ki fer mwan konfidan ozordi, se ki mon vwar apard Vis-Prezidan, mon vwar 2 profesyonnel ki en bon pe letan zot dan Minister Lasante, zot in kapab prouv zot non poudir zot bann

profesyonnel. E mon krwar pa si tou lede in ganny trennen la lo sa latab zis pou vin kouver keksoz ki zot pa *believe* ladan.

Mon krwar poudir zot in ganny konsilte e zot in donn zot kontribisyon e mwan mon annan tou konfyans ler mon vwar Dokter Valentin, ler mon vwar Dokter Gedeon akoz dan le pase zot in prouve poudir zot in bann zom ki'n kapab defann lentere Sessel, defann lasante Seselwa, menm ki in pas dan bokou kriz.

E lasante Seselwa ozordi i ankor a sa nivo, ki menm mon konnen i annan enn de bann pti konplent, me selman mon konnen ki zot in fer bann bon travay. E mon pou kontinyen ankouraz zot pou zot fer en bann, kontinyen sa bann bon travay ki zot pe fer.

Mr Speaker i normal ankor mon pe dir refer avek Onorab Cosgrow, Mr Speaker nou osi ler nou ti pran pei, ti annan en pe dimoun ti krwar ki pou napa ankor bann Minis ki kapab fer sa bann travay parey Onorab Cosgrow ti fer. Me nou'n ganny prouve ki keksoz i sanze e nou pe fer bann parkour ki en pe pli byen ki avan.

I pa vedir ki ou ti pe fer mal Onorab non, me selman nou bezwen aksepte poudir

sanzman i pou le meyer, e sanzman i anmenn diferans. E mon krwar parey mon pe dir nou tou ki la nou anvi meyer keksoz pou Sesel. E si sa i direksyon ki sa Gouvernman pe ale, mon krwar nou devret la pou donn li tou sa sipor.

Mr Speaker, petet 2 pti konsern, ouswa petet sizesyon ki mon pou petet met devan. Mon konnen poudir NAC vre, mon'n swivre en pe zot bann travay. Mon pa pe dir ki zot in fernal ditou non, non, non. Zot in kontribye, zot in fer bokou keksoz.

Par egzanp ler mon get lo kote *advocacy* petet VP zis si ou kapab ler ou *wrap up*, eski pou annan sa motivasyon, akoz avan *Council* ti zis li menm en pti groupman zot menm. Petet i ti ava, i ti pou annan plis sa, sa lanvi ou konpran? Ler ou annan en pti keksoz pou ou, ou tant pou ou pli *committed* e prezan ler sa ou pou al met li anba Minister Lasante, parey mon bann koleg in dir petet Minister Lasante osi i annan son preokipasyon.

Eski ou kapab donn en garanti sa Lasanble Nasyonal ki mon konnen poudir tou sa bann keksoz pou reste, zis *Council* ki pe sorti. Promosyon pou reste, enplimantasyon pou reste kordinasyon pou reste.

Petet VP donn nou sa reasiran ki Gouvernman dizour pou donn tou. Tou sipor pour ki bann dimoun ki pe soufer avek sa bann kondisyon, sa maladi ki zot pou kontinyen resevwar tou zot tretman, menm petet i kapab al en pe pli alaoter ki nou pe gannyen, e sa i ava sirman en reasiran pou nou bann dimoun la deor.

E Mr Speaker parey mon dir, mon en Manm lo Komite Lasante, koman en komite dan Lasanble nou pou bezwen fer sir ki nou pou bezwen *supervise*, nou pou bezwen annan nou *oversight* lo sa ki lo sa ki pe vini, sirtou Minister Lasante pou fer sir ki bann Polisi e bann enplimantasyon i ganny *Maintain to the highest level*.

Kot zot pa santi ki ler sa *Council* pou frenmen ki swen i pou tonbe, me plito nou pe antisipe ki nou pou vvar pli bon enplimantasyon, pli bon kordinasyon e pli bon evalyasyon pou ki lasante nou pep i reste vreman alaoter ki nou ti a swete.

Mr Speaker avek sa 2 mo mon krwar mon'n fer mon pozisyon kler. I pa vedir mon pe dir avek sa bann dimoun ki ti fer sa *workshop* ki mon pa'n tann zot lavwa. E mon pou

kontinyen annan sa rol
oversight.

E nou laliny komunikasyon i reste ankor ouver. Nou pou kontinyen koz ek kanmarad parey nou'n etablir sa partenarya, pour ki lasante Seselwa i reste enn nou priyrite e nou fer sir ki nou gard sa komitman. Mersi Mr Speaker.

(APPLAUSE)

MR SPEAKER

Mersi. Mersi Onorab. Bon, pou pran en pti lavans lo apre midi mon a pran ankor en entervenan. Onorab Gervais Henrie.

HON GERVAIS HENRIE

Mersi Mr Speaker, bonn apre midi tou dimoun e sirtou *welcome panel* dan Lasanble Nasyonal. Mr Speaker dan son lentrodiksyon Vis-Prezidan in dir nou poudir sa desizyon i form parti plan Gouvernman pou restriktir bann antrepriz - pa antrepriz akoz sa i en lot mo, me bann *public bodies*.

E savedir avek novo ladministrasyon ki'n vini an 2020, sa i son lentansyon pou fer plis avek mwens e pou kontinyen fer. Letan i kontinyen fer, nou lo sa kote latab nou konpran sa pozisyon e nou pou

siporte pa neseserman *blind* li, me nou pou met bann sizesyon ki mannyer keksoz i merit ganny fer.

E lot kote ou pou gannyen sa rezistans e dan son entervansyon Onorab Cosgrow in vreman ezite, mon felisit li pou sa, pou li pa servi sa mo 'regresyon'. Ozordi in dir nou i en lepa dan move direksyon, akoz toulstan i dir nou sa i bann desizyon ki nou pe pran nou pe regres bann progre ki'n ganny fer.

E alors zot bann largiman ki nou pou tande ozordi nou'n deza tandem. Me selman pou publik ki pe swiv nou deba ozordi, nou ava rapel poudir depi 2020 i annan en seri sa bann *public bodies* ki alors en zour ti egziste, e ki'n ale e ki en sel kou katastrof dan pei pa'n arive parey Lopozisyon ti dir nou pou arive.

NISTIE, ou rapel *NISTIE* ti vini zot ti konplent. In annan *APDAR*. Li osi in vini, nou'n vini, ti la, in ale. I annan *ANHRD*, Departman Lenformasyon, *STB*, *URS* ou rapel fame *URS?* Zenn in bouze, in ganny louvraz.

So, mon senpatiz avek zot pozisyon akoz zot bezwen rod en keksoz pou argimant kont. Me eski vreman i annan sa kantite nesesite pou sey fer

dimoun per? Non, *the country will move on*. Sa bann staff pou ganny abzorbe. Nou pou trouv nouvo fason pou fer nouvo keksoz, pei pou bouze, pei pou progrese.

Mon bann ser, frer lot kote latab pa bezwen per, soley pa pou aret tape demen bomaten, i pou leve ankor.

(APPLAUSE)

HON GERVAIS HENRIE

Alor Mr Speaker, tou resaman nou ti zwenn avek Minister Lasante, ou konn sa pli byen ki mwan, akoz bann lenvitasyon ti vin atraver ou lofis avek lofis Madanm Clerk e Lopozisyon ti ganny envite zot pa ti vin.

Ti annan bann leksplikasyon ki ti fer avek nou koman Manm Lasanble koman en *stakeholder* Minister Lasante lo bann defi ki nou pei ozordi pe fer fas avek an sa ki konsern lasante.

E parey Onorab Cosgrow in dir ou i annan en kantite *challenges* ki Minister Lasante pe fer fas avek, e enn parmi sa bann defi se limerzans bann diferan maladi ki en sel kou i pe vin bokou dan nou sosyete. Lalis i long me nou kapab mansyonn detrwa Kanser, maladi kardyovaskiler, latak, tansyon, dernyen ki'n vini

Corona Virus, obesite sirtou parmi bann zanfan.

En keksoz ki nou pa koz bokou lo la se bann blesir e dimal ki dimoun ki gannyen dan travay, Dyabet bann maladi respiratwar, *Alzheimer*, Otizm, tansyon si mon pa ankor mansyonnen. Bann lezot maladi mantal e menm *Dengue*.

So, i annan tousala e *HIV/AIDS* i osi dan milye tousala. Prezan ki mannyer nou zer tousala nou koman en pti pei avek en ptigin resours imen, me pli enportan ankor kontrent finansyel. Lentansyon nouvo ladministrasyon se ki mannyer nou fer plis avek mwens, e sa i form parti sa, ler nou pe bat kart ki mannyer nou pou zwe nou kart.

E alor mwan mon pou donn lankourazman, mon pou donn lankourazman poudir *ok*, annou sey fer me tout an prenon kont parey mon'n dir, nou pa pou siport konmsi *blindly*, me nou pou dir ki mannyer nou kapab amelyore.

E alors sirtou letan Bidze i vini an Desanm, Bidze pou mwan i dwatet kler. Minister i ganny Bidze, apard *goods and services* ki *procure* son bann latizann, lekipman, i pey saler travayer. Me i bezwen annan bann programm kler.

Bann programm ki dir “nou le redwir novo ka *HIV*. Nou pou depans tan larzan, nou pou bezwen tan dimoun pou fer sa programm e vwala rezulta” e pou nou ki vote lo la e ki reprezent bann kominote nou anvi vvar bann rezulta tanzib.

I osi senp pou mwan, so i pa bezwen ki ou annan en Konsey. Me ozordi nou’n vvar poudir Minister i deza pe *run* bann diferan programm, e zot ava koriz mwan si mon mal. Par egzantp toulstan i annan bann programm lo danze sigaret ek taba an zeneral, labi lalkol nesesite ki ankouraz bann dimoun pou fer legzersis. Konpanny donn tete pti baba, bon zafer sa.

Kanpanny nitrisyon, manz byen, Dyabet, tansyon, latak. Mon vvar bann *posters* lo bis tata partou e zot osi annan bann NGOs ki donn en koudmen. So, *HIV/AIDS* osi i parey.

Savedir si ozordi dan departman kot Dokter Jude Gedeon i ete, *Public Health*, ou annan en *health promotion unit* laba. E donk si nou annan nou en *programs manager* ki ganny anploye e atraver Bidze i fer en programm dan lannen poudir nou pou annan *workshop*, nou pou annan seminar, nou pou

fer bann depistaz dan landrwa travay, nou pou al dan bann kominote, mon pa vvar difikilte pou nou dir en sel kou *HIV/AIDS* pou ganny oubliye akoz Konsey pe disparet.

Non, pa ditou. *If anything*, nou koman bann Manm ki reprezent bann kominote, nou bezwen dir nou le vvar ankor bokou plis vizibilite. Akoz par egzantp mwan depi ler mon *MNA* Mont Buxton, mon pa’n zanmen ganny aprose par personn ki ava dir ek mwan, “Be nou anvi vin kot ou pli gran *housing estate*, nou a met en latab anba en latant, nou a kapab fer bann *rapid test*” akoz mwan mon’n fer, zour mon ti pe pas Anse Aux Pins zot ti pe fer anba en pye bodanmyen o bor lanmer. Mon’n arete mon al fer pou mwan. E zot vin isi kot Lasanble, pa nou fer tou le-z-an nou tes *HIV*?

Sa i kapab ganny anmennen dan kominote *and this is* pou mwan, i bann propozisyon ki koman en Lasanble serye, ozordi nou ti merit pe fer, pou nou fer sir poudir size *HIV/AIDS*, i pa perdi dan limazinasyon piblik Seselwa. Akoz i reste en defi.

E koman en pti nasyon ki pe fer fas ek tou sa bann problem obesite, Kanser, *HIV* nou bezwen milite. Mon a servi

sa mo pou montre lanfaz ki nou merit met lo la pou ki nou popilasyon demen i pa zis ganny konfronte avek tou sort kalite problemm.

So, koman bann Manm Lasanble nou bezwen fer sir poudir nou kontinyen gard sa tapaz. Nou'n fini kase silans, annou gard sa tapaz ki nou pe fer lo size *HIV/AIDS*. Nou bezwen asire ki nou pep i kontinyen ganny edike, ganny enformen pou ki alor nou redwir linyorans lo sa maladi, e ki nou redwir ouswa nou retir lafreyer lo sa maladi.

Nou bezwen anpes prezidis ek stigmatizasyon bann dimoun ki pe soufer avek sa maladi, e donn bann bon legzant bann ki pe swiv zot tretman e pe viv plizyer lannen. Nou bezwen kontinyen ankouraz mobilizasyon aksyon vizavi *HIV* dan nou sisyete, dir avek bann NGOs kontinyen travay, kote zot pou al tap laport pou ganny larzan bann keksoz koumsa.

Mon ankouraze par sa group Parlman ki nou annan dan Lasanble, ki son *Chairman* i Onorab Bistoquet. Zot pe deza fer bann travay fantastik e i annan en lespri Seselwa otour sa komite, napa politik ladan ditou. Mon felisit zot pou sa, kontinyen sa bon travay.

Koman Manm Lasanble nou bezwen regard bann Lalwa. Nou bezwen regard bann Polisi, nou bezwen regard bann plan e avek bann aksyon nasyonal ki pe ganny fer e pou asire ki i annan finansman ki pe al ladan. So, ki alor Sesel i kontinyen fer en progre dan sa domenn.

Nou bezwen asire poudir bann, bann dimoun ki soufer avek sa maladi ouswa bann group vilnerab Mr Speaker i annan tou bann proteksyon neseser. Nou bezwen fer sir poudir bon servis lasante i reste a zot dispozisyon, e sirtou bon servis lasante dan kominote ki nou, nou rezante isi anndan.

E enn bann keksoz ki letan mon ti pe lir en lartik vizavi propagasyon sa maladi, zot asosye li avek lapovrete. Akoz parfwa bann dimoun ki pe viv lapovrete i kapab ekspoz zot lekor avek bann aksyon de risk, ki kapab. E alor nou pe koman en pei lapovrete i enn nou bann lager. So, nou bezwen kontinyen pouse, sa langaz ki nou bezwen pe koz lo la.

E bomaten nou'n anmenn - depi yer nou pe koz lo en Mosyon anmennen par Onorab Samynadin lo kestyon paran pou edik zanfan lo zot konportman. Vwala en landrwa

kot nou merit met aksan ankor dan sa lalit, pou anpes *HIV/AIDS* kontinyen propaze. Akoz i dir ou i bokou pli fasil pou bann zenn sanz konportman, ouswa adopte en novo fason viv konpare avek adilt.

Alor vwala nou bezwen met aksan lo nou bann zanfan. Ler nou al kot lekol, demen lafet zanfan en kantite nou pou al kot lekol. I bann konversasyon ki nou merit pe annan avek bann zanfan.

Donk, Mr Speaker Sesel i pa premye pei ki ferm en *AIDS Council*, i annan bann lezot pei. Leta-z Ini i annan bann Leta ki zot *AIDS Council* in fermen, Lostrali i annan bann Leta ki zot *AIDS Council* in fermen. Me sa ki enteresan, i se ki souvandfwa bann pei kot nou'n vwar sikse Lostrali i enn, *Uganda* ti en pei ki *HIV* ti en problemm.

Ki in arive, se ki en sel kou Brazil, Lenn kominate *suddenly* in pran konsyans poudir sa i konsern nou tou. E tou dimoun in komans avek responsabilite personnel. Ki mannyer nou anmenn sa konpanny dan lekol, ki mannyer nou adres nou bann dimoun aze, bann group vilnerab, politisyen mannyer nou mobiliz zot pou kontinyen koz lo sa size.

Tou dimoun in vin ansanm, vin ansanm pou nou lager antoure kont sa defi. E si nou pran en menm lapros parey kit nou pei prop, lager kont drog, pran travay koman en pasyon nasyonal. Se dan menm laliny ki mon krwar nou merit fer vizavi *HIV/AIDS* Mr Speaker.

E alor mwan mon napa krentif poudir programm sensibilizasyon parmi popilasyon i pou arete. Mon napa krentif.

Mon ava ankouraz Minister Lasante e la i annan bann zofisyen, PS e Dokter Gedeon ki ansarz *Public Health Authority*, pou nou regard ankor en kou sa *unit* dan Minister Lasante la ki dil avek mon'n fek dir taler son non mon'n bliye.

I konsern tou bann konpanny, medyatizasyon. Ki mannyer, asire ladan i annan bann dimoun kalifye, bann dimoun ki pasyonnen pou kontinyen anmenn sa mesaz. Akoz toulstan mon'n dir, mon ava fini lo la Mr Speaker, ler mwan mon ti pe grandi sanniter ti pas dan kominate, ti edik nou lo bann keksoz; avan ou zet en keksoz dan sa bann bwat, perse pou delo pa reste. I bann ledikasyon ki nou'n grandi avek.

So, si nou kontinyen fer sa ozordi, non selman nou pe koz lo *HIV* me mon pe koz lo nitrisyon, koz lo fer legzersis, koz lo tansyon ki mannyer nou pou remarke si en dimoun pe ganny latak. Kwa ki zou bezwen fer pou anpes latak leker bann keksoz koumsa, pou nou ban zom ki'n sot 40an prostat.

There's so many things we have to be mindful of, me nou bezwen en unit dan Minister Lasante ki kontinyelman drive the message home, drive the message home, nou pa bezwen en Konsey. En unit i kapab fer sa. E mon satisfe poudir CDCU pe fer en bon travay pou ed bann dimoun avek zot tretman, e mon ti ava dabor felisit tou bann dimoun pou tou louvraz ki zot in fer.

Partikilyerman Dokter Anne Gabriel e son lekip. Mon bann koleg an medya, par egzamp Thelma Pool ki tre pasyonnen *about size HIV/AIDS.*

So, pou bann ki pe fer kontinyen fer byen e nou bezwen sirtou selebre bann ero pou konsyantiz dimoun lo sa zafer *HIV/AIDS.* E alor Mr Speaker mon ava dir poudir mon napa krentif ki sa Konsey pe ganny *repeal* ozordi, me ki travay ki i pe deza fer *if anything* i kapab ganny entansifye si nou

bann *advise* ki nou pe donnent ozordi i ganny pran o serye.

Mersi Mr Speaker e mon ava dir *welcome* Mrs Astride Durup zabitan Mont Buxton ki'n ariv Perseverance ozordi dan Lasanble. Mersi.

(APPLAUSE)

MR SPEAKER

Mersi Onorab, nou'n fer ase byen ek letan. Nou pou pran poz nou a gard limit letan apre midi parey mon'n anonse. Selman mon averti bann Manm ki pou lev lanmen apre ki petet mon pou bezwen reviz sa limit depan lo lakantite Manm ki lev lanmen. Nou a repran Lasanble 2er 15. Mersi.

(BREAK)

MR SPEAKER

Bonn apre midi tou dimoun, nou kontinyen deba e mon donn laparol Onorab Johan Loze.

HON JOHAN LOZE

Bonzour Mr Speaker. Mersi Mr Speaker. Mr Speaker mon oule komans par remersi Dokter Valentin pou son ekspose ki in fer avek *Bills Committee* yer. Kot in eksplik nou panse ki li i annan koman en profesyonnel lasante.

Me mon *further* oule egalman remersi li koman sa dimoun ki ti aktyelman *set up* sa Konsey Nasyonal ki nou pe *repeal* son morso Lezislasyon ozordi.

E parey labitid nou remersye tou nou bann travayer e profesyonnel lasante ki ankor pe *œuvre* anba bann kondisyon difisil pou gard nou pep an bonn sante.

Mr Speaker, en senp morso Lezislasyon devan nou, en *repeal Bill* i esansyelman pou fer sa ki Gouvernman li i term koman sanzman. Nou'n vwar poudir sanzman in plito kosmetik depi Gouvernman sanzman in pran pouvwar. Mon krwar zot ti komans par sanz non semen.

So, mwan pou mwan is *neither here nor there* si zot anvi *repeal* sa ouswa gard li. I zot prerogativ koman Gouvernman elekte.

Konsern *though* i vin pou bann programm egzistan, pou kontinite bann programm. I vin pou bann travayer ki travay, ki pe *served*. I vin pou bann ki pe viv avek kondisyon kronik ki ganny kouver anba, par sa Konsey. E i vin lo si nou kapab kontinyen delivre sa servis ki ti pe ganny delivre alaoter ki i sipoze ganny delivre. I osi senp ki sa.

Me si zot kapab fer li *then go ahead*. Nou vwar ki Minister Lasante i deza *embattled*, zot pe fer fas avek bokou difikilte e nou tou nou rode, nou serse ki fason zot ti kapab ganny apiye. Ki fason zot ti kapab ganny ede, ki mannyer nou kapab fer en kontribisyon pou sey ede ki zot travay i vin pli byen, pli eze, e pli fasil.

Be, Mr Speaker Gouvernman li i pou swazir pou fer sa ki li Gouvernman i pou fer. I annan en keksoz ki mon ti a kontan met a latansyon; nou pe komans devlop en *trend* kot nou kasyet deryer bann profesyonnel.

Bomaten mon'n tandem poudir i annan 2 profesyonnel la, zot pa'n ganny trennen la. Me en profesyonnel se en profesyonnel li. Desizyon ki ganny fer i desizyon politik. Si sa *Bill* i la devan nou ozordi, i en desizyon politik ki'n ganny fer par Gouvernman dizour. Bann profesyonnel zot in donn zot Konsey Gouvernman. Once zot in fini donn zot Konsey in fini, zot *abide* par desizyon ki Gouvernman in fer.

E koman bann vre profesyonnel, wi, zot vini zot siport travay of the Government ki zot *serve*. This is professionalism. E pou sa nou commend zot.

Nou'n *further* tande ki nou lo kote *United Seychelles*, nou ganny envite pou partisip dan bann diskisyon, dan bann *forum* nou pa vini, nou debout a kote. Be nou pou vin kwa e akfer Mr Speaker?

Zot al *attend* en forum avek bann profesyonnel ki dir zot pa fer sa ki zot pe fer ozordi isi anndan. Zot in *attend forum* zot. Zot *attend forum* profesyonnel i dir zot pa fer, zot vin isi anndan zot vin fer, zot dir zot in *attend forum*. Me zot menm zot in dir sa bann profesyonnel pa ti tro an faver sa.

Konnen ki i montre ou Mr Speaker? Nou annan dimoun isi anndan ki pa kapab debout avek son prop Gouvernman. Pa kapab debout pou dir ek son Gouvernman kwa ki byen. I pa kapab debout pou dir ek son Gouvernman kwa ki profesyonnel in dir li.

Me fout kwa ou'n al laba? E akfer oule nou vin laba avek ou? Ki nou pou vin fer laba ek ou nou? Pou nou vin laba ekout profesyonnel lasante, apre vin dan Lasanble fer lanver sa ki profesyonnel lasante in dir nou fer? *This is the issue.*

Mr Speaker, mon'n osi tann zot bomaten lev ankor sa size mefyans e zot pe kestyionnen lo la, akoz toultan

nou lev sa size. Mr Speaker sa mo mefyans i tre senp li, se ler en dimoun pa fye ou. En dimoun i mefye ou e nou annan bokou rezon pou nou mefye zot.

Lannen pase letan ti pas sa *Bill konsernan Awards*, mon rapel tre byen mon ti dir avek zot poudir akoz nou pe pas sa la? Kantite louvraz pou nou fer dan sa Lasanble. Kwa ki irzan ek sa *Bill awards*, zot vini zot vin pas en *Bill* pou donn meday. Zot pa ti ekoute, zot in pas zot *Bill fine* e ou konnen ki arive Mr Speaker? *Time has proven me right.*

Prezidan ti apwent sa komite le 30 May 2022, ziska ozordi ni en *award*, ni en *lanyard*, ni en lakord pou met en *award* anpandan avek pa ankor ganny donneen. So, *what was the urgency?* Akoz ki lannen pase nou ti bezwen lager pas sa *Bill* fini? I sa bann keksoz koumsa ki fer nou annan mefyans anver zot! I sa bann keksoz koumsa ki fer nou pa fye zot.

Yer swar mon get *Chairman Seychelles Pension Fund* i dir nou poudir an 2019 alegasyon koripsyon lo lenvestisman *Pension Fund* ti ganny fer dan Lasanble Nasyonal, e ou Vis-Prezidan ou ti enn sa bann dimoun parmi

lekel ki ti pe fer sa bann alegasyon.

E *Chairman Seychelles Pension Fund* ki zot, zot in apwente i dir nou tousala ti bann fo alegasyon. Pa vre, mansonz.

Be vwala sours nou mefyans. Se sa sours nou mefyans. Se sa ki ler ou war en *Bill* i vin devan nou ki sipozaman tre senp, nou dir zot be *hold on* en moman, nou pa vreman konpran ki zot pe fer, nou pe kestyonn zot lentansyon par deryer sa bann keksoz.

Be akoz se zot ki'n fer sa. Zot in annan en *history* vini dir en keksoz apre pli tar ki nou konpran. Se sa, sa mefyans ki nou dir zot. I senp, i pa en keksoz konplike.

Mr Speaker mwan mon napa naryen kont zot vini pas zot *Bill* mwan, zot kapab vini met *Bill*, tire, fer mannyer zot anvi. Parey Onorab Henrie in dir nou bomaten nou, nou plennyen, nou sant menm sanson, zot in deza tande sa ki nou'n annan poudir, *that's all right*.

Nou la pou konseye, non selman pou opoze. Nou la pou dir zot en pwennvi ki diverzans avek sa enn ki zot pe mete e Onorab Cosgrow in fer zisteman sa pli boner li. In vini in met tou bann pwen konsern ki nou, nou

ti annan koman en *caucus* devan zot e zot reaksyon in imedya, zot pa'n tarde pou reazir lo la.

So, mwan mon krwar nou les zot fer sa ki zot, zot annan pou fer, tan ki zot annan pou fer e konsern i kontinyen leve dan *meeting* piblik. Seselwa a kontinyen dir zot ki Seselwa i panse. E Mr Speaker ou konnen sa zafer mefyans zot pou kontinyen asiz dan *meeting* piblik repete ki zot in donn goute kan nou'n lager avek ...

(Interruption)

MR SPEAKER

Onorab eskiz mwan en pti kou, permet mwan adrese. Mon pa konnen si petet piblik pou krwar mon pe toultan pik lo Onorab Loze. Me selman Onorab mon pe demann ou, nou annan en *Bill* devan nou ziskan konmela dan ou adres ou pa'n tous en pwen lo sa *Bill*.

HON JOHAN LOZE

Mersi.

MR SPEAKER

Mon ti a kontan, les mwan dir pou dir ou premye dimoun ki pa koz lo sa *Bill* depi bomaten. Donk, mon ti a sipliy ou, annou silvouple pran en latitud en pe

pli annord avek sa ki nou sipoze pe fer e adres *Bill*.

Mon pa la pou mwan dir ou ki poudir, pou ekrir ou *speech*. Me selman mon la pou met devan ou ki Lasanble i ekspekte. Mersi Onorab.

HON JOHAN LOZE

Mersi Mr Speaker. Mon remersye ou pou ou, ou gidans e mon zis *put before the Chair* ki mon'n swiv legzanp Onorab *Deputy Chair* bomaten, ki'n *all over the place* dan son prezantasyon. In *all on and on*, in antre Lostrali parey son labitud in al rod sepa kwa laba Lostrali. Mwan mon'n zis swiv legzanp ki mon'n vwar devan mwan ozordi dan Lasanble Nasional Sesel.

E mon ti krwar mon pou ganny menm privilez ki Onorab Henrie in gannyen, me *obviously* Loze mazanbik epe son tretman pa parey. So, it's ok mon abitye mon avek Mr Speaker, se pou sa ki mon mazanbik epe mwan mon pa santi sa bann keksoz mwan.

Me selman *there again* mon le met devan ou Mr Speaker, poudir mwan la mon pou kontinyen koz parey mon koze. Mon pou toultan koz parey mon koze.

Mon pa konnen si zot pa konpran poudir mon annan en lodyans la deor mwan.

(laughter)
(Interruption)

HON JOHAN LOZE

Mon pa konnen si zot pa tandé poudir dimoun pe ekoute la deor.

MR SPEAKER

Order please!

HON JOHAN LOZE

Mon pa konnen si zot pa konpran poudir pa Loze ki'n koz mansonz poudir i annan koripsyon dan *Pension Fund* apre pou zot prop *Chairperson* vini, vin dir zot lalang Mr Speaker. E la devan nou ozordi i annan enn sa bann ki'n koz lalang lo *Pension Fund*. Mersi Mr Speaker.

MR SPEAKER

Onorab mon pa aksepte ki ou'n fer lakizasyon avek Vis-Prezidan ki in koz lalang, mon pa konnen ki konversasyon ou pe fer referans lo la. Me selman mon krwar poudir ou komanter i *out of order*. Mersi.

HON JOHAN LOZE

Mon aksepte ou gidans Mr Speaker, mon ava al rod

verbatim tou sa ki Vis- Prezidan ti dir an 2019 ki *Chairperson SPF in denied* kategorikman yer. Mersi Mr Speaker.

MR SPEAKER

Mersi. Onorab Audrey Vidot ou lantervansyon silvouple.

HON AUDREY VIDOT

Mersi Mr Speaker. Bonn apre midi Vis-Prezidan avek ou delegasyon. Mr Speaker, atraver ou mon le dir avek Onorab Henrie parey i pa nouvo pou *LDS* vwar e antann pozisyon *US* opoze lo sa bann reform dan Lalwa, parey sa enn ki devan nou dan Lasanble ozordi, nou osi pa nouvo pou vwar e antann *LDS* lo son kote latab pe zis *rubber stamp* tou sa ki son ladministrasyon i anmenn devan nou Lasanble.

Nou rekonnet travay ki *National AIDS Council, NAC* in fer pou edik popilasyon lo maladi *HIV/SIDA* avek atraver son bann seri programm ki bokou Manm ki'n entervenir depi bomaten in fer resorti, e nou dir zot mersi tou bann Manm ki'n partisip dan sa *Board* ki'n montre zot langazman e devosyon atraver *NAC*.

Mr Speaker si i annan en parti politik ki pa'n zanmen per sanzman e ki'n anmenn vre

sanzman dan sa pei se pa lot ki nou *United Seychelles*. Parey Onorab Pillay i kontan dir e i kontan *remind* zot, "Si zot asize ek en desen ranpli avek bann programm developman e proze ki Gouvernman *US* in fer dan sa pei ek bann striktir ki'n met an plas, rod en lagonm efase zot pou ganny zot en papye vid".

Zot pa vwar e konn apresye keksoz ki'n ganny fer diran tou sa lannen, alors pa vin koz avek nou, nou per sanzman. Me sa ki nou dir zot e nou pou kontinyen dir zot, wi nou lo sa kote latab nou pou kontinyelman mefye zot. Nou pa *trust* zot!

Zis parey zot bann Minis e zot prezidan ler i vin devan Lasanble, i fer promes avek nou, avek pep Seselwa, me apre i montre nou poudir zot Gouvernman pa kapab delivre. E zot bann desizyon ki zot pran i enpakte lo bann travayer, ki swa nou bann profesyonnel dan bann diferan Minister e apre nou vwar poudir Gouvernman i vin inefikas.

Mr Speaker, Lendi le 29 May 2023, apre swiv en seri programm bann prezantasyon ki bann diferan lorganizasyon ti prezant avek manm Komite *Communicable Disease HIV/AIDS and SRHR* pou Lasanble Nasional, mon ti poz

en senp kestyon zis apre swiv zot bann prezantasyon.

Eski bann Lalwa ki Gouvernman i vin anmenn devan Lasanble, eski zot lorganizasyon non-gouvernmantal ki form par sositete sivil, eski zot ganny konsilte? Larepons ki mon ti gannyen ti non.

Mr Speaker i annan ankor Manm lo sak kote latab ki kapab demanti larepons ki mon ti gannyen. Alors eski zot pe dir ek nou sa bann dimoun ki'n konfirm ek nou poudir i mank konsiltasyon, i napa ase konsiltasyon oubyen napa konsiltasyon, zot ki pe koz mansonz avek nou Manm Lasanble? Ouswa atraver administrasyon kot Vis-Prezidan ?

Mr Speaker Vis-Prezidan i ava ganny son sans pou li reponn lo la. Me i tris ler ou tann bann zenn dokter ki dir ek ou ki promosyon zot pa gannyen, dan bann pozisyon kot zot vwar zot pe travay pou zot kapab kouver bann spesyalis ki annan mankman dan pei, zisteman akoz ladministrasyon avek son bann Polisi e son bann sanzman - zis parey sa enn Lalwa ki la? Mon donn legzanp zot *foreign policy* ki zot in vin avek ozordi, zot mank en kantite spesyalis ki ti

kapab fer diferans dan nou Lopital Sesel.

Mr Speaker si pa nou lo sa kote latab ki kontinyelman anvoy lavwa pou dir avek Minister Lasante bann konsern ki egziste, ki bann profesyonnel lasante i met dan zot latansyon ki bokou fwa pa ganny tande.

Ozordi mon konpran prezan ki zot pe ganny zot spesyalis, mwan mon kontan letan zot dir nou, nou gannyen. Akoz i soulaz nou bann travayer Seselwa ki nouveau, ki la e ki pe donn tou pou zot kapab donn kot zot kapab.

Mr Speaker, mon'n fer resorti sa bann pwen, akoz i annan son lenpak pou fer avek desizyon sa Lalwa ozordi. Nou'n fer en kantite kritik pou Minister Lasante, pa akoz nou'n anvi atak Minister Lasante. Me akoz nou'n anvi vwar en pli meyer servis.

Mr Speaker, in pas *repeal* pou APDAR. Nou'n pas *repeal* pou Elderly ek Disabled Council e la ozordi nou pe fer pou NAC.

Nou, nou la pou nou kestyonnen e rod leklersisman. Ladministrasyon in ganny son manda pou li fer pli byen. Si li i santi poudir *repeal* sa bann Lalwa, desizyon pou fer sa bann Lalwa vin ganny *repeal* i form parti son reform pou fer pli byen, me konsern ki ganny

souleve ki fors nou lo sa kote latab demann kestyion, se akoz piblik apre i vin kot nou poudir nou problem?

Akoz ler zot al kot *channel* apropriye i antre dan en zorey, i sorti par lot kote. E mon bann koleg in fer resorti ki dan *meeting* piblik kontinyelman sa bann menm konsern pe ganny souleve.

Ki mannyer en Minister ki deza pe rape lo son zenou pou li kapab sey *meet* bezwen e demann nou bann pasyan, nou sitwayen; sa bann profesyonnel ki fer sakrifis pou travay dan Departman Lasante zot mank resours.

Me nou vvar en ladministrasyon ki kontinyelman vini, fer bann sanzman kot i kontinyelman ranpli, ranpli, ranpli zot bann *portfolio*, avek plis travay ankor me napa okenn sipor ki vin aport zot.

Mon'n regard prezantasyon NAC, son bann *challenges*. Ki mannyer avek sa presyon ki Departman Minister Lasante i fer fas avek i pou kapab *overcome* sa bann *challenges*.

I annan plen zot sa bann lorganizasyon ki ti atase avek *National AIDS Council* osi byen ki travay pros avek Minister Lasante i annan konsern, zot

ganny bann *challenges* pou zot kapab enplimant sertern zot bann programm.

Akoz zot bezwen sipor Minister Lasante. E zot pa pe ganny ase. I pa kestyion petet pa anvi donn zot, me kestyion resours. Kestyon pou fasilit zot avek sa *manpower* pou zot kapab fer li.

E bokou sa bann travay nou pe koz ki tous nou bann dimoun dan kominate. Mon konpran zot soufrans akoz mwan depi a laz 13an mon'n angaz mwan dan bann programm, ki bann diferan lorganizasyon non-gouvermantal in fer spesyalman ki tous lo ledikasyon lo VIH/SIDA. E san sipor, san resours i pa fasil pou zot.

Alors mon swete ki dan repons ki Vis-Prezidan i a donn nou, i a kapab elabor lo la pou dir nou ki pou arive avek sa bann lorganizasyon ki anba Minister Lasante ozordi, si zot pa pe *meet* zot bann *achievement* ki zot in set pou zot fer. E ki lenpak i pou annan dan nou bann kominate kot nou bann dimoun i bezwen sa bann servis. Mersi Mr Speaker.

(APPLAUSE)

MR SPEAKER

Mersi Onorab, mon a donn parol Onorab Naddy Zialor.

HON NADDY ZIALOR

Mersi Mr Speaker. Bonn apre midi Vis-Prezidan e tou dimoun ki lo *panel*. Bonn apre midi tou dimoun ki a lekout. Annefe Mr Speaker bokou pwen ki ti lo mon feye in fini ganny dir. Me parkont letan mon pe ekout deba, mon annan serten kestyion ki petet mon ti ava demann avek *panel* ki ti ava netway en pe, oubyen tir serten dout ki pe ganny met dan lespri bann dimoun.

An premye lye, eski NAC dan son konpozisyon ki parey i ete la, eski i ti pe travay an izolasyon avek Minister Lasante? Esaki petet Vis-Prezidan, eski bann diferan Konsey ki oparavan Gouvernman aktyel in *repeal* e in dizourd, eski zot fonksyonnman, oubyen sa in sezi fonksyonnman ki zot ti pe desarze oparavan? Oubyen in annan kontinite dan serten travay ki pe ganny fer?

Mon demann sa kestyion parske Onorab Deputy Speaker in fer, in koz longman lo la. Nou kontinyelman pe donn lenpresyon ki konmsi avek bann disolisyon bann *Board*, konmsi ou a krwar sa bann fonksyon e sa sanzman

responsabilite savedir tou in fini.

Annefe i pa leka. I pa leka ditou parske mon a pran en legzanp tipik se ki'n annan bokou leokri, se Konsey Nasyonal pou bann dimoun avek Dezabilite. In annan bann menm largiman ki ti ganny mete isi dan Lasanble. Ki pou napa, bann dimoun pa pou ganny lasistans, *trust fund* ki ti annan *available* pa pou fonksyonnen.

Me nou'n vvar poudir in annan en restriktirasyon e departman pe desarz sa bann rol. So, mon ti a kontan Vis-Prezidan dan ou larepons petet re edik ankor nou bann Manm isi dan sa Lasanble e Lepep Seselwa, ki direksyon ki sa Gouvernman i anvi ale Mr Speaker.

Mon pou profit lokazyon avek sa *repeal*, pou mwan osi zwenn avek lezot mon bann koleg pou felisit bann dimoun ki'n travay san ses pou fer sir ki *HIV and AIDS* i vin...

Nou'n kas sa baryer, *well* pa tou baryer ki'n ganny kase e mon pou tous en pti git lo la. Me in nepli en tabou. Lontan i ti en tabou, nou ti per pou koz lo la, nou ti per pou adrese. Serten dimoun ti menm per pou koz avek en dimoun ki zot konnen i annan *HIV* oubyen *AIDS*.

Me gradyelman in annan travay ki'n ganny fer isi e dan lemonn antye pour ki nou normaliz sa maladi Mr Speaker. E sa mon tir mon sapo avek tou profesyonnel, avek tou dimoun. Sirtou bann dimoun ki pe viv avek sa maladi, ki'n *champion* sa *advocacy* pou fer konpran avek nou popilasyon poudir letan ou pe viv avek sa maladi *HIV and AIDS* i pa vedir ki ou merit annan diskriminasyon.

Dan fonksyonnman Konsey ki pe bouz avek Departman Minister Lasante, mon ti a kontan petet Vis-Prezidan, parske letan nou'n ekout deba i tou depan ki bout ki dimoun pe ekoute oubyen ki bout zot in met on zot TV.

Mon ti a kontan ou eksplik, ou remet lanfaz lo fonksyonnman bann *staff* ki ti pe travay avek sa Konsey. Parski i annan en keksoz ki ou'n fer resorti, ou ti annan 5 *staff* anploye avek mon krwar 15, 13 dimoun ki ti lo *Board*. So, 15. So, petet ou ti ava dir en ptigin fonksyonnman.

E pli enportan la, mon ti ava lans en lapel avek, avek sa novo fonksyon pou osi regarde ki mannyer nou pou fer sa *trust fund* vin pli aksesib. Dan ki konteks mon pe dir sa, parske nou'n dir ki sa *trust fund* i *available* pou bann NGOs. So,

petet dan zot *reply* endik nou en ptigin lekel sa bann NGOs, lekel zot ki vreman bann programm ki zot ti travay an korperasyon.

Parski la mannyer nou pe ekout serten largiman ou a krwar NAC ti travay an izolasyon. NAC ti travay an izolasyon e Minister Lasante ti napa naryen pou fer avek. E la konmsi letan pou met li anba Minister Lasante, konmsi i pou mor.

So, konmsi dir nou ki bann korperasyon ki'n annan, ki bann programm. Eski sa bann programm pou kontinyen? Eski sa bann NGO's zot pou kontinyen ganny akse avek sa *trust fund*? Me sa ki pli enportan, petet letan nou pe re envant fonksyonnman sa departman, annou regarde dan ki fason ki nou fer sa servis e sa programm vin pli aksesib, vin pli disponib a la baz kominoter.

E la mon mazinen ouver li plis avek bann diferan *targeted group*. Petet ou annan bann NGOs ki pa neseserman li i annan en *banner advocacy* direk avek *HIV and AIDS*.

Me i kapab en NGO ki annan pou fer avek lazenes, me selman i anvi fer *advocacy with regards to targeted group youth* ki mannyer i ganny akse.

E mon swete petet dan ou klotir Vis Prezidan ou ava fer

nou konpran si pou annan petet en odit *with regards to* sa *trust fund*, ki mannyer in ganny servi? E ler i pe transfer anba Minister Lasante, atraver Minister Finans, ki bann kriter ki pou annan a disponibilite bann dimoun.

Alors Mr Speaker, mwan mon pou ankor enn fwa siport *the repeal of the Board*, parski mon konsyan e mon konnen ki sa legzersis parey in ganny dir oparavan dan sa Lasanble ti pou annan diferan faz. E la nou'n ariv sa faz konsernan sa *Board* li menm.

Sa ki enportan se ki nou kontinyen nou koman bann Manm Lasanble annan en avan gar lo kan in ariv ler pou demann kestyon. Pa pou konfiz dimoun, me pou ed sa Minister bouz devan. Me pli enportan, nou kontinyen avek sensibilizasyon *HIV and AIDS* e tou bann lezot *STDs* Mr Speaker.

Avek sa 2 pti mo, mon pe aport mon sipor pou *the repeal of the Board*. *Thank you.*

(APPLAUSE)

MR SPEAKER

Mersi Onorab. Mon annan zis le 2 *Leaders* Lasanble ki lo mon lalis, mon oule zis fer sir ki mon pa pou ganny okenn lanmen ki

leve apre. Mon a pran zot pou termin deba. Bon, nou a pran le 2 *Leaders* e nou a termin deba la. Onorab Pillay.

HON SEBASTIEN PILLAY

Mersi Mr Speaker. Mersi pou donn mwan laparol e mon swete ki ozordi apre midi mon koleg *Leader* pa ava plere ki mon pe koz, lev lanmen apre li. E ki ou pe donn mon laparol apre li.

Mr Speaker, ou konnen i annan diferan keksoz ki arive dan Lasanble ki fer ou kontan listwar i en keksoz ki vivan, ou kapab viv li, ou kapab vvar li. Mon dir sa Mr Speaker akoz merit sa *repeal* ki devan nou i al dan sa leksplikasyon ki Vis-Prezidan in donnen an relasyon avek bann restriktirasyon ki Gouvernman i fer.

Sa son merit ki Vis-Prezidan in prezant devan nou. Mon pou vin lo la en pti moman akoz i enportan ki nou sitye sa deba ki'n ganny fer la.

Premyerman atraver Onorab Zialor ki'n koze, mon pa ni konnen si in lir sa *repeal Bill* akoz i pa paret in lir. A en moman i pe nonm *DAC*, a en moman i korize i nonm *NAC*, en moman i nonm *HIV* ek *STDs*, ki i montre ou poudir nou pa'n fer en zefor pou nou konpran ki nou pe koz lo la.

Me nou'n zis anvi vin fer en konversasyon lo la zis pou prouve avek nou bann met politik ki nou dakor ek tou keksoz ki zot fer.

E mon'n note an passan ki pandan letan ki i pe koze tou bann pwen ki i pe demann Vis-Prezidan pou eksplike, Vis-Prezidan pa'n not ni enn, ni enn i pa'n ekrir. Akoz Vis-Prezidan i konnen poudir son Lalwa pou pase *whether* Onorab Zialor i demann son bann kestyon oubyen non.

Akoz se ki nou annan lo lot kote latab, *let's face it* i en *rubberstamp*. I en *rubberstamp* Mr Speaker. Ok. E mon kontan ler mon tann bann Onorab i mirmire i dir parey nou lontan. Se sa ki mon dir listwar, sa ki mon'n dir. Konmsi mon kontan ler zot dir mon lontan, akoz listwar i repet son lekor.

Dan plas pep Seselwa ganny en sanzman in ganny *more and extra of the same*, e i fer lapenn. I fer lapenn, akoz i paret mwan sa Lasanble napa en abilite pou li mazin lo lezot keksoz apard ki tonm dakor ek sa ki Gouvernman in met devan li. E si en kote i opoz sa, *then* nou ganny *label* koman diferan kalite non, diferan kalite latak i ganny fer.

Annou met an perspektiv sa pwen restriktirasyon.

Gouvernman in fer restriktirasyon lo diferan *Board*. Ti annan en *Miscellaneous Repeal Act* ki ti *repeal 2 Board*. Enn parmi i en *Board* ki Onorab Zialor atraver ou, in mansyonnen.

Me ki Onorab Zialor ti devret kapab dir nou apre midi Mr Speaker, akoz i en dimoun ki mon'n estim li lo son travay ki in fer ek bann dimoun i dezabilite, i ti devret kapab dir nou kareman poudir sa departman pe fer son travay pli byen ki avan, me i pa'n kapab. I pa'n kapab. Ou konnen akoz i pa'n kapab Mr Speaker? Akoz i pa korek ki travay pe ganny fer pli byen. Sa i premye pwen.

Prezan dezyenm pwen, Gouvernman ti osi koz lo bann *phase restructuring*. Enn bann landrwa ki ti koz lo *phase restructuring* sete *Sports Council*. I ti fer en *phasing out of the Board of the Sports Council*, Konsey Nasional pou Sport ti fer en *phasing out*. Tou pouvwar sa Konsey i ti donn Minis.

E la mon pou eksplike akoz mon pe vin lo sa pwen, akoz nou pe al ver sa zafer *restructuring*. Me selman yer dan Lasanble Minis i dir ek nou koumsa poudir pa li ki ti siny en kontra, pa li ki ti donn lotorizasyon pou en kontra ki'n ganny sinyen ant *Sports Council*

avek en federasyon - swadizan en federasyon.

Me sa ki enteresan dan *statement* ki i ti fer dan *verbatim* Lasanble, se li ki'n pran fonksyon sa Konsey. Savedir se li ki'n donn lord e in *mislead* Lasanble. Me kot i al pli lwen Mr Speaker, sa kontra an relasyon ek sa Lalwa ki ankor egzistan, pa donn sa CEO pouvwar pou siny sa kontra, san ki i annan en *due diligence* ki ganny fer.

E mon annan en kontra devan mwan ki mon kapab idantifye CEO NSC, me selman mon pa kapab idantifye lekel sa bann lezot endividé ki'n siny sa kontra. Eski se sa standar i Gouvernman LDS pe dir mon i *restructuring* ozordi?

Mon al pli lwen Mr Speaker, *restructuring* lo size *subsidy* pou fermeye. Avan mon vini mon'n tyek ankor avek bann fermeye e masiv problem. E nou, nou ti opoze sa nou. Nou pa ti opoze akoz i Gouvernman ki'n vin avek e nou osi nou anvi opoze, non. Nou ti prezant bann pwen lezitim pou zot kapab konsider lezot alternativ.

E ou, ou ti vin dan Lasanble ou ti eksplike, ki sa i fason fer ou Gouvernman nou, nou ti annan nou fason fer. Me la bann fermeye pe soufer, zot pe ganny afekte avek ou *removal of*

subsidy. Me selman *still* nou pa kapab dir naryen. Personn pa pou koz lo la, personn pa pou dir.

Konmsi mwan mon ti a kontan ganny en konpran, si nou dir poudir nou en Lasanble e nou prezant bann lopinyon alternativ lo en keksoz ki pe ariv devan Lasanble, nou, nou pa pe opoz Gouvernman nou, nou santi poudir a sa moman *repeal National Aids Council is not the right move*, sa ki nou pe dir.

Rezon pour sa se akoz dan son leksplikasyon lo komansman Vis- Prezidan in *actually* donn rezondet akoz sa Konsey i devret ganny plito revwar e son rol ganny aziste avek kondisyon ki nou ladan ozordi. Annou admet sertern keksoz Mr Speaker, an relasyon ek sa konsep.

Wi tretman in fer ki la fason ki nou *manage* e pran sarz en dimoun ki ganny *VIH/SIDA* in evolye. Me i annan bann lezot *prevailing factors* ki'n antre an zwe ki i demande ki nou kontinyen annan en lentervansyon akoz i annan bann koneksyon ant *VIH/SIDA* e lezot bann, si oule bann kondisyon ki asosye ek bann *social needs* ozordi. Par egzanp Epatit C.

E si nou regard dan Lalwa, Lalwa sa Konsey, ki Vis-

Prezidan pa'n koz lo la. Dan Lalwa sa Konsey i annan en clause ki klerman dir ou poudir sa Konsey i fer lyezon e li ki fer si oule sa koneksyon dan ou bann lantervansyon Gouvernman an sa ki konsern Epatit C, an sa ki konsern tiberkiloz, antre lezot.

E se pour sa rezon ki nou, nou pe dir, poudir be annou revwar akoz nou annan en *real problem* avek *Hepatitis c* par lefe ki nou annan nou *over 10 thousand addicts* ki pe pike. *That's the point, that's the gist.* Se sa rezondet nou largiman avek ou ozordi apre midi.

Me i paret poudir ler nou fer sa bann largiman dan en fason entelizan nou pa ganny ekoute. Nou bezwen fors largiman dan en fason pour ki Gouvernman i pran konsyans serten aksyon ki i pe pran e dan serten direksyon ki i pe ale.

Be la les mwan prezan adres sa size eksper. Wi i annan 2 dokter ki imineman kalifye devan la e ki mon annan tre, tre gran respe pou zot. Me i osi annan bann eksper ki ti vin devan en Komite Lasanble. E sa bann Manm Lasanble ki'n attend sa *meeting* in fer en *disservice* sa bann expert.

Akoz sa bann expert in osi dir ki enn zot bann *challenge* se *repeal of* sa Lalwa. So, ki

mannyer nou kapab dir *Caucus US* pa oule zwenn ek *expert?* Be rezon nou pa'n oule zwenn ek *expert* se akoz Gouvernman in fini pran desizyon. Gouvernman in fini dakor lo ki zistans i oule ale.

Par egzanp Mr Speaker, nou fek ganny en demann pou nou zwenn avek Komisyon Eleksyon. Be Komisyon Eleksyon ti dir nou la *dans la personne de* Onorab Vis-Prezidan, ti dir nou dan Lasanble ki li pa enterese pou konsider nou bann propozisyon. Be akfer oule zwenn ek nou? Zis pou nou *endorse* en keksoz ki ou'n fini tonm dakor lo la?

But there's no point nou pou fer sa kalite aktivite dan sa Lasanble. Nou bezwen *être* realis e apresye lefe ki rol en Lasanble, se pour li fer son travay dan en fason lozik e lezitim-man anmenn bann konsern ki i annan devan.

Me si nou pa kapab fer sa, *then* Gouvernman pou *still* pran son desizyon avek son mazorite, be i pou bezwen viv ek konsekans son bann desizyon. E si ou a permet mwan Mr Speaker, enn bann eleman kle sa merit parey mon'n dir ou se sa *restructuring*.

Si nou dir merit sa Lalwa i stand lo sa *restructuring* ki

Gouvernman pe fer, annou regard restriktirasyon ki Gouvernman in fer avek prosesis ASP.

Nou, nou'n dir ti annan problemm avek. Bann *MNA* lo lot kote latab in ganny plizyer *call* ek plizyer dimoun kot i annan problemm, kot i annan menm Onorab Zialor i konn tre byen atraver ou Mr Speaker, ki in dir avek sa bann endividé ki se bann *US* dan Gouvernman ki pe sabotaz bann aplikasyon.

Me selman, selman pa *US* ki'n apwent nouvo *CEO*, pa *US* ki'n fer sa bann apwentman. *But be that as it may*, nou ledo i larz anvoy lo nou. Dimoun, piblik i kontinyelman soulev konsern e ki nou tann dir? Apre nou pou rezourd ou problemm. Savedir nou pou bezwen fer en seri *public meeting* tou-le-z-an zis pou kapab adres problemm.

En lot size ki ti annan restriktirasyon ladan sete *part rental*, nou ti dir nou. E ti annan en revi total pou ekout sa ki nou ti annan pou dir lo la. Me ankor enn fwa piblik i kontinyelman soulev problemm ki zot pe rankontre.

Ekoute, mwan mon pa pou etann pour *être* en eksper dan *part rental*, me i lozik pou ekspekte poudir si sa kantite dimoun pe *raise* en konsern lo sa size, alors i annan en

problemמ avek sa restriktirasyon ki'n ganny fer. E ki alors i bezwen ganny aranze.

So, ou vin devan Lasanble avek en propozisyon restriktirasyon. Nou, nou dir ek ou poudir statistik ki ou'n prezant nou, mon dakor ou'n fer en pe plis zefor safwasi pou vin ek statistik - e mon apresye ki ou'n prezant nou - i donn en lendikasyon akoz ou devret gard sa Konsey.

Me revwar son rol ki i bezwen zwe *as* en, si ou le *as* en veikil akote Minister Lasante ki pe akonpanny Minister Lasante pro aktivman pou siport li dan son travay prevansyon, an relasyon pa zis avek *VIH/SIDA* me bann lezot kondisyon parey Epatit C.

Mon'n osi vvar *power point* ki'n ganny anvoie par *CDCU* e mon'n regarde. I kler ki *when it comes to the manpower* pou fer lenplimantasyon, *the heavy lifting* se *CDCU* ki pou bezwen fer. Me *CDCU* pou bezwen osi regard lezot eleman.

E mon krwar dan lasazes bann dimoun ki ti vvar en rezondet deryer met en Konsey a sa moman, nou pou annan en lot *health crisis* ki pou vini an relasyon avek *Hepatitis* ki pou kout nou en bon pe problemm. E nou bezwen fer fas avek.

Mwan mon santi poudir nou pa kapab zis *on the basis of* dir ki Prezidan in dir nou bezwen fer *restructuring* lo *savings*. Be ki *savings* ki nou pe fer, nou pe kit lamazorite depans lanmenm?

There's no savings, so the justification for savings i tonbe, the justification for restructuring i tonbe. Prezan mon ti ava aksepte prezan i ava annan en largiman, en merit lo en baz syantifik, lo fonksyonnman ki pou anmenn en rezondet deryer sa, be i napa.

Mr Speaker, resaman mon'n ganny plizyer dimoun pe demann mwan be akoz nou pa pe vvar Minis Lasante. Ozordi nou pa pe vvar Minis Lasante dan Lasanble. Si i ti la mon ti ava kontan met devan li osi, ki annan plizyer size ki Minister Lasanble i bezwen fer fas avek.

Par egzamp mankman *ENT* in fer ki dimoun ki ti'n *schedule* pou bann lentervansyon in bezwen retourn se zot, re ganny anvoye. I annan plizyer problemm ki sa Minister pe fer fas avek, ki mon krwar donn bann dimoun dan sa Minister letan pou *handle* bann problemm ki zot pe dil avek. E apre nou ava azout lezot keksoz ki nou bezwen gard en lizye lo la.

Nou kapab *share* sa responsabilite en pe pli byen, me si i annan keksoz ki pa ti pe fonksyonnen, oubyen ki pa ti pe marse parey i devret marse. Nou sanz *personnel* or nou *increase personnel as the key, as the case may be* pou nou fer li fonksyonn pli byen.

Nou, nou pa pe lager pou kit Konsey ouver. Sa ki nou pe dir se ki nou annan, nou santi poudir sa sityasyon adikt i kapab poz en *health emergency*, si pa deza pe poz en *health emergency*, ki nou pou bezwen annan en lot fason dil avek.

Me Mr Speaker ankor enn fwa ou a realize poudir nou, nou pe vin from en perspektiv ki nou vvar keksoz dan en ser ten fason. I pa vedir poudir Gouvernman i devret tonm dakor ek sa ki nou pe dir, sa ki nou pe propoze ki Gouvernman i zwenn nou *halfway*.

Me sa *repeal* in fin ariv devan Lasanble e ozordi apre i dir *there is no way* ki nou pou anpes Gouvernman *move ahead* ek son *repeal*, menm konsider en lot opsyon. E la mon met devan ou en keksoz Mr Speaker e mon kontan ler ou'n dir Onorab Loze ki i pa'n koz lo *Bill* ki devan nou.

Mon note an pasan ki Onorab Deputy Speaker in fer lentervansyon taler, i pa'n koz

preski ditou lo *Bill*, in koz lo tou bann size otour *Bill*. Ok, e a okenn moman ou pa'n aret li.

Nou pa ganny sa menm privilez pou ganny arete ler nou pa pe koz lo Lalwa parey serten dimoun i fer. Me sa petet i en privilez ki nou koman Manm Lopozisyon nou annan avek ou e nou apresye sa privilez.

Me selman en keksoz ki nou bezwen met an perspektiv Mr Speaker, i se ki a sa moman kot nou ete petet sa i pa meyer desizyon pou nou pran. E se sa ki nou oule pas avek Leminan Vis-Prezidan ki devan nou ozordi.

Me a lafen dizour nou napa en mazorite dan Lasanble pou bloke. E menm si nou ti annan en mazorite dan Lasanble pou bloke, kestyion ki mon krwar fondamantalman nou bezwen komans demann nou lekor ozordi se, eski servi en mazorite pou en gen politik i *the best way* pou nou fer Lasanble fonksyonnen?

E *for so long* in koumsa ki ozordi zot pa konn fer en lot fason apard ki koumsa. E sa i montre nou enn bann eleman esansyel dan largiman ki toultan mon tann Gouvernman *LDS* avanse.

E napa naryen ki ilistre sa pli byen ki sa size APDAR. Mr Speaker, Onorab Georges ek

mwan menm nou ti lo *Board APDAR*. E si ou a permet mwan Mr Speaker, Onorab Georges i a demanti mwan, nou ti al *attend* bann serten sesyon, bann sesyon kot APDAR ti eksplik nou son programm tretman e reabilitasyon.

E APDAR ti *believe* ki problemm adiksyon i osi en problem, i en *medical problem* osi, i en problemm lasante piblik. Caucus LDS ti rod tou fason pou atak APDAR e enn bann ataker sef sete Vis-Prezidan sa letan. E i lo *verbatim* la kantite kestyion ki in demande sak fwa APDAR i vini. Lekel 3 keksoz ou pe depans larzan plis lo la, lekel sa?

Menm sa proze sa sant reabilitasyon ti ganny bloke dan Lasanble, menm ler son larzan pa ti'n ganny vote pou li gannyen, akoz ti sipoze en *Grant*. E i la, i lo rikord, ou ki ti dir. Me ozordi Prezidan Ramkalawan i vire i dir nou menm keksoz ki nou ti pe dir sa letan, ki si nou ti'n fer depi sa letan, nou ti pou annan en sant tretman ki pe marse e pe fonksyonnen.

Konmsi nou, kan eski nou pou arete fer serten desizyon lo en baz zis politikman fer serten keksoz, akoz nou krwar poudir sa i meyer fason fer li?

Ozordi i annan nou nou'n ariv dan serten pozisyon e nou blye kot nou ti komans, nou blye kot nou sorti. E nou pa pe realize poudir demen nou bezwen kit sa pei pli byen ki nou, nou ti zwenn li.

E mwan mon krwar Mr Speaker senserman sa bann restriktirasyon, ler mon get sa rezondet deryer sa bann *Bill* restriktirasyon, sel keksoz sete ki Prezidan in dir i bezwen annan restriktirasyon.

Me selman nou'n restriktir dan serten landrwa, nou'n tir bann *Board* ki mwan mon krwar ti plito bann latak personnel, nou'n osi kre lezot *Board* selman. Nou'n osi kre depans dan lezot landrwa. Ti'n sipoze redwir depans, nou'n kre depans. Me selman nou'n redwir.

E sa ki fer mwan pli konsernen avek tousala, se nou kontinyen dir Seselwa diferan keksoz. Nou dir Seselwa poudir pei in faid, pei in *fail* 43an. Me selman nou al *Quatar* nou dir, pei i en *high income country*. in fer bokou progre. Taler Mr Speaker, atraver ou Onorab Bistoquet menm in dir Sesel in fer en ta progre. Be progre kan ti ganny fer?

Si pou enn fwa nou aret fer sa, e mwan sa ki mon pe propoze ozordi apre midi, nou

arete fer sa. E mon met devan ou Vis-Prezidan, ler mon regard ou bann statistik, mon regard prezantasyon ki'n ganny met devan, nou mon regard tou lede prezantasyon. Mon annan 2 la ki mon pe get an se moman, mon pe get sa enn ki *NAC* in donn nou, sa enn sorti kot *CDCU*. Mon vvar poudir i annan en konsern lo lafason ki *NAC* pe fonksyonnen, i annan.

E mon osi vvar poudir i pran li, met sa bann fonksyon ek Minister Lasante, mon pa pe dir ki Minister Lasante pa pou kapab fer li, me eski i pou kapab fer li alaoter ki si ou ti annan en veikil akote li? Mon santi ki Gouvernman ou deza annan sa, akfer ou re envant larou?

Sa ki ou annan pou ou fer se revwar li, re aranz li. Si ou bezwen *less* dimoun, ou servi mwens dimoun. Si ou bezwen plis dimoun ou met plis dimoun. Resours i dan zot lanmen *and then* nou *move* dan sa direksyon e nou komans target e dil ek sa bann problem ki nou bezwen dil avek.

Dapre ou prop admisyon nou *still* annan dimoun ki nou pa konn zot *status*, nou *still* annan lensidan ka ki pe ganny dekouver. Nou annan en kantite lensidan ka ki dimoun i

ganny dekouver, pa vin pran tretman. Me *CDCU* i deza pe *follow* sa bann dimoun e zot pa pe kapab ganny sa bann dimoun pou antre.

Eski alors zis *repeal* sa Lalwa e retir sa lot fason panse, dan plas si oule enzekte en pe plis lavi dan li *is the best approach* pou nou pran? E mwan mon met devan ou ki i riske pa *the best approach* pou pran.

E ki petet konsider ou menm ou, ou en zom ki konn byen bann sif;- ou bann sif i *speaks for itself, it speaks for the reason why* ou bezwen annan, annan sa lorganizasyon me petet revwar son fonksyonnman.

E mon asir ou si ou ti'n anmenn en Lalwa pou amann sa, ou ti pou'n ganny nou sipor. Ou kapab seye, ou tir sa *repeal* ki lo latab, ler i retourn ek en Lalwa pou amande ou a vvar si ou pa ganny nou sipor. Boul i dan ou kort Mr Speaker.

Mon pa kapab dir Gouvernman ki pou fer. Mon kapab zis donn Gouvernman mon pwennvi e mon pwennvi *is as* ki mon'n donn Gouvernman. E mon ti a kontan ki *going forward* nou sey fer Lasanble fer son louvraz ki i sipoze fer.

E sa se regard bann size pa zis *from* en perspektiv

politik, me regard li *from* en perspektiv ki benefis i ava annan pou piblik. Mersi Mr Speaker.

(APPLAUSE)

MR SPEAKER

Mersi Onorab. 2 pti komanter. Bann Manm a remarke ki mon'n *extend* letan ki *Leader Lopozisyon* in pran, 22 minit apepre. E mon'n fer sa akoz nou annan letan. Bann lareg letan ki mon ti fer se an previzyon pou nou fer sir nou fini nou travay, so pa kestyonn mwan lo la.

Selman mon oule fer en koreksyon pou *Leader Lopozisyon*. Mon'n ekout tou entrevansyon depi ler nou'n komans sa deba tre atantivman pou note ki mannyer nou reste lo size e ki mannyer nou depar.

E mon oule dir lo size entrevansyon Onorab Henrie, in fer detrwa komanter, avan i komans diskrit detay sa *Bill*. E sa detrwa komanter ti annan pou fer avek restriktirasyon bann konparezon keksoz ki'n arrive dan lezot pei e i ti lo size.

So mon rezet okenn lakizasyon *Leader Lopozisyon* ki mon'n koriz Onorab Loze, kan mon pa ti koriz Onorab Henrie. Sa i, mon fer sa zis pou fer kler ki poudir mon'n fer mon

devwar tre byen. Onorab Pillay ou pou obzekte avek sa?

HON SEBASTIEN PILLAY

Non, Mr Speaker. Mon oule zis met en koreksyon lo rikord ki mon koz lo persepsyon pa lo en lakizasyon.

MR SPEAKER

Persepsyon, mersi. *Ok. Ok*, mon permet prezan Onorab Georges pran laparol pou termin deba.

HON BERNARD GEORGES

Mersi Mr Speaker. Bonn apre midi Mr Speaker, Vis-Prezidan, *panel*, Manm Onorab e dimoun ki pe swiv nou.

Mr Speaker avan mon al pli lwen, mon'n aprann ozordi ki in annan en lanmor dan lafanmir Onorab *Leader Lopozisyon*. E avek ou permision e lo lapar nou *Caucus* dan sa Lasanble mon ti a kontan aport nou kondoleans a Onorab *Leader Lopozisyon* e son fanmir.

Mr Speaker, sa pa anpes mwan dir ki kantmenm in koz pou 22minit, *Leader Lopozisyon* ozordi ti'n kapab fer nou en faver e dan 2 minit dir nou tou sa ki in pran 22 minit pou li dir nou.

An 2013 Mr Speaker ler sa Lalwa ti pase dan sa Lasanble, ti annan 2 keksoz ki'n sanze

depi. Premyerman 2013 ti napa enn nou lo sa kote latab dan sa Lasanble. Annefe apard en Manm, Lasanble ti konpoze konpletman par Manm US ki sa lepok ti annan en lot non, mon'n blyie zot in sanz telman non ki mon'n blyie an 2013 ki mannyer zot ti apele, me i ti zot parti ki ti an grand mazorite apard enn parey mon dir dan sa Lasanble. Alor sa Lalwa se zot Lalwa preske konpletman.

E dezyenm faktor, dezyenm keksoz an 2013 se ki sityasyon *HIV/SIDA* dan nou pei i tre diferan avek sa ki i ete ozordi 10an pli tar. E donk nou bezwen regard sa lamannman, sa *repeal* ki devan nou ozordi dan sa konteks.

E sa konteks se ki letan i sanze, Gouvernman i sanze, devlopman en maladi i sanze. E nou bezwen a nenport ki moman, si en Gouvernman i bezwen respektif anver Lepep i bezwen respektif avek bann sanzman ki arive.

E i bezwen donk pran konsiderasyon, pran kont sityasyon lo teren, sityasyon li menm. Son *manifesto*, son propozisyon, son ladministrasyon e adapte pou anmenn bann striktir, pou met bann striktir an plas ki annan pou fer avek sa letan dan lekel

in viv e non pa dan en letan ki'n fikse avan.

E se pour sa rezon Mr Speaker ki nou annan ozordi en *repeal*. Akoz sityasyon SIDA parey in ganny dir par bann eksper ki'n koz avan mwan. Mwan mon pa en eksper ditou ladan, in sanze. Ozordi i en maladi kronik ki nepli annan sa bann problem ki asiste, ki avek parey ti ete en serten letan e set en sityasyon ki'n sanze e nou, nou bezwen adapte avek.

E nou annan en Gouvernman Mr Speaker ki son model travay se koup birokrali; koup depans initil kot i neseser dan en fason pou vin bokou pli performan. Napa naryen ki mal avek Konsey, bann Konsey i la. *C'est un luxe, c'est en nesesite a en serten moman letan.*

Me ler sa nesesite i sanze, ler ou nepli bezwen annan en Konsey ou pa gard en Konsey *for the sake of having* en Konsey. E la mon pa oule dir ki sa Konsey pa'n travay. Tel parey mon pa oule dir ki APDAR dan son letan pa'n travay.

Mwan mon ti en manm APDAR e i ti en komite ki mon ti kontan e ki mon ti asiste otan ki posib. Akoz mon ti vwar son merit, me son merit nepli neseserman la sa ki i ti anvi *achieve in achieve*. E donk ou bezwen bouze.

E donk mon bezwen rekonnet ki bann dimoun ki ti lo sa Konsey e bann travayer sa Konsey, zot in delivre sa ki zot ti bezwen delivre a en serten moman e lo nou kote nou remersye zot. Me nou dir zot ki sityasyon in sanze e alor nou bezwen adapte avek. Setou!

E mon konnen ki mon bann zanmi lo lot kote latab bann koleg Onorab i konpran sa. Me zot bezwen koz lo en *Bill* akoz zot in ganny elekte pou zot vin koz lo la e zot bezwen met zot bann pwen devan. Me i pa oule dir parey mon'n dir, pa akoz ou koz pandan 22 minit, ki i annan okenn keksoz dan ou parol ki neseserman fer okenn sans.

Alors Mr Speaker, mon ti a kontan eksplik avek Lepep ki pe ekout nou deor, avek bann dimoun egzakteman sa ki Onorab Vis Prezidan in dir ozordi.

Se ki akoz sityasyon nepli parey nou bezwen adapte avek e ladaptasyon akoz se sa Gouvernman ki ansarz sa pei, se sa Gouvernman i administre sa pei in santi li bon pou li anmenn en *repeal* pou sa Konsey. E pran fonksyon sa Konsey met li avek Minister tel parey in fer avek APDAR. E nou, nou pa vwar okenn

difikilte pou aksepte sa propozisyon.

E donk Onorab Vidot i ava dir nou ki akoz sa nou en *rubberstamp*. E i en parol enportan sa Mr Speaker, ki nou en *rubberstamp*. E mon pa konnen si Onorab i ekout son lekor ler i koze.

Akoz Mr Speaker, en *rubberstamp* set en Lasanble ki ler en keksoz ki vin devan li i dir wi met laba. Pa sa ki nou'n fer la ozordi. E i ava vwar taler akoz mon pe dir sa.

En Parlman, en parti ki en *rubberstamp*, si nou, nou ti en *rubberstamp* Mr Speaker, nou pa ti pou anmenn en sel lamannman avek okenn Lalwa ki vin devan sa Lasanble.

Me si Onorab i mazin semenn pase kot nou ti annan *PEMC Bill* se Vis-Prezidan menm ki ti la. Lekel. Lekel kote latab ki'n anmenn en santenn lamannman dan sa *Bill*?

(APPLAUSE)

HON BERNARD GEORGES

Zot, zot pa'n anmenn en lamannman, zot pa'n kapab trouv en lamannman malgre ki zot in koz lo la. Zot ki'n *rubberstamp* sa *Bill*.

Nou, nou'n anmenn an plis ki sa santenn lamannman ki *Bills Committee* in propoze, lo

sa kote latab nou *Caucus* in anmenn ankor en santenn lamannman, *rubberstamp* sa Mr Speaker?

Oubyen nou, nou en *Caucus* dan sa Lasanble ki fer son travay. E ki ler Gouvernman i anmenn en *Bill* devan nou ki nou vwar i bezwen ganny amelyore nou, nou amelyore li. Nou pa zis *rubberstamp* li, se zot mon bann zanmi ki bezwen fer en legzanmen konsyans. Se zot ki bezwen demann zot lekor,

Eski nou en Lopozisyon ki pe travay dan sa pei, oubyen nou en Lopozisyon ki pares? Akoz nou pa anmenn okenn lamannman, nou pa vin okenn *meeting* piblik. Zis nou asize nou koze, nou kritike, nou koze pandan 22minit e nou pa dir naryen.

E Mr Speaker sa i anmenn mwan pou dir ki mon pa konpran, mon pa konpran ki mannyer mon bann koleg lo lot kote latab i kapab aswar dormi dan en fason pezib, an konesans ki zot in asize dan sa Lasanble e zis zot in koze e zot pa'n anmenn deba en sou pli devan.

Zot pa fer- eskiz mwan pou dir sa, zot pa fer naryen, zot ganny en sans Mr Speaker. La konmela i annan *meeting* piblik tou le swar, la tanto pou annan

enn dan en distrik en distrik US. Napa enn ziska prezan ki'n al dan sa bann *meeting*. Pourtan, pourtan zot annan loportinite pou zot al dan *meeting*, montre sa bann dimoun ki'n elekte zot ki mannyer zot pe travay pou sa bann dimoun.

(APPLAUSE)

HON BERNARD GEORGES

Zot prefere mont lakaz, asize pran en tas dite oubyen get lo televizyon. Seryezman nou bezwen serye Mr Speaker. Nou pa kapab annan, lannen ale, lannen vini, semenn ale, semenn vini en Lasanble, en Lopozisyon dan Lasanble ki zis konplent, mefyan ek dekonekte. Nou pa kapab annan sa Mr Speaker.

E mon ava dir zot ki mannyer. Mon ava dir zot, espere les mon donn zot en leson. Mon ava dir zot Mr Speaker.

(APPLAUSE)

(Interruption)

HON BERNARD GEORGES

Ekoute. Ekoute zot a... ekoute zot a aprann, ekoute zot a aprann. Mon a donn zot en leson lo ki mannyer ler ou en

Lopozisyon efektiv e lwayal ou travay.

La prezan ki Prezidan i komans vin dan distrik; menm zot bann Prezidan in vin dan distrik dan lepase. E Mr Speaker les mwan dir akoz sa se leson ki mwan mon anvi donn mon bann koleg lo lot kote latab.

Ler Prezidan Michel ti deside vin dan distrik Les Mamelles. E parey ti son labitid, *unlike* sa enn Prezidan ki donn ou son kalandriye vizit, li i ti desid ozordi pou demen pou bann rezon ki nou konnen.

E les mwan fer zot konnen. Les mwan fer zot konnen en keksoz ki pa pe arive konmela, ki avan ki Prezidan Michel ti vin Les Mamelles, SLTA ti monte ti bous tou trou dan semen avek koltar. PMC ti monte ti penn tou bann flat pou fer zoli ek Lanbelisman ti monte, Lanbelisman ti monte tir tou dan 4er bomaten, plant fler partou zis pou donn en laparans ki pa vre.

Me ler Prezidan Michel ti vin Les Mamelles, mon ti ganny dir ozordi pou demen, mon ti dan en *meeting* Lonn, Langleter. Mon ti fer li mon devwar pou mon pran avyon, desann Sesel zis pou mwan vin akey Prezidan Larepublik dan mon distrik.

(APPLAUSE)

HON BERNARD GEORGES

Akoz se koumsa, se koumsa ki en Lopozisyon efektiv e lwayal i azir.

(APPLAUSE)

HON BERNARD GEORGES

E apre Mr Speaker son landmen swar apre vizit mon ti retourn Langleter mon ti kontinyen mon *meeting*.

Ler Prezidan Faure ti vin dan mon distrik. Ler Prezidan Faure ti vin dan mon distrik mon ti fer li mon devwar pou mwan akey li. Se mwan sa ki ti akey li dan distrik e ki ti mars avek li partou, ki ti akonpanny li pou montre li bann keksoz ki i ti anvi fer.

Alor mon bann zanmi akoz zot pa, akoz zot pa fer parey? Akoz ki zot, zot prefere inyor prezans Prezidan dan zot distrik e inyor zot prop zabitan distrik ki'n elekte zot pou swadizan lager pou zot?

E prezan zot ava vin donn nou lesion lo *rubberstamp*? Zot ki pou vin dir nou ki mannyer nou pou viv, ki mannyer nou pou azir dan sa Lasamble? Eskiz mwan, eskiz mwan, eskiz mwan!

I annan en fason fer Mr Speaker e sa fason fer lala lo sa kote latab.

(APPLAUSE)

HON BERNARD GEORGES

Se nou ki pe fer bouze sa pei, se nou, se *LDS* ki ansarz se, *LDS* ki al devan Lepep, se *LDS* ki annan Lepep aker. E zot bezwen konpran sa tre byen e ler zot vini e zot koze enn apre lot, enn apre lot, enn apre lot e dir nou pa kapab vot pou sa *Bill* akoz i pa letan. Zot pa'n annan ase konsiltasyon, patati, patata.

Nou e Lepep Seselwa deor laba pa pe tann zot mon bann zanmi, zot kapab koz pou 22 minit si zot anvi, personn pa pe tann zot. Konpran sa, zot in dekonekte avek sa pep e tan ki zot reste dekonekte zot pou reste dan Lopozisyon pou larestan zot lavi!

(APPLAUSE)

HON BERNARD GEORGES

Alor Mr Speaker avek sa detrwa mo, mon anvi reasir Vis-Prezidan e nou Gouvernman ek nou ladministrasyon ki tan ki nou, nou isi lo sa kote latab zot pou toultan ganny nou sipor. E nou pou komans sa apre midi

par vot an faver *repeal* sa *Bill*.
Mon remersye ou Mr Speaker.

(APPLAUSE)

MR SPEAKER

Mersi. A se moman mon ava envit Vis-Prezidan pou fer son repons lo deba.

VICE-PRESIDENT AHMED

AFIF

Mersi bokou Mr Speaker. Bonn apre midi Mr Speaker e tou bann Manm Lasanble Nasyonal e tou dimoun a lekout.

Mr Speaker permet mwan dabor pou remersye tou bann Manm ki'n koz an faver sa *Bill*. I kler poudir mon leksplikasyon lo komansman in ed bokou Manm pou zot konpran bi par deryer *repeal*, oubyen pou nou retir sa Lalwa e son rasyonal.

E son rasyonal mon a repete sete parske nou krwar ozordi, i neseser pou nou mye itiliz nou bann resours imen e osi resours materyel nou pei e alors anmenn plis lefikasite dan travay Gouvernman dan servis kliyantel.

Mr Speaker parey mon ti eksplike letan in evolye, nou ti annan en lepok kot *SIDA* ti en keksoz ki bokou pa ti konn lo la, bokou dimoun, bokou lenstitisyon otour lemonn pa ti konn bokou lo la.

E ti neseser ki ou annan en group dimoun ki zwenn ansanm dan en fason tre fokalize, pou donn Konsey Gouvernman e pour trouv solisyon pou fer sir ki sa pa zanmen vin en fleo. E nou'n vwar son listwar, nou konnen ki mannyer i marse.

E sete vreman sa apre ki Gouvernman in regard levolisyon pa zis *SIDA*, me lezot maladi dan Sesel e sete sa moman ki zot ti vin avek sa ki zot apel en stratezi evantyelman ki nou pou bezwen adopte ki apel *Health in All Policies*.

E zot ti vin devan Lasanble Nasyonal, si mon pa tronpe ti le 4 Me sanmenm sa mwan e zot ti al Nayopi Providence pou zot kapab. E la ti annan zis bann profesyonnel Minister Lasante pou vin donn en apersi avek Lasanble Nasyonal lo leta lasante nou pei. Kote nou pe ale.

E dan sa prezantasyon ki mon konnen ti zis en kote latab ki'n ale mon pa'n- i regretab ki personn dan Lopozisyon pa'n ale parske sa ti pou montre poudir zot enterese avek leta lasante nou Nasyon. Me personn pa'n vini, so mon mazinen zot konn pli byen ki sa bann profesyonnel kot lasante lo ki pe arive.

Me sa ki zot ti vreman koz lo la, sete ki ozordi sa direksyon kot nou devret pe ale, se montre avek pep Seselwa ki se pa zis Minister Lasante avek Konsey avek son bann, tou son bann *unit* ki annan ki pou rezourd nou bann problem lasante.

Zefor ki zot ti sey fer sa letan e sa bann profesyonnel i la. Ti annan plizyer zot, sete pou montre ki lasante i konsern tou dimoun depi nou koman endividé dan lakour, nou zanfan, nou paran; Kwa ki nou manze, kwa ki nou bwar, ki kalite frekantasyon nou annan, ki bann labitud ki nou annan, par egzanp dan sport eksétera legzersis.

Parske tousala a longer ditan e ler mon pe koz a longer ditan mon pe koz ler ou zanfan i al dan primer. Ler i al dan segonder i pou afekte, i komans montre bann siny, bann sentonm swa ki bon, swa ki move pou zot.

E se atraver sa, e sirtou si ou pa swiv bann bon konsey se la ki nou pou al dan tou kalite direksyon ki nou pa ti a swete nou sosyete i ale. E ki ozordi nou vvar bokou sentonm. Par egzanp si ou manz move manze, ou bwar, ou konsonm bokou lalkol, ou fimen, pa fer legzersis se la kot ou anmenn tou sa bann danze parey Kanser,

malad leker, malad poumon, Dyabet avek Tansyon.

E sa dan li menm ler ou ganny tousala i anmenn tou kalite lezot konplikasyon. E nou konnen poudir ozordi nou pe depans plis ki 10poursan nou Bidze Nasyonal pou lasante lo bann zis serten maladi. Zis lo serten maladi e i pa enkli SIDA, par egzanp.

En gro porsyon nou Bidze pe al zis pou serten maladi. E lide se ki la fason nou devret regard li koman en Gouvernman se pa fokalize dan en Konsey, nou napa en Konsey pou Kanser ozordi. Nou annan detrwa NGO ki fer keksoz pou Kanser, nou napa en Konsey pou bann dimoun ki malad ronnyon, ki fer dyaliz, me selman i annan bokou dimoun ki malad e i kout en kantite.

Nou napa en Konsey pou bann dimoun ki malad zot poumon, napa en Konsey pou bann dimoun ki dan, ki pe abiz lalkol, pou drog. Me selman tousala i enportan parske zot kou lo pei i for. Me sa ki enportan pou dir, sa zefor ki Minister Lasante li i pe fer pou li kapab donn swen e tretman i pe mars otan ki li i kapab avek sa Bidze ki li i gannyen.

I pe fer son mye. Nou bann teknisyen, nou bann dokter, nou bann ners e nou dir zot

mersi, zot pe fer en gran zefor pou zot ede rezourd bokou sa bann problem.

Mon aksepte poudir tou keksoz i pa parfe, e sa i evidan ler nou koz ek piblik, ler nou koz ek tou dimoun zot pou dir ou keksoz pa parfe. Me nou, nou pe rod lefikasite e se sa ki nou pe anmennen atraver sa *Bill*.

Mon ti a kontan profite Mr Speaker, pou petet adres enn de bann pwen ki diferan Manm in souleve, in leve e ti a kontan plis leksplikasyon. Sof pou en Manm ki malerezman mon'n ekout li me mon pa'n konpran naryen parske i pa'n koz lo sa *Bill* ditou. Me mon ava al lo sa bann ki mon'n tandem.

Onorab Aglae par egzanp i ti demande ki mannyer Bidze pou marse; i ti demande ki mannyer bann diferan programm pou marse. Ki nou bann kontak ek bann lenstitisyon miltilateral pou ete. E eksplik en pe zafer konpansasyon akoz i pa pou marse e ki mannyer bann fon pou ganny administre.

Mon ava donn ou leksplikasyon Onorab. Bidze, sa Bidze ki'n met de kote i en Bidze ki la in aprouve par Lasable Nasional. Ler sa bann *staff* pou ganny re deplwaye dan Minister Lasante zot pou

bezwen en saler e sanmenm sa Bidze ki pou ed zot ganny en saler.

Nou bann programm ki Gouvernman i pe deza met an plas, pa blyie *NAC* li i pa ti pe *manage* tou bann programm, i ti pe donn Konsey. Me bann programm pou donn latizann, pou fer deteksyon, *CDCU* tou son travay ki i fer zot, zot kontinyen annan zot Bidze zot.

So sa travay pa pou sanz ditou, napa naryen ki pou sanze, deteksyon, piblisite, tretman, latizann, napa naryen ki pou sanze. Tou dimoun ki ti abitye ganny tretman pou kontinyen ganny tretman. Tou bann tes ki zot pou fer pou kontinyen annan e tou bann afilyasyon e sipor ki nou gannyen avek bann lenstitisyon miltilateral pou kontinyen.

Si nou pe koz ek *WHO* ki annan serten programm lo *SIDA* nou kontinyen koman Minister Lasante, *de tout* fason ti Minister Lasante ki ti koz ek zot e Minister Lasante i kontinyen koz ek zot.

Public Health Authority, lotorite- sa lotorite li i ti aktyelman son *financial controller* ki zer tou fon *NAC* atraver Trezor. Naryen pa sanze.

Public Health Authority i kontinyen annan en *financial*

controller li, Trezor i kontinyen la i pa disparet. E zot kontinyen pers tou bann fon ki annan pou fer avek programm li menm, ki annan pou fer avek sansibilizasyon, eksetera. So sa bann pou reste zot.

Piblik, ki relasyon pou annan avek piblik? Piblik pou kontinyen ganny lenformasyon parey zot ganny lenformasyon lo kwa ki pou manze, kwa ki nou bezwen evite. Bann bon konsey pou anpes ou ganny tansyon. Tousala pou egziste, i kontinyen egziste.

Ti annan en Onorab ti dir ek mwan fodre mon reasir piblik poudir sa bann programm pe kontinyen, Onorab Labonte wi. Garanti parey mon'n fek eksplike tou sa bann zefor pa zis lo *SIDA*, tou bann zefor pou nou asir piblik; pou nou edik piblik lo lenportans pou annan bann bon pratik pou zot viv byen ki pou vin mwens presyon lo Minister Lasante pou kontinyen.

E sa i kontiny atraver sa Polisi ki Minister Lasante i kontan anmennen ki apel *Health in All Policies*. E se sa ki nou anvi e *health in all* i vedir ou met lasante dan tou programm depi lekol. So, lekol i bezwen edik manrmay osi lo kwa ki bon pou manze.

I bezwen al dan sa bann programm goute, i al dan kwa ki zot manze midi, i al dan zot *P.E* i al dan keksoz ki zot fer dan wikenn. Kominote i zwenn ansanm pou gete ki zot devret fer, Gouvernman Lokal i antre ladan. Tousala i *Health in All Policies*.

Onorab Cosgrow ti dir poudir li i pa konpran sa *streamlining* e ki mannyer i pou marse. Onorab ozordi lasante ki mannyer in evolye, nou realize poudir byensir ou pa ti la dan sa prezantasyon lasante. Me zot ti eksplike klerman ki mannyer tou problem ki si nou pa pran ka avek depi lo komansman, i fini kot Minister Lasante. E nou blanm Minister Lasante.

Me sa ki bann dokter poudir ou, sa ki ou gannyen, i swiv ou fason viv. E zour ou ariv la li i pou fer son mye pou li ed ou. Me i komans bokou avan ou ariv kot Minister Lasante.

Alor *streamlining* ou bezwen *streamline* pa atraver zis en Konsey, sa Minister i bezwen annan en *unit* e zot annan zot *unit* ki regard tou sa bann keksoz dan Polisi kot zot bezwen sansibiliz pa zis lo *SIDA* lo tou keksoz, *SIDA* i zis enn.

Ou annan parey mon ti dir bomaten 1000 dimoun apepre ki pe soufer avek *SIDA* malerezman. Me ou annan

bokou plis ki pe soufer avek lezot maladi. Tansyon, 17mil dimoun, Dyabet 12mil dimoun, dimoun ki pe abiz lalkol ek drog 10mil dimoun. *COVID-19* 40mil dimoun ki'n deza gannyen, ok. I en keksoz a kour term.

Me napa Konsey pou tousala, se Minister Lasante atraver *Health in All Policies* ki fer sir i dil ek tou sa bann problemm. Alor son zefor lefikasite ki nou'n koz lo la, i bezwen vin dan pran tou ou bann dimoun e si ou regard lo sa *Board*, lo sa *Board NAC* i annan omwen 7 dimoun ki travay deza Minister Lasante.

Pran tou sa bann dimoun, zot pou la zot, zot pa pe disparet dizour a lannmen akoz nou pe fer *repeal the Act*, zot pou la. E tou sa bann lezot dimoun ki ti lo sa *Board*, bann *NGO* parey *CEPS* avek bann kot larelizyon eksatera zot pou la zot, zot a la nou kapab koz ek zot.

Nou pa bezwen neseserman annan en Konsey pou tou sa bann diferan maladi e sennla i annan bann lezot maladi ki bokou pli serye ankor.

Alor Mr Speaker, mon espere mon pe donn en garanti avek bann Manm poudir *streamlining*, definitivman lafason nou pe fer li nou pe *streamline*. Eski nou pou annan menm motivasyon Onorab

Adelaide in demande pou nou kontinyen sa travay edik dimoun?

Wi Onorab, mon asir ou sa bann *staff* pa zis sa bann *staff* ki ti dan *NAC* ki pou fer ledikasyon se lezot *staff* Minister Lasante. Pou zot pa ariv dan sa sityasyon. Si ou al lo kote sosyal par egzanp, depi boner menm ou'n montre zot bann bon fason viv, sa pou ede pou ariv sa pwen ki ou pou ganny *SIDA*.

Alor i annan en ta ledikasyon ki pou vin ladan e Minister ansanm avek lezot Minister pou bezwen zwenn pou fer sa travay ansanm.

I annan Manm ki'n koz lo bann problemm kot Minister Lasante, promosyon bann dokter, eksetera. Sa *Bill* pa pe koz la, me mon anvi garanti tou bann Manm poudir Gouvernman i atas en gran lenportans ek tou son profesyonnel, tou son profesyonnel.

E ozordi avek Bidze ki nou annan nou pe toultan koz ek nou bann profesyonnel dan diferan Minister pou fer sir tou dimoun i santi poudir son valer i ganny apresye.

E otan ki mwan mon konnen, nou pe fer sa ki nou kapab pou donn mye nou bann resours avek nou bann

profesyonnel e lo zot kote mon konnen ki bann profesyonnel osi pe donn tou sa ki zot kapab.

Onorab Naddy Zialor ti demande si ler nou *repeal* sa i pou afekte nou. Eski lezot, i ti pe dir ek mwan reasir sirtou lot kote. Be mon krwar nou'n evolye pandan letan. Zot in vvar ki mannyer nou, nou evolye e keksoz i reste parey. Parey en manm ti dir, soley pou kontinyen leve demen, *SIDA* pa pou disparet dizour a lannmen.

Me nou, nou rol e tou sa bann maladi Kanser, Dyabet, dimoun ki fer dyaliz, tansyon tousala pa pou disparet dizour a lannmen. Me nou, nou rol se servi nou resours le mye posib, servi nou bann profesyonnel, pa dir li zis reste dan seksyon ki dil ek *SIDA*, me dil ek tou keksoz. Zot bann dimoun *skilled* sa bann dimoun. Zot annan en kantite potansyel e kantite zot kapab donne, servi zot dan fason ki meyer pou nou kapab ganny pli bon rezulta.

Alor Mr Speaker, mon krwar mon'n koz en kantite lo merit sa *Bill*. Mon krwar mon'n adres otan ki mon kapab, bann konsern ki'n ganny met devan. E mon krwar lo kote finans ler mon'n eksplike ti annan sa - dan lepase ti vin atraver *AIDS Trust Fund*, me ozordi i annan

R1milyon environ ki ganny donne avek *National AIDS Council*. E sa larzan i ede avek serten NGO.

Sa larzan i ganny zere ozordi par *National AIDS Council* ki ozordi anba sa Lalwa nou pe *repeal*. Me lentansyon se pa pou arete siport bann NGO ki pe fer sa louvraz. Zis pou zot lenformasyon, lafason i ti ganny administre sa R1milyon apepre par an ki ti pe ganny donne ek NGO, sete atraver *financial controller* ki dan *Public Health Authority*. Se li ki ti pe administre sa bann fon.

E menm ki sa i *repeal* se li ki kontinyen administre sa bann fon, sa bann fon pou kontinyen reste. E lentansyon nou fer li reste dan en fason legal se ki nou amann regilasyon ki egziste anba finans, ki *manage* bann fon, ki fer ki sa i zis en dizesyon, nou ankor pe diskite avek Minister Finans se ki zot kapab fer li atraver *Public Health*, ki li i a *manage* sa bann fon pou ed bann programm ki konsern *SIDA*.

I annan lezot programm ki konsern lezot maladi me zot, zot a servi sa e zot a kontinyen administre. I pa pou bezwen apel *National AIDS Trust Fund*.

I a kapab apel *Public Health AIDS Fund*. I kapab

ganny en mon ki apropriye me selman ki sa larzan i a kontinyen siport sa bann *NGO*.

Parske nou, nou pa anvi okenn louvraz ki annan pou fer avek ed bann *NGO* dan sa programm pou zot edik dimoun, pou zot fer bann bon pratik, pas kot kominate. Nou anvi sa i kontinyen nou. Nou pa anvi okenn keksoz redwir, nou pe rod zis fer plis avek menm resours ki nou annan. Setou ki nou pe rode.

So, vwala Mr Speaker mon espere ki mon'n kapab...

konpansasyon, zis konpansasyon. Konpansasyon i normal ki si en dimoun pe kontinyen travay ek Gouvernman. Si i kontinyen travay ek Gouvernman, ou pa'n kite, alors *the issue of compensation* pa arise.

Se sa ki nou pe dir. Si ou ti'n kite dan Gouvernman konpletman ou'n al dan en lot lorganizasyon byensir la i annan konpansasyon. Me si ou pe bouz sorti enn pou al lo lot, ou kontinyen travay e ou a ganny ou konpansasyon ki pou enkli sa peryod ki ou'n dan NAC zour ou a fini.

Alor i pa, i napa naryen mal avek sa. Mon pa vwar naryen mal avek sa prensip. So sa dimoun pa pou perdi naryen. Parske son letan ki in fer avek

AIDS Council i konte dan son konpansasyon final zour i pou fini. Zis la konmela nou pa pe pey en konpansasyon.

Alor vwala Mr Speaker. Mon espere ki avek sa bann remark ek leksplikasyon nou a ganny laprouvason pou staz merit sa *Bill*. Mersi bokou.

MR SPEAKER

Mersi Vis-Prezidan. Nou'n ariv le moman pou apel bann Manm pou vot lo merit zeneral sa *Bill* pou *Second Reading*. Manm ki an faver lev lanmen silvouple? Mersi. Manm ki kont? Mersi.

Lo merit zeneral *National Aids Council of Seychelles repeal Bill, 2023*. 20 Manm in vot pour, 9 Manm in vot kont, 0 in abstain. *Bill* in pas *Second Reading* dan Lasanble. E Madanm Clerk i a fer *Second Reading*.

MADAM CLERK

Mersi Mr Speaker. A *Bill for an Act to provide for the repeal of the National Aids Council of Seychelles Act, 2013 and to provide for other incidental or connected matters*. Mersi Mr Speaker.

MR SPEAKER

Mersi. Mon'n vwar dan rapor *Bills Committee* ki napa okenn amannman lo sa *Bill*. Eski

Onorab Hoareau i a kapab
adrese?

HON JOHN HOAREAU

Non, pou annan Mr Speaker.

MR SPEAKER

I annan alors? *Ok good.* Dan sa ka nou a pas dan Staz Komite pou pran amannman.

Wi, lekel ki pou anmenn lamannman? Onorab Georges ou annan amannman?

HON BERNARD GEORGES

Mersi Mr Chair. Mr Chair, wi. Annefe mon pa'n donn notis pou sa 3 lamannman e mon pe demann ou servi ou lotorite anba *proviso*, *Order 72* pou *relax provizyon 72ertan* an faver *simple amendments*.

Annefe mon annan 3 lamannman ki mon ti a kontan propoze dan lentere senpleman *improve the Bill.* Napa naryen kontansye ladan. Annefe si zot pa aksepte i pa sanz naryen, *but it will improve the Bill.*

MR SPEAKER

Tre byen, well nou a pran sa bann lamannman.

HON BERNARD GEORGES

Mersi Mr Chair. Premye i dan *long title.* Si nou regard *long title*, son premye fraz i "*an Act to provide for the repeal of the*

National Aids Council" eksetera. Mon ti anvi propoze ki nou *delete*' '*provide for the*" apre "of" pou li lir senpleman "*an Act to repeal the National Aids Council of Seychelles and to provide for other matters*", eksetera.

Dezyenm propozisyon i dan *clause 3.* 1, 2, 3, 4, senkyenm laliny kot i met *Minister of Health*, i devret annan en *comma* apre sa. Akoz sa fraz "*or with a public body under the responsibility of the Minister of Heath*" i en *subordinate clause.* I devret annan en *comma*.

E trwazyenm i dan *clause 4(a)*, 1, 2, 3, 4, senkyenm mo. *Properties.* All *movable or immovable properties*, dan sa sirkonstans, sa mo i devret "*property.*" All *movable or immovable property, assets, rights,* eksetera e non pa "*properties*". *Properties* parey ou konnen Mr Speaker i kapab servi me pa dan sa konteks.

Avek sa mon ti a kontan propoz sa 3 *simple amendments* parey mon'n dir, zis pou *improve the quality of the Bill*, me pa pou sanz naryen ladan. Mersi.

MR SPEAKER

Thank you. Panel i, napa okenn komanter, obzeksyon.

ASSISTANT DRAFTSPERSON - AG'S
OFFICE VANIA MARIMBA

Mersi, mon *agree* avek sa bann *proposals*.

MR SPEAKER

Good. Lo kote Manm? Tou i annord, tre byen. Sa bann amannman i ava- Onorab Cosgrow, ou annan en pwen.

HON WALLACE COSGROW

Ya Mr Speaker, bonn apre midi. Pa lo lamannman ki'n ganny propoze, me lo en lot pwen si nou kapab bouze *or* si lezot Manm i annan lezot keksosz lo sa bann lamannman, mon a tenir.

Mon annan en pwen lo . Mon kapab fer sa pwen la?

MR SPEAKER

Well, si lo general provisions.

HON WALLACE COSGROW

Transitional provisions.

MR SPEAKER

Wi, anfen si i annord avek *Standing Order, yes.*

HON WALLACE COSGROW

Mon ti oule zis rod en leklersisman an vi larepons Vis-

Prezidan taler an se ki konsern konpansasyon.

MR SPEAKER

Ok, nou a permet ou en leklersisman, wi.

HON WALLACE COSGROW

Ok, mersi Mr Speaker. Mr Speaker, Vis Prezidan in donn nou en leksplikasyon lo konpansasyon ki pou mwan dan *transitional provisions* i pa sa leksplikasyon ki Vis - Prezidan in donn nou. So, mon ti anvi ganny lenterpretasyon panel.

Akoz Vis-Prezidan in dir nou konpansasyon pa aplike si en travayer i kontinyen travay dan Gouvernman, me sel landrwa ki koz lo konpansasyon se dan *transitional provisions*.

E lo i pa pe koz lo en travay *the Council*, i pe koz lo *Board members*. E mon krwar son leklersisman *either* i pa'n kler *or* i annan en problem avek *clause 6(b)* dan Lalwa. Mersi.

MR SPEAKER

Vis-Prezidan ou kapab adrese.

VICE-PRESIDENT AHMED AFIF

Wi. Mersi bokou Mr Speaker. Mr Chair, mon ti pe koz dan

mon entervansyon lo bann *staff mwan*. Lo bann *staff naryen* pa ganny afekte. *Board members zanmen zot ganny peye compensation.* En *Board director* ler i fini, i fini. I pa ganny peye konpansasyon.

So, zis nou'n fer li kler poudir sa bann *Board members* pa kapab *claim compensation*. Mersi bokou Mr Chair.

MR SPEAKER

Thank you. Bon, be nou'n termin lo *Committee Stage* sa *Bill* e nou a retourn dan Lasanble. E nou a pran Mosyon pou *Third Reading*.

Onorab Arissol ki ansarz sa *Bill*, mon krwar wi.

HON SANDY ARISSOL

Mersi Mr Speaker. Mr Speaker, anba *Order 76(1)* mon move ki *Bill National Aids Council of Seychelles (Repeal) Bill, 2023 as amended* i ganny lir en Trwazyenm Fwa.

MR SPEAKER

Mersi. Mon a ganny segonnman pou sa Mosyon. Onorab Hoareau.

HON JOHN HOAREAU

Bonn apre midi Mr Speaker, mon oule segonn sa Mosyon. Mersi.

MR SPEAKER

Mersi. Manm a vot lo *Bill, Third Reading*. Manm ki an faver lev lanmen silvouple? Mersi. Manm ki kont? Mersi.

Lo *Formal Third Reading National Aids Council of Seychelles (Repeal) Bill, 2023 as amended*, 20 Manm in vot pou, 8 Manm in vot kont e 0 abstansyon. Donk *Bill* in pase par Lasanble.

Mon bezwen pou terminen la, demann Madam Clerk *Third Reading*.

MADAME CLERK

Mersi Mr Speaker. *This Act may be cited as the National Aids Council of Seychelles (Repeal) Bill, 2023.* Mersi.

MR SPEAKER

Mersi. Bon non terminen lo sa *Bill*. Nou'n arriv 4er, mon krwar nou kapab termin nou lazournen la. Mersi bann Manm pou zot kontribisyon e mersi *panel* pou zot partisipasyon avek nou. Lasanble i ava *adjourn* ziska semenn prosenn, Mardi 9er. *Adjourn*.

(ADJOURNMENT)

